

www.e-rara.ch

**Brieve instruction, pour armer tous bons fideles contre les erreurs de
la secte commune des Anabaptistes**

Calvin, Jean

A Genève, 1545

Universitätsbibliothek Basel

Shelf Mark: UBH FO IX 10

Persistent Link: <http://dx.doi.org/10.3931/e-rara-1185>

www.e-rara.ch

Die Plattform e-rara.ch macht die in Schweizer Bibliotheken vorhandenen Drucke online verfügbar. Das Spektrum reicht von Büchern über Karten bis zu illustrierten Materialien – von den Anfängen des Buchdrucks bis ins 20. Jahrhundert.

e-rara.ch provides online access to rare books available in Swiss libraries. The holdings extend from books and maps to illustrated material – from the beginnings of printing to the 20th century.

e-rara.ch met en ligne des reproductions numériques d'imprimés conservés dans les bibliothèques de Suisse. L'éventail va des livres aux documents iconographiques en passant par les cartes – des débuts de l'imprimerie jusqu'au 20e siècle.

e-rara.ch mette a disposizione in rete le edizioni antiche conservate nelle biblioteche svizzere. La collezione comprende libri, carte geografiche e materiale illustrato che risalgono agli inizi della tipografia fino ad arrivare al XX secolo.


Nutzungsbedingungen Dieses Digitalisat kann kostenfrei heruntergeladen werden. Die Lizenzierungsart und die Nutzungsbedingungen sind individuell zu jedem Dokument in den Titelinformationen angegeben. Für weitere Informationen siehe auch [Link]

Terms of Use This digital copy can be downloaded free of charge. The type of licensing and the terms of use are indicated in the title information for each document individually. For further information please refer to the terms of use on [Link]

Conditions d'utilisation Ce document numérique peut être téléchargé gratuitement. Son statut juridique et ses conditions d'utilisation sont précisés dans sa notice détaillée. Pour de plus amples informations, voir [Link]

Condizioni di utilizzo Questo documento può essere scaricato gratuitamente. Il tipo di licenza e le condizioni di utilizzo sono indicate nella notizia bibliografica del singolo documento. Per ulteriori informazioni vedi anche [Link]

0
K
0
7



Pro Nicolao fl
Erlach - 16 19
24 Octob.

B R I E V E

I N S T R U C T I O N,
P O U R A R M E R T O U Sbons fideles contre les erreurs de la secte com-
mune des Anabaptistes.

Par M. Iehan Caluin.

M I T T E R E I N T E R -

N O N V E N I P A C E M



R A M, S E D G L A D I V M.

R. FESCHT h.
A.S.
co h c xl.A G E N E V E,
P A R I E H A N G I R A R D.

I 5 4 5.

*Joannis Saurinij fuit.**Venerat ex Sib. Castellionis.*

10. 17. 10.
BRIEFVE
INSTRVCTION
POVR ARMER
LES
Icy premierement sont reprouuez cinq articles, contenuz en vne resolution, composée par les patriarches de la secte, qu'ilz ont commune entre eux. Assauoir:

Du Baptisme des petitz enfans.

De l'excommunication.

Du droit de porter armes.

De la puissance des Princes.

Du iurement.

Item deux autres.

De l'incarnation de Iesus Christ.

De la vie & condition des ames entre la mort
& le iour de la resurrection derniere.



I E H A N C A L V I N

A V X M I N I S T R E S

des Eglises du Conté de
Neuf-chastel.

SI quelcun se ebahit, mestreschers freres & compagnons en l'œuure du Seigneur, comment ie m'amuse a respondre a vniure, qui n'est pas digne qu'on en parle, ne qu'on'en face quelque mention: veu que ie me pourrois employer, comme il semble, a choses meilleures, & de plus grand fruit: il me suffiroit bien: pour toute excuse, d'alleguer, que c'est a la requeste & instance de plusieurs bons fideles, qui me l'ont enuoye de bien loing, avec tesmoignage, qu'il estoit bien mestier, pour le salut de beaucoup de pources ames, que ie y misse la main. Car ie pense bien, que cela doit estre assez, pour contenter ceux qui voudront prendre raison en payement: que i'aye voulu acquiescer, tant au iugement,

qu'au desir de ceux que ie congnois este zelateurs de la gloire de Dieu & del'edification de son peuple. Mais encore, i'ay vne autre responce, pour me excuser enuers ceux qui pourroyent penser, que c'est folie a moy, de m'occuper a chose si maigre & friuole, comme a ce liuret, lequel il appert auoir este compose par gens ignorans: c'est, que nous n'auons pas plus de priuilege qu'ont eu les Prophetes de Dieu, & que nostre peine n'est pas plus precieuse que la leur. Or nous voyons que Ezechiel a este contrainct de parler & escrire, non seulement contre les seducteurs de nul sauoir, ou reputation: mais aussi contre les femmes, qui vouloyent faire des Prophetesses. Puis que le Prophet ne s'est pas espargne a disputer contre les femmes: & mesme qu'il luy a este commande par nostre Seigneur de ce faire, d'autant qu'en induisant le peuple, par leurs mensonges, a superstition & erreur, elles empeschoyent le cours de la verite: ce feroit

roit vne presumption a nous de ne daigner nous soubmettre a faire le semblable. Il est vray que celiure, lequel on m'a prie & exhorte de reprouuer, n'auroit mestier enuers gens sauans & bien entenduz, d'aucune resolution: veu que de soy mesme il se redargue suffisamment, tant est inepte & sote-ment escrit. Mais d'autant qu'il a quelque couleur, pour abuser & circonuenir les simples, qui n'ont pas le iugement pour discerner: nostre deuoir est de leur ayder, & les aduertir des cautelles malicieuses de Sathan, a ce qu'ilz ne soyent pas seduitz par imprudence. Nous sommes debtors aux vns & aux autres, dit saint Paul. Pourtant il nous faut seruir a tous, entant qu'en nous est, quand la necessite le requiert. Je proteste donc, que mon intention est seulement, de remonstrer en brief a tous pures fideles, qui sont rudes & sans lettres, quelle & combien dangereuse poison c'est, que la doctrine des Anabaptistes: & de les armer

par la parolle de Dieu alencontre de icelle, a fin qu'ilz n'en soyent point surprins. Ou bien fil y en auoit quelcuns, qui desia fussent enuelopez en leurs filez, de les ramener au droict chemin. Pourtant, ie prietous ceux qui ont desir de sentretenir en la pure congnoissance de Iesus Christ, & en l'obeissance de son Euangile, d'auoir la patience de lire attentiuement ce present liuret, comme il leur est desdie de par moy: & mettre peine de bien poiser les raisons que ie leur allegueray: a fin de sarrester a la verite, quand elle leur sera declairee. La raison qui m'a esmeu de vous adresser ce present traicte, est double. Premièrement, a fin qu'il soit comme vn tesmoignage public de la conionction que i'ay, & desire tousiours auoir, avec vous: & que chacun congnoisse comment nous sommes vniz, tant en doctrine, comme en affections de cuer. Secondement, a fin que la lecture en soit plus recommandee a tous ceux ausquelz

quelz vous auez la charge de porter la parolle de Iesus Christ: tellement que les Eglises, ausquelles ce Prince des Pasteurs vous a commis Ministres, soyent entretenues en pure doctrine, & preseruees de toutes peruerfes opinions, contreuenantes a la verite du saint Euangile. Il est vray, que vous eussiez bien peu, mes treschers freres, me descharger de ceste peine. Et mesme desia nostre frere maistre Guillaume Farel, selon la grace qu'il a du Seigneur, & comme il est exerce de long temps, & par continuel vsage, a batailler contre tous les ennemiz de verite, & resister a toutes faulses doctrines, pour maintenir le Regne de IESVS Christ, auoit bien satisfait en partie a ce que vous requerez a present de moy. Comme i'ay veu par les actes d'une conference faite a la bonneville. Tellement que des poinctz qui sont la traictez, nul n'en pourroit demander plus suffisante declaration, pour se refoudre en sa conscience, qu'elle est la

donnee. Mais puis que ceux ausquelz
ie desire & suis tenu d'obtemperer, me
font a croire, qu'il faut que ie prenne
ceste charge: i'acquiesceray a leur de-
mande, sans faire plus longues excu-
ses. Le Seigneur Iesus vous ait tous-
iours en sa sainte protection, & ses E-
glises, qu'il vous a commises: vous con-
duise tousiours par son saint E-
sprit, pour se seruir de vostre
ministere a son honneur,
& au salut de son po-
uple. De

Geneue.

Le premier de Iuing.

1544.

BRIEVE INSTRUCTION
POUR ARMER
tous bons Fideles contre les erreurs
de la secte commune des Anaba-
ptistes.

DESCRIRE CONTRE
toutes les faulſes opinions, & erreurs
des Anabaptiſtes, ce ſeroit vne ma-
tiere trop longue: & quaſi vn abyſ-
me, dont ie ne pourrois ſortir. Car ceſte ver-
mine differe en cela d'avec toutes les autres ſe-
ctes d'heretiques: qu'elle n'a pas erré ſeulement
en certains pointz: mais a engendré comme
vne mer de folles reſueries. Tellement qu'à
grand' peine ſauroit on trouuer vne teſte d'A-
nabaptiſte, laquelle n'ait quelque phantaſie à
part. Ainſi de vouloir eſplucher, ou meſme
raconter toutes les meſchantes doctrines qui ont
eſté en ceſte ſecte, ce ne ſeroit iamais fait. Mais
en la fin, tout eſt reuenue en deux ſectes princi-
pales: dont l'une, combien qu'elle ſoit pleine
de beaucoup d'erreurs, mauuais & pernicieux:
toutteſſois elle ſe contient en plus grande ſimpli-
cité. Car, pour le moins, elle receoit l'Eſcriture
ſaincte, comme nous. Si on vient à traicter avec
les ſectateurs d'icelle, on fait en quoy on diſſe.

re d'auec eux: ilz donnent à entendre leur conception: & en la fin on fait en quoy on est demeuré d'accord, & quelle controuersie il y reste. La seconde est vn labyrinthe non pareil de resueries tant absurdes, que c'est merueille comment creatures, qui portent figure humaine, peuvent estre tant deprouueues de sens, & de raison, que de se laisser ainsi deceuoir, iusque à tomber en des phantasies plus que brutales. Ceste secte se nomme des Libertins. Et contrefont tant les spiruelz, qu'il ne tiennent conte de la sainte parolle de DIEV, non plus que de fables: sinon quand bon leur semble, & quand ilz la peuvent deprauer, pour la faire seruir par force à leurs opinions diaboliques. Dauantage, ilz ont vn gergon, comme gueux de l'hostiere, qu'on ne fait que c'est qu'ilz veulent dire, & aussi ne sentendent ilz pas: sinon qu'ilz ont bien ceste astuce, de couurir, par ce moyen, la turpitude de leur doctrine. Car leurs principes sont de confondre toute difference de bien, & de mal: de mesler DIEV avec le Diable, tellement qu'on ne sache discerner entre l'un & l'autre, & de rendre les hommes non seulement stupides deuant Dieu en leurs consciences: mais aussi effrontez deuant le monde. Voila donc pourquoy ilz se cachent en ces cauernes de parolles obscures & douteuses: à fin qu'on n'apperceoyue pas leur villainie, pour les auoir en horreur & execration. Comme
de

de fait le sens humain repugne à ces monstres qu'ilz mettent en auant. Ainsi pour escrire en somme contre les erreurs d'Anabaptistes, le plus court, & le plus expedient est de tenir ceste diuision: & de recueillir à part en vn traicté les erreurs de ceux qui ne sont pas du tout si enragez & desesperéz: en vn autre descouvrir la malice venimeuse de ces malheureux, qui, soubz couleur de spiritualité, veulent faire les hommes semblables aux bestes brutes. Or est il bien vray, qu'encores ceux de la premiere secte ne sont pas si accordans ensemble, qu'on puisse aysement faire vn recueil de leurs erreurs, pour les reprouuer par certain ordre. Mais pource que les principaux docteurs, & comme les Patriarches de toute la Synagogue, apres auoir bien rauaudé, ont fait vne conclusion finale, ou ilz ont enclos la somme de ce qu'ilz tiennent au contraire, tant de nous, que des Papistes, en sept articles, ausquelz tous Anabaptistes adherent communement: & aussi qu'ilz ont trouué moyen de faire imprimer ceste belle resolution qu'ilz ont prins ensemble, pour fermer leur poison par tout, & infecter le pource peuple: ie me contenteray pour le present, & me semble aussi qu'il suffira, de remonstrer la faulxeté contenue en la pluspart de ces sept articles: à fin qu'ilz ne se plaignent pas, que ie leur impose à tous la faute d'aucuns particuliers, pour diffamer iniustement toute la secte. Cela fait, si i'ay

Ce qu'il a
faict.

quelque fois loisir: i'escriray quelque autre petit traicté, contre l'autre bende seconde, dont i'ay parlé: assauoir, des Libertins, Mais comme i'ay dict, il suffira pour le present, d'auoir remonstré à tous amateurs de verité, que ce que tiennent ces pources gens d'un commun accord, pour fondement inuincible de leur Foy, est vne abusio mortelle, de laquelle il se faut garder comme d'une peste. Je dy à tous ceux qui desirent de se rendre obeissans à la verité.

Car il y en a d'aucuns en ceste malheureuse laquelle, & principalement ceux qui veulent contrefaire les Docteurs: lesquelz estans preoccupez d'orgueil & presumption, ne voyent goutte à tout ce qu'on leur dit: ou plustost par obstination & malice deliberée ferment les yeux, à fin de ne voir la clarté, quand elle leur est présentée toute euidente. Tellement que ce seroit battre l'eau, que de vouloir proceder avec eux par raisons, pour les reduire, sinon que, pour le moins, ce profit en reuient, que les bons congnoissent leur impudence desesperée, à fin de se retirer arriere d'eux, & les fuyr comme poison.

Or, pource qu'il n'y a nulle plus belle couleur, pour seduire les pources Chrestiens, qui ont zele de fuyre Dieu, que de pretendre sa parolle, les Anabaptistes, contre lesquelz nous escriuons maintenant, ont tousiours ceste preface en la bouche. Et certes quand on nous dit, que c'est
Dieu

Dieu qui parle: toutes creatures doyuent estre esmeues, pour la reuerence de son Nom, d'escouter en humilité ce qui se dit. Quand nous entendons que c'est vrayement la parolle de Dieu qui nous est mise en auant, il n'est pas question de plus repliquer, ne mesme d'ouurer la bouche, pour disputer à l'encontre. Nous ne disons pas comme les Papistes, qu'il faut là laisser la sainte Escriture, pour sarrester à l'autorité des hommes. Car nous tenons ce subterfuge, comme vn blasphemé execrable. Mais voulons que tout ce qui apparoiſtra estre venu de Dieu, & puisé de sa sainte parolle, soit receu de nous tous humblement, sans controuerſe, ne difficulté aucune. Qui plus est nous n'entendons pas, que nulle autre doctrine soit recongneue pour vraye & certaine, sinon qu'elle vienne de ceste fontaine de toute verité. Pourtant, soyent Anabaptistes, ou autres, qui nous disent, que ce qu'ilz nous apportent, ilz l'ont receu de Dieu, & prins de sa bouche: c'est à dire, qu'ilz le tiennent de la sainte Escriture: donnons ceste gloire à Dieu, d'entendre & escouter modestement, pour voir si ainsi est. Mais comme nostre office est, de preſter l'oreille à ce qui se dict, iusque à ce que nous ayons congneu que c'est, aussi deuons nous auoir ceste prudence, de discerner entre la verité, & le mensonge: & iuger si c'est à bon droit, ou à faulſes enseignes, qu'on nous allegue la parolle de Dieu.

1. Ich. 4.

Matt. 4.

D I E U . Car il nous est commandé de esprouuer les espritz, fauoir filz sont de Dieu. Et defaict nous voyons combien cela est necessaire: veu que le Diable mesme sest armé de la parolle de Dieu. & en a fait son baston pour assaillir nostre Seigneur I E S V S. Et nous experimentons, qu'il vse iournellement de ceste pratique par ses instrumentz à deprauer la verité, pour mener les pources ames à perdition. Touchant de ces pources phantastiques, qui se vantent si fort d'auoir la parolle de D I E U pour eux: le fait démonstre comment il en va. Il y a desia long temps, que nous sommes apres à trauailler continuellement que ceste sainte parolle soit remise au defus: & soustenons vn combat contre tout le monde pour ce faire. Eux quel adnoncement ont ilz fait, ou en quoy ont ilz aydé à cela? Mais plustost au contraire ilz nous ont empeschez & destourbez. En forte qu'on ne sauroit dire, de quoy ilz ont profité, sinon de reculer icelle parolle, d'autant qu'elle estoit aduancée par nous. Qui plus est, en d'aucuns poinctz principaux de la Chrestienté ilz faccordent tresbien avec les Papistes, tenans vne opinion directement repugnante à toute la sainte Escriture. Comme du franc arbitre, de la predestination, & de la cause de nostre salut. C'est donc faulsement qu'ilz abusent de ceste couleur, faisant à croire aux simples qu'ilz se veulent gouverner totalement selon

lon l'Eſcriture:veu qu'ilz n'en tiennent du tout rien:mais de la ſeule phantaſie de leur cerueau. Venons maintenant au premier article des ſept, qui ſont contenus en ceſte belle reſolution cor- nue, laquelle ilz tiennent pour reuelation deſ- cendue du Ciel.

Le premier article du Bapteſme

Le Bapteſme doit eſtre donné à ceux, qui ſont enſeignéz à penitence, croyans que leurs pechez ſont effacez par Ieſus Chriſt, & qui veu- lent cheminer en la reſurrection d'iceluy. Pour- tant on le doit diſtribuer à ceux qui le deman- dent par euxmeſmes, non pas aux petis enfans: comme on a faiçt au royaume du Pape.

Voyla leur dire. Mais ie reſpons premie- rement, que ce n'eſt pas vne faceon introduiçte de nouueau, ne qui ait prins ſon commencement en la Papauté. Car ie dy, que ce a eſté vne ſain- çte ordonnance touſiours gardée en l'Egliſe Chreſtienne. Qu'ainſi ſoit, il n'y a Docteur ſi an- cien, qui ne confeſſe, que touſiours on en a vſé des le temps des Apoſtres. J'ay voulu toucher ce poinçt en paſſant, non pour autre cauſe, que pour aduiſer les ſimples, que c'eſt vne calomnie impudente à ces phantaſtiques, de faire à croire

que ceste obseruation si ancienne est vne superstition nouuellement forgée: & de feindre qu'elle soit venue du Pape: comme ainsi soit que toute l'Eglise l'ait tenue deuant que iamais on sceut que c'estoit de Papauté, ne qu'on en eut ouy parler. Au reste, ie ne demande pas que l'ancienneté nous profite en rien pour l'approuuer, sinon que elle se trouue fondée en la parolle de D I E U. Je say que comme la coustume des hommes ne donne pas autorité au Sacrement: aussi pour en bien vsfer, qu'il ne se faut pas reigler selon icelle. Venons donc à la vraye reigle de Dieu, que nous auons dict: assauoir, à la parolle, laquelle seule doit auoir icy lieu. Leur intention est, qu'on ne doit communiquer le Baptisme, sinon à celuy qui le requiert, faisant profession de Foy & repentance. Et pourtant que le Baptisme des petits enfans est controuué des hommes, contre la parolle de Dieu.

Pour prouuer cela, ilz alleguent ce passage du dernier de saint Matthieu, ou I E S U S C H R I S T dit à ses Apostres: Allez, & enseignez toutes gens, les baptisans, au Nom du Pere, & du Filz, & du saint Esprit: auquel ilz adioutent ceste sentence du seziemes de saint Marc: Qui croira, & sera baptisé, sera sauué. Voila, se leur semble, vn fondement inuincible. Pour responce, ie dy qu'il n'est parlé du Baptisme en ces passages, que incidemment. Car il y est mis
com-

comme vn accessoire de la predication de l'E-
uangile. Nostre Seigneur I E S V S enuoye ses
Apostres pour prescher & instruire le monde:
puis il adioust le Baptisme, pour vne confirma-
tion de leur doctrine. Or faut il noter, que par ce
moyen la doctrine doit preceder ce Sacrement,
qui est adiousté avec, pour la seeller. En cela
nous accordons. Mais il faut sauoir comment. Et
c'est ce qui abuse ces pources phantastiques, que
ilz ne considerent pas le moyen. Quand donc
il y a vn homme estrange de l'Eglise Chrestien-
ne: comme seroit vn Turc, ou vn Iuif, ou quel-
que Payen que ce soit: pour le faire Chrestien, il
n'est pas question de commencer par le Baptis-
me: mais deuant que le baptiser, il doit estre in-
struit. Et tel a esté l'vsage de l'Eglise ancienne.
Car ceux qui se conuertissoient à la Chrestien-
té, auoyent pour quelque espace de temps leur
predication à part, qu'on appelloit Catechisme.
Puis apres auoir eu tesmoignage de leur Foy &
repentance, on les baptisoit. La raison le veut
ainsi. Car puis que l'homme non seulement est
introduit par le Baptisme en la communion de
l'Eglise, mais aussi y a son attestation seellée,
que Dieu le reconnoit pour l'un de ses enfans:
il n'y a doubte, que la doctrine ne doye prece-
der: par laquelle l'homme soit enseigné de se
conuertir à D I E U, avec Foy & repentance.
Nous voyons que nostre Seigneur en fit autant

euers Abraham, quant à la Circoncision. Car deuant que luy ordonner ce signe, il le receut en son alliance, & l'instruiſt en ſa parolle.

Gen. 17.

Mais nous auons maintenant à noter, que quand vn homme eſt receu de Dieu en la compagnie des fideles : la promeſſe de ſalut, qui luy eſt donnée, non ſeulement eſt pour ſa perſonne, mais auſſi pour ſes enfans. Car il luy eſt dit : Je ſuis ton D I E U, & le D I E U de tes enfans apres toy. Ainſi l'homme, qui n'a eſté receu en l'alliance de D I E U des ſon enfance, eſt comme eſtranger de l'Egliſe, iuſques à ce que par la doctrine de ſalut il ſoit amené à Foy & repentance. Mais alors ſa ſemence eſt auſſi quant & quant faiſte domeſtique de l'Egliſe. Et pour ceſte cauſe les periz enfans des fideles ſont baptizez en vertu de ceſte alliance, qui eſt faiſte avec leurs peres, en leur nom, & à leur profit. Voicy donc ou ſabuſent les pources Anabaptiſtes. Que la doctrine doyue preceder le Sacrement, nous n'y reſiſtons pas. Mais le tout eſt, ainſi que nous auons dict, de conſiderer comment, & par quel moyen. Car quand il eſt queſtion de baptiſer vn homme d'eage, qui n'aura pas eſté Chreſtien : deuant que venir là, il faut qu'il ſoit enſeigné de ce qui eſt figuré au Bapteſme. Mais quant à ſes enfans, on les baptiſe ſur la doctrine qu'il a receue : laquelle contient que Dieu ſera Sauueur, non ſeulement de ſa perſonne, mais auſſi de ſes enfans. Pour

en auoir encore plus claire intelligence : quand vn homme a esté estranger de la compagnie des fideles, & qu'il se conuertit à nostre Seigneur : la doctrine, sur laquelle il est baptisé, se adresse à luy. Pourtant il faut qu'il l'entende, & qu'il l'ait comprinse, deuant qu'on le receoyue au Sacrement. La doctrine, sur laquelle sont baptisez les enfans des Chrestiens, ne s'adresse pas à eux, mais à leurs parens, & à toute l'Eglise. Il n'est pas donc requis qu'ilz l'entendent deuant que receuoir le signe.

Pourtant, quand on fait cest argument: Nostre Seigneur a commandé à ses Apostres, de prescher deuant que baptiser: & a dict, que celuy qui croira & fera baptisé, sera sauué. Il sensuit donc, que nul ne doit estre admis au Sacrement du Baptesme, que celuy qui croit desia. C'est tres mal conclurre. Car c'est chose notoire, que nostre Seigneur ne parle en ces passages que de ceux qui sont capables d'estre enseignez, & qui au parauant n'ont esté de l'Eglise Chrestienne. Si nous n'auons esgard à ceste circōstance, nous confondrons beaucoup de passages, & y serons confuz en les exposant. Il est dict, que celuy qui ne travaille point, ne doit point manger. Nul n'est si cruel pourtant, de condamner les petiz enfans à mourir de faim. Car chacun voit bien, que l'Apostre ne les met pas en ce ranc. Mais parle seulement de ceux qui sont fors, & ont le

2. Theff. 3.

moyen. Puis donc qu'en ces passages nostre Seigneur fait spécialement mention de ceux qu'on peut enseigner. & qui au parauant n'ont esté de ses disciples: c'est tout deprauer & peruertir, de les tirer aux petiz enfans des Chrestiens, qui ne ont la capacité d'ouyr: & desia sont comprins en l'alliance de Dieu faicte avec leurs peres, pour estre domestiques de l'Eglise.

AA.8.

Ces pources phantastiques alleguent puis apres l'vsage & la pratique des Apostres. Il est dict au second des Actes, que les quatre mille hommes de Ierusalem, apres auoir ouy le sermon de saint Pierre, estans touchez en leurs cueurs demanderent conseil de ce qu'ilz deuoient faire: & que Pierre leur respondit: Repentez vous, & croyez à l'Euangile. Item, quand l'Eunuque requist d'estre baptisé: Philippe luy dict, qu'il seroit loisible, pourueu qu'il creust de tout son cuer. De là ilz concluent, que les Apostres ont requis Foy & repentance aux hommes, deuant que les baptiser. Le leur accorde des hommes qu'il falloit receuoir de nouveau en la communion de l'Eglise Chrestienne: mais des enfans, qui en sont deuant que sortir du ventre de la mere, ie dy qu'il y a bien autre raison. Car leurs peres, & leurs ancestres receoyuēt la promesse, sur laquelle le Baptisme d'iceux est fondé. Il estoit donc mestier que les habitans de Ierusalem, qui estoient hors de l'Eglise Chrestienne, & qui auoient

uoient consenty à la mort de nostre Seigneur, eussent vraye repentance, deuant qu'auoir tesmoignage par le Baptisme, que le Seigneur Iesus les acceptoit au nombre des fideles. Il estoit mestier que l'Eunuque par vraye Foy se rangeast au troupeau de *CHRIST*, deuant qu'il fust capable de porter sa marque. Mais puis que ceste promesse est faicte à tout homme fidele: Je suis le Dieu de ta lignée: les enfans qui descendent de luy ont vn autre priuilege: c'est, que Dieu les recongnoit cōme siens, à cause de leurs peres. Et à fin qu'il ne semble que ie songe cela de ma teste, nostre Seigneur nous en a monsté l'exemple en Isaac. Il est vray, comme nous auons dict, que deuant que communiquer le signe de la Circoncision à Abraham, il l'enseigna en la doctrine de Foy & de repentance. Mais l'ayant receu en son Eglise, il ordonna que sa lignée fust participante d'vn tel bien. Et ainsi Isaac & tous les autres successeurs furent circonciz des leur enfance. Nous auons donc Dieu pour auteur de ceste difference: de laquelle despend toute la difficulté de ceste question.

Mais pource qu'ilz ne veulent accepter la similitude que nous amenons entre la Circoncision & le Baptisme: il sera expedient de monstrier, deuant que passer outre, que c'est vne mesme chose. Quand on veut parler d'vn Sacrement, il est à noter que toute la substance & pro-

priété doit estre estimée de la doctrine, dont le Sacrement est confirmation. Notons donc cela, que la doctrine est comme le principal: le Sacrement est comme accessoire. Venons maintenant à faire comparaison du Baptisme avec la Circoncision. Le Baptisme emporte penitence, ou renouvellement de vie: avec promesse de la remission de noz pechez. La Circoncision autant, & ne plus ne moins. Qu'ainsi soit: touchant de la repentance, il en est souuent faict mention, tant en Moyse qu'aux Prophetes, ou il est parlé de circoncire les cueurs. Car c'est ce que le nouueau Testament appelle mortifier le vieil homme. En somme, Circoncision spirituelle vaut autant à dire, comme repentance. Quand est de la seconde partie, assauoir de la remission des pechez: il n'en faut pas demander plus claire approbation que ceste sentence de saint Paul, ou il dit, que la Circoncision a esté donnée à Abraham pour luy estre confirmation de la iustice gratuite, qu'il auoit obtenue par Foy. Si donc maintenant on argue, que c'est contre raison de baptiser les petiz enfans, qui n'ont point de Foy ne repentance: puis que le Baptisme est Sacrement de la regeneration & du lauement spirituel que nous auons en IESVS CHRIST, ie respons que le semblable se peut dire de la Circoncision. Et neantmoins Dieu n'a pas laissé de commander que les petiz enfans fussent circonciz.

Pour-

Pourtant, c'est arguer contre Dieu, d'alleguer que cela cōtreuienne à raison: qu'un Sacrement, qui est tesmoignage de repentance & de salut, soit communiqué aux petiz enfans. Qu'est-il donc de dire? Certes si nous tenons pour bon ce que Dieu a faict, nous auons vne doctrine qu'il n'est pas mestier que la verité, laquelle est signifiée en un Sacremēt, precede tousiours: mais qu'il fuffit quelquefois qu'elle suyue, pour le moins en partie. Car le renouvellement de vie estoit bien signifié par la Circoncision: & semblablement la iustice que nous obtenons par Foy. Ne la repentance, ne la Foy n'estoyent pas en un petit enfant. Mais pour cela il ne laissoit d'estre capable de receuoir le Sacrement. Voila donc comment le signe precedoit sa verité: si cela a esté licite au tresfois, & conforme à la raison: pourquoy est-ce que maintenant il seroit repugnant?

Mais quelcun repliquera, que ce n'est pas le tout d'alleguer que le semblable se soit faict, sinon qu'on monstre qu'il se doye faire encore à present. Je le confesse: & n'entens pas de faire instance, qu'on receoyue le Baptême des petiz enfans pour bon, que ie n'aye monstre que la volonté de Dieu est telle. Mais retenons cependant ce que i'ay desia prouué, que c'est disputer contre Dieu, de vouloir que la verité aille tousiours deuant le signe. Quant au reste nous auons à prouuer que c'est selon la parolle de Dieu que

Rom. 15.

Eph. 2.

nous baptisons les petiz enfans. Ce qui fera facile à chacun de comprendre, sans faire long proces: si nous congnoissons la grace que nostre Seigneur **I E S V S** nous a faicte à son aduenement. Au parauant Dieu promettoit aux Iuifz d'estre le Dieu de leurs enfans: & en tesmoignage de cela les marquoit du Sacrement de son alliance. Maintenant, comme dit saint Paul, le Seigneur **I E S V S** est venu pour ratifier les promesses faictes aux Iuifz, & pour espandre par tout le monde la misericorde de Dieu. Voire comme il le note en vn autre passage, rompant la paroy, qui estoit entre-deux pour separer les vns d'auec les autres: à fin qu'il n'y ait plus de difference: mais que nous tous ensemble ayons vn mesme priuilege d'estre enfans de Dieu. Pourtant qui-conque veut faire la grace de Dieu moindre enuers nous & noz enfans, qu'elle n'a esté vers le peuple Iudaïque, fait grande iniure à **I E S V S C H R I S T**, & le blaspheme. Mais quelcun pourra dire que ce n'est pas amoindrir la grace de Dieu enuers nous, de ne pas receuoir les enfans au Baptisme, moyennant qu'on ne nie pas que Dieu leur fait vne semblable misericorde que à ceux des Iuifz. Je respons que si. Car nous auons à estimer la grace de Dieu principalement par la declaration qu'il nous en fait, tant par sa parolle que par ses Sacremens. Puis donc que le Baptisme nous est aujourd'hui ordonné pour sceller en

en noz corps la promesse de salut: comme la Circoncision estoit anciennement au peuple Iudaique: ce seroit frustrer les Chrestiens d'une singuliere cōsolation, d'oster à leurs enfans ceste confirmation, laquelle ont tousiours eu les fideles, d'auoir vn signe visible par lequel nostre Seigneur leur demonstre, qu'il accepte leurs enfans en la communion de son Eglise.

Je say bien la cauillation qu'ont icy les Anabaptistes, prenans allegoriquement le nom d'enfans, pour signifier ceux qui sont enfans de malice: & non pas d'eage. Pourtant ilz se moquent de nous, entant que nous sommes si simples de prendre cela selon la lettre. Mais quel le subtilité est-ce là, ie vous prie, de vouloir renuerfer ces promesses tant claires & faciles: ou il est dict, que Dieu poursuit sa misericorde sur la semence des fideles apres leur mort? Dauantage, quel meilleur, & plus certain exposeur de cela pouuons nous auoir, que le saint Esprit: lequel a interpreté par les Apostres, ce qu'il auoit auparauant denoncé par les Prophetes. Or saint Pierre testifie aux Iuifz, qu'ilz sont enfans des promesses: c'est à dire, heritiers: entant qu'ilz Act. 3. sont descenduz de la rasse d'Abraham. Et saint Paul, combien que de propos deliberé il combat contre la folle presumption des Iuifz, qu'ilz auoyent en leur parentage charnel: neantmoins ne nye pas, que la rasse d'Abraham ne soit speci

allement sanctifiée à cause & en vertu de l'alliance, que Dieu auoit faicte avec luy. Il est bien vray, que quand les enfans des fideles seront venuz en eage de discretion, ilz se pourront bien aliener de DIEU, & aneantir la verité du Baptisme. Mais ce n'est pas à dire, que nostre Seigneur ne les ait esleu, & separé des autres, pour leur presenter son salut. Autrement ce seroit en vain, que saint Paul diroit, qu'un enfant ayant Pere, ou mere fidele est sanctifié: lequel seroit immonde, s'il estoit engendré & descendu d'infideles: Puis que le saint Esprit, auteur & source de toute sanctification, testifie que les enfans des Chrestiens, sont saintz: est-ce à nous de les exclurre d'un tel bien? Or si la verité du Baptisme est en eux: comment les oserons nous priuer du signe, qui est moindre & inferieur?

1. Cor. 7.

Mais ilz repliquent, que la coustume & pratique des Apostres a esté contraire. Car il est dict, que saint Paul & Silas prescherent la parole du Seigneur au Geollier, ou garde de prison, & à ses domestiques, deuant que les baptiser. J'ay desia donné solution à cela, remonstrant qu'en un homme qui auroit esté estranger de l'Eglise, la doctrine doit bien preceder le Sacrement: mais depuis que Dieu l'a receu en la communion de ses fideles, que la promesse de vie luy est faicte pour ses enfans, comme pour luy. Mais ilz pensent auoir un passage beaucoup plus expres en leur

A. 2. 16.

leur faueur au dixneuuiemesme chapitre des Actes, ou il est dict, que saint Paul, ayant trouué certains disciples, qui n'auoyent pas encore receu le saint Esprit, les baptisa de nouueau. Or il est certain, que saint Luc parle là des graces visibles du saint Esprit. Car autrement ce qu'il dit ne conuiendroit pas. c'est que ceux dont il parle, qui estoient Iuifz, respondent qu'ilz ne sauent si le saint Esprit estoit donné. Or ilz ne peuuent ignorer, que DIEU sanctifie ses seruiteurs par son Esprit: veu qu'il en est si souuent parlé en tous les Prophetes. Mais ilz ne sauoyent pas, si ces graces, dont saint Paul les interrogoit, estoient données à l'Eglise Chrestienne. Veu donc qu'ilz sont nommez disciples, ilz ne sont pas tant ignorans, qu'ilz ne congnoissent aucune, ment Dieu & IESVS CHRIST: comme feroit vn simple Chrestien du commun peuple. Mais cela leur deffaut, qu'ilz n'ont pas receu les graces visibles, que Dieu espandoit lors sur ses seruiteurs. Icelles leur sont conferées par l'imposition des mains de saint Paul. Car ce n'est pas chose nouuelle, que le nom de Baptisme soit prins en telle signification. Comme nous en auons l'exemple, quand il est dict, que les Apostres se sont souuenuz des parolles du Seigneur, que Iehan auoit baptisé en eue: mais que luy baptiseroit d'Esprit. C'est aussi vn vsage frequent en l'Ecriture, d'exposer vn mot, ou vne senten-

A ct. 1. & 10.

ce par l'autre. Il est donc dict, que saint Paul les baptisa au Nom de CHRIST: & puis, pour exposer que cela veut dire, il est adiousté, qu'il leur mist les mains sus eux: & que le saint Esprit descendit. Ce n'est donc qu'une mesme chose exprimée en deux sortes, selon l'usage de l'Ecriture, comme nous auons dict, Toutefois voyons que veulent, ou peuuent inferer ces bonnes gens, encore que nous leur accordions tout ce qu'ilz demandent. Ilz ne peuuent certes dire autre chose, sinon que saint Paul a rebaptisé ces disciples, à cause de leur ignorance. Mais fil faut que le Baptisme soit reiteré pour ceste cause, que eust ce esté des Apostres, qui, trois ans apres leur Baptisme, ont tant eu d'erreurs, & de lours opinions, iusques à estimer, que le Regne de IESVS CHRIST fust terrien, de ne rien comprendre de sa mort & passion, & beaucoup d'autres semblables? Telle rudesse certes eust bien requis vn second Baptisme, fil falloit rebaptiser vn homme ignorant. Et quant à nous, il nous faudroit tousiours auoir quelque lac, ou riuiera à la queue, fil estoit question de receuoir nouveau Baptisme, toutefois & quantes que nostre Seigneur nous purge de quelque erreur. D'autre part il est dict, que saint Paul a baptisé ceux là, dont il est question, deuât que leur imposer les mains. Qui seroit vn mauvais ordre, si ce que disent ces pures phantastiques estoit vray. Car, selon leur
phan-

phantasie, le saint Esprit deuoit premierement estre donné à ces disciples : & puis consequemment le signe. Mais qu'est-il mestier d'en disputer plus auant, quand nous auons la chose toute claire?

Ilz n'ont donc plus autre calumnie, pour mordre sur le Baptisme des petiz enfans, sinon d'autant qu'il n'est faict nulle part mention, que les Apostres en ayent vsé. Je respons, que nous ne lisons pas non plus, que iamais ilz ayent administré la Cene du Seigneur à vne seule femme. Pourquoy donc font-ilz plus grand' difficulté de l'un que de l'autre? Ilz n'oseroient pas dire, que les femmes ne soyent capables de receuoir la Cene du Seigneur. Toutefois nous ne lisons pas, que iamais l'ayent receue par les mains des Apostres. Ou est-ce donc, que nous en prenons certitude? C'est en regardant l'institution, la nature, & la substance du Sacrement. Car en ce faisant, nous voyõs qu'il leur conuient aussi bien qu'aux hommes. Or nous auons monstré le semblable du Baptisme: assauoir qu'il conuient & appartient aux petiz enfans: d'autant que nostre Seigneur les tient pour domestiques de son Eglise. Que demandons nous plus? C'est bien chose superflue d'enquerir de la coustume, ou le droit est tout clair & notoire. Je dy en ceste matiere: en laquelle le seul plaisir de Dieu nous doit suffire. Quant à ce poinct, j'espere, au plaisir de Dieu,

auoir pleinement satisfait à tous ceux, qui se voudront ranger à la verité. Combien que si quelcun en desiroit plus ample declaration, il pourra voir ce que i'en ay traicté en l'Institution Chrestienne: ou tous les argumens sont desdus plus au long.

Le second article de l'ex- communiment.

L'usage de l'excommunication doit estre entre tous ceux, qui font profession d'estre Chrestiens, ayans esté baptisez, & neantmoins tombent en quelque faute par inaduertence, sans propos deliberé. Iceux doyuent estre exhortez & remonstrez secretement iusques à deux foys: à la troisieme foys publiquement bannis deuant toute la congregation, à fin que puissions d'un mesme zele rompre le pain ensemble & boyre du calice.

Nous ne contredisons pas, que l'excommunication ne soit vne police bonne & saintte: & non seulement vtile: mais aussi necessaire en l'Eglise. Qui plus est, c'est de nous, que ces pources ingratz ont aprins ce que ilz en fauent: sinon qu'ilz ont par leur ignorance ou presumption, corrompu la doctrine, laquelle nous enseignons purement de nostre costé. Mais pour
vuider

vuider brièvement cest article : ie noteray en-
quoy nous accordons : & enquoy ilz different
d'auec nous : Comme i'ay desia dict, nous ensei-
gnons de nostre part constamment, l'excomuni-
ment selon qu'il a esté ordonné de Iesus Christ,
deuoir estre en vsage, & tenons que c'est vn moy-
en necessaire pour conseruer l'Eglise. Dauantâ-
ge nous procurons & sollicitons voyre instam-
ment, entant, qu'en nous est, & qu'il soit restitué
au dessus, & qu'il soit practiqué. comme il doit:
remonstrant que c'est vne grande faute, & vn vi-
ce fort reprehensible, quand il ne se fait pas ain-
si. En cela donc les Anabaptistes n'ont nul diffé-
rent contre nous. Si nous condamnions l'excom-
municatiō : ou que nous fissions à croire que c'est
vne chose superflue & iuutile, ou que nous fussi-
ons bien contens qu'elle n'eust point de lieu en
l'Eglise : lors ilz auroient occasion de murmurer
contre nous. Mais quant à cela nous sommes
de bon accord. Voicy ou est tout le debat : que
eux pensent, que par tout ou ceste police n'est
pas en son estat, ou bien qu'elle n'est pas deuëment
exercée, là il n'y a nulle Eglise : & qu'il n'est pas
licite à vn homme Chrestien d'y receuoir la Ce-
ne. Pourtant ilz se separent des Eglises, auxquelles
la doctrine de Dieu est purement preschée, pre-
nans ceste couleur, qu'ilz ne veulent point estre
participans de la pollution qui s'y commet : en-
tant qu'on n'en bannit pas ceux qui l'ont meritē.

Nous aucontraire, confessons bien que c'est vne imperfection & mauuaise tache en vne Eglise, quand cest ordre n'y est point . Toutefois nous ne laissons pas de la tenir pour Eglise: & de persister en la communion d'icelle: & tenons qu'il n'est loisible à vn homme particulier de sen separer.

Or pource qu'il ne suffit pas de dire: aduifons, si nous n'aurons pas bonne approbation de nostre doctrine à l'Escripture. Car ie me submetz volontiers à ceste condition, qu'on ne croye rien de ce que ie diray, sinon qu'on aye le témoignage de l'Escripture. La question donc premiere est, assauoir si on doit tenir pour Eglise Chrestienne vne compagnie, laquelle n'aura pas l'vsage de l'excommunication telle que le Seigneur I E S V S l'a ordonné. Certes ce deffaut la estoit à Corinthe, du temps que saint Paul leur escriuoit, comme il le montre & sen complaint. Neantmoins si leur faict il cest honneur d'appeller leur congregation Eglise Chrestienne. Il y auoit diuerses sectes & bendes: l'ambition & auarice y regnoit entre plusieurs. Ilz estoient à se manger les vns les autres par procez. Vn crime, qui eust esté execrable entre les Payens, non seulement y estoit toleré: mais quasi approuué. Qui plus est outre vne telle corruption des meurs: il y auoit aussi bien des fautes en la doctrine. Saint Paul neantmoins ne parlant pas de foy mesme,

mesme, mais comme bouche & organe du saint Esprit, intitule son Epistre à l'Eglise Chrestienne, qui est à Corinthe. Qui sera maintenant celuy de nous, qui entreprendra d'estre plus feue re que Dieu, en iugeant? Celuy qui l'osera faire, monstrera bien sa temerité: mais il ne changera rien de ce que Dieu en a prononcé vne foys.

Que dirons nous des Galatiens? Nous sauons la confusion & le desordre qui y estoit. Mais cela n'empesche pas saint Paul d'y recongnoistre Eglise. Il nous faut bien estudier, entât qu'en nous est, de venir à la perfection, laquelle doit estre au corps de Christ. Mais quant & quant il ne nous faut pas, attendre autre estat ou condition en l'Eglise, que celuy qui nous a esté predict par la verité infalible. Ne nous abusons pas donc, d'imaginer vne Eglise parfaicte en ce monde: puis que nostre Seigneur I E S V S a vne foys de noncé, qu'elle sera semblable à vne aire, en laquelle les bons grains sont tellement melez par my la paille, que souuent ilz n'aparoissent point. Ité, qu'elle sera semblable à vn retz ou diuerses fortes de poissons sont congregées. Ces similitudes nous enseignent, que combien que nous deuions desirer vne pureté souueraine en l'Eglise: & mettre peine qu'elle y soit: neantmoins que ia mais nous ne la verrons si pure, qu'il n'y ait beau coup de pollutions dedans.

Matt. 3.

Matt. 13.

Car ce qui est dict que le Seigneur I E S V S

Ephc. 5.

a espandu son sang pour la nettoyer, à fin qu'elle fut sans ridde & sans macule : ne signifie pas que des à present elle soit nette de toutes taches. Mais plustost elle croist & profite de iour en iour, tendant à ce but auquel elle ne paruiendra iamais en ce monde. Mais encor l'Eglise est entachée de vices en deux sortes. Car il n'y a membre d'icelle si pur ne si parfait qui ne soit encor enuironné de beaucoup d'imperfections. Tous fideles donc pendant qu'ilz conuersent en ce monde ont tousiours quelque immundicité residente en leur chair : comme toute l'Escripture le testifie : & principalement saint Paul au septiesme des Romains. Touchant de ceste espece d'immundicité, encor que nous eussions vne Eglise la mieux policée du monde : nous ne pouuons pas euitier toutesfois que nous n'ayons iournellement besoing que nostre Seigneur nous laue, en nous remettant noz pechez par sa misericorde, La seconde maniere dont l'Eglise est souillée c'est qu'il y a tousiours des meschans hypocrites au troupeau des bons, pour infecter la compagnie, de leur ordure. Aucuneffoys aussi il y en a des contempteurs, de vie dissolue & scandaleuse, ou bien qui se contregarderont de paour d'estre reprins deuant les hommes : mais cependant monstrent bien qu'il n'ont ne crainte ne reuerence de Dieu. Ceste pollution doit estre ostée par la discipline d'excommunication &

& y faut diligemment trauailler, entant que faire se peut. Mais il se trouuera beaucoup d'Eglises, lesquelles ne feront pas leur deuoir à reietter telles ordures. Les autres, qui y mettront grand peine & diligence, n'en viendront pas tellement à bout, qu'il n'y demeure tousiours vne grande quantité de meschans impuniz : d'autant que la malice des hypocrites est souuent cachée : ou pour le moins n'est pas si bien descouuerte, qu'on puisse ietter sentence à l'encontre. Tenons donc en somme ce que dit nostre Seigneur, que ius-
Matt. 13.
que à la fin du monde il nous faut endurer beaucoup de mauuaises herbes : de peur que si nous voulions tout arracher, nous ne perdions le bon grain quant & quant. Que voulons nous plus? Nostre Seigneur, pour esprouuer les siens, a voulu assubiectir son Eglise à ceste poureté, qu'elle fust tousiours meslée de bons & de mauuais. Il est donc question de passer par là.

Et de faict, nous auons bonne occasion de ce faire. Car nous deuons bien porter cest honneur à la sainte parolle du Seigneur, & à ses saintz Sacremens: que par tout ou nous voyons ceste parolle preschée, & que suyuant la reigle qu'elle nous baille, Dieu y est adoré purement, & sans superstition: & qu'on y administre les Sacremens: nous concluons, sans difficulté, que là il y a Eglise. Autrement, que seroit-ce? Que la meschanceté des hypocrites, ou des contempteurs

de DIEU, peust abolir la dignité & vertu de la parole de nostre Seigneur, & de ses Sacremens? Or ie confesse bien, que la discipline est aussi bien de la substance de l'Eglise: quant est de faire qu'elle soit establie en bon ordre, & quand il n'y a pas bonne police en vn lieu: comme si l'excommunication n'est point en vsage, que la vraye forme de l'Eglise en est autant defigurée: mais ce n'est pas à dire qu'elle soit du tout destruite, & que l'edifice ne demeure, puis qu'elle retient la doctrine, sur laquelle l'Eglise doit estre fondée. Je laisse à dire qu'encore le cas posé, que nous ne deussions auoir autre consideration que des hommes, & de leurs meurs, nous pourrions estre souuent abusez en reietant vne compagnie, & ne la daignant estimer pour Eglise, à cause des imperfections qui y seroyent. Car il se pourroit faire tous les coupz, que nous ferions iniure à beaucoup de bons & saintz personages, dont le nombre est caché entre les meschans: comme le bon grain dessoubz la paille. Dauantage, nous auons à penser que d'aucuns qui ont des vices ne laissent pas de se deplaire en iceux, & avec vraye repentance, desirent de sen retirer, pour seruir à Dieu plus entierement. Il y a aussi, que c'est vne chose trop rigoureuse, de reietter vne personne pour vne faute. D'autre costé, nostre nature est encline, tant à malignité, pour mal souspeçonner, qu'à temerité, d'assoir iugement deuant que
la

la chose nous soit bien & droictement cõgneue. Parquoy d'autant deuons nous plus songneusement nous garder de decliner à ceste part. Mais, comme i'ay dict, ce feroit peruersement faict, d'auoir icy regard seulement aux hommes. Car la maïesté de la parolle de Dieu, & de ses Sacrements nous doit estre en telle reputation, que par tout ou nous la voyons, nous soyons certains que là il y a Eglise: nonobstant les vices & macules qui pourront estre en la vie commune des hommes. Somme, quand il est question d'estimer que c'est que d'Eglise, le iugement de Dieu merite bien d'estre preferé au nostre. Or les Anabaptistes ne peuuent acquiescer au iugemēt de Dieu: comme nous auons monsté.

La seconde question sur cest article est, quand l'ordre d'excommuniement n'est pas dressé en vne Eglise, ou qu'il n'est pas practiqué comme il doit: assauioir si pour ce deffaut il nous en faut separer, & qu'il ne nous soit licite de là receuoir la Cene. Les Anabaptistes disent, que par tout ou les mauuais ne sont excluz de la communion du Sacrement, l'homme Chrestien se pollue en y communiquant. Nous au contraire disons, qu'un Chrestien doit bien estre triste, quand il voit la saincte Cene estre pollue par la reception des meschans & indignes: & doit procurer entant qu'en luy est, que cela ne se face pas. Toutefois si se fait, qu'il ne luy est pourtant licite

de se retirer de la communion, & se priuer de la Cene, mais qu'il doit tousiours perseuerer d'adorer Dieu avec les autres, ouyr la parolle & receuoir la Cene, cependant qu'il habite au lieu.

Que les Anabaptistes produisent leur auteur, pour approuuer leur dire. Quant à nous, nous ne disons rien que suyuant nostre Seigneur **I E S V S**, & tous les Prophetes & Apostres. Nous voyons les vices que taxent les Prophetes en l'Eglise de Iudée. Ou plustost les abominations, contre lesquelles ilz crient. Cela n'est pas pour vn estat: mais ilz disent, que depuis le gouuernement, tant spirituel que temporel, iusque au commun peuple, tout estoit tant corrompu, qu'à grand peine y auoit il vn seul membre sain. Ce sont leurs parolles? Ont ilz pourtant laissé de conuenir avec le peuple ainsi peruers & meschât? pour adorer Dieu, pour faire les sacrifices, pour ouyr la doctrine de la Loy? Ont ilz fait vn autel, ou vn temple à part, pour auoir vne Eglise pure? Si l'homme fidele est pollué en participant avec les meschans à faire prieres, & receuoir tant la doctrine que les Sacremens de nostre Seigneur, voila tous les Prophetes polluez, & qui sont comme capitaines, pour nous mener tous en perdition par leur exemple. Venons à nostre Seigneur **I E S V S** & à ses Apostres. Nous sauons, pour le premier, quel estoit l'estat de l'Eglise de Ierusalem en ce temps là. Toutefois nostre Seigneur
Iesus

J E S U S a voulu estre circoncis communement avec les autres. Puis au iour de la purgation il a voulu estre apporté au Temple, pour estre présenté à D I E U, à la faceon accoustumée. Si on allegue, qu'il a esté receu par les mains d'un saint personnage, assauoir Simeon: ie respons, que tout cela se faisoit au nom de l'Eglise, laquelle estoit remplie de beaucoup d'ordures & d'abominations. Si on replique qu'il estoit petit enfant, & pourtant que ce n'est pas son propre faict: ie respons, qu'il estoit tellement petit enfant en la nature humaine, qu'il auoit prinse de nous, que cependant il estoit gouverné par sa prouidence diuine: selon laquelle iamais il n'eust permis d'estre contaminé par quelque acte qui contreuint à la pureté des enfans de Dieu. Mais estant homme parfait, preschant, qui plus est, & exerçant son office, il a poursuiuy ce train iusques à la mort. Si c'est offenser D I E U, que de entrer en vne congregation, de laquelle tous les meschans ne sont pas excluz, pour prier D I E U, & faire protestation de sa Foy: que veut dire nostre Seigneur, & quel exemple nous monstre il, d'aller au Temple de Ierusalem sacrifier avec les Scribes & Pharisiens, & vn peuple tant depraué, comme il estoit alors? Tentens bien qu'ilz me repliqueront incontinent que Iesus C H R I S T ne montoit au Temple sinon à l'intention de redarguer les vices qui se commettoient adonc, &

Galat.4.

Ieh.4.

non pas pour participer avec les autres en leurs sacrifices, & autres protestations de leur Foy. Mais que ceste solution soit faulſe, il est facile de le monſtrer. Ce n'est pas ſans cauſe que ſainct Paul dit, qu'il a eſté aſſubietty à la Loy (i'entens touſiours I E S V S C H R I S T) à fin de racheter de la ſeruitude d'icelle tous ceux qui y eſtoient ſubiettz. Or il parle nommément de la Loy ceremoniale. Quand donc il venoit au Temple, & principalement aux feſtes ſolennelles: combien qu'il y viſt pour auoir meilleure occaſion d'aduancer l'Euangile, & de corriger la mauuiſe vie des pecheurs: touteſſois ſi ne laiſſoit il pas de ſe monſtrer obſeruateur de la Loy, en faiſant ce qui eſtoit commandé, de venir au Temple, pour adorer & ſacrifier. Ce qu'il conſerme par ſa propre bouche, parlant à la Samaritaine. Car, parlant en la perſonne de tous les Iuiſz, il dit ainſi: Nous ſauons ce que nous adorons. Vous ne ſauez que vous adorez. Car le ſalut eſt des Iuiſz. Certes il ne ſe met point à part quant à l'adoration de D I E U, laquelle emporte auſſi bien les ſacrifices: mais il ſe met au ranc commun des autres. La raiſon qu'il adiouſte donne encore plus ample confirmation de cela. C'eſt pource que le ſalut eſt des Iuiſz. Car il n'entend autre choſe par ces motz, ſinon que Dieu acceptoit le ſeruiſe qui luy eſtoit faiſt à Ieruſalem, ſeulement à cauſe de l'alliance de ſalut qu'il auoit faiſte avec ce
peu-

peuple là. Nous voyons donc, qu'un homme communiquant aux Sacremens, ordonnez de Dieu, avec les meschans, ne se contamine pas par leur compagnie, moyennant que de son costé il ait sa conscience pure & nette.

Autant en ont fait tous les Apostres : suivant l'exemple de leur Maître. Mais à fin de n'estre trop prolixes, cõtentons nous de saint Paul. Je n'allegueray pas que par tout ou il venoit, il n'a iamais fait difficulté d'entrer en la Synagogue des Iuifz, pour prier Dieu, & traicter de l'Escripture. Je n'allegueray pas semblablement, que il ne fit nul scrupule de se presenter au Temple pour y adorer Dieu, & vser de ceremonies licites & permises, avec les autres en commun, non obstant la meschanceté desesperée des Prestres & Scribes qui estoient pour lors. Non pas que cela ne face à propos. Mais pource que nous auons des probations plus claires, & moins subiettes à calomnies. C'est, qu'il se complaint, que tous ceux qu'il deuoit auoir pour adiuteurs cherchoient leur profit particulier, au lieu de l'honneur de IESVS CHRIST, & de l'aduancement de son Eglise. Toutefois nous ne lisons pas qu'il se soit separé de leur compagnie, de peur de se polluer. Item, en reprenant les vices enormes qui estoient entre les Corinthiens & Galates il ne dit pas à ceux qui en sont purs & netz, qu'ilz n'y ayent plus de communion avec

iceux,iusques à ce que tout soit bien purgé: mais se contente de les exhorter à corriger les fautes qu'il reprend, chacun en son endroit, sans parler de telle separation, que veulent introduire ces phantastiques.

1. COR. II.

Et qu'est-il mestier de disputer sur cela? puis que le mesme Apostre, en vn autre passage, traittant comment chacun se doit disposer à receuoir deuement la saincte Cene, ne commande pas que chacun examine les fautes de ses prochains: mais il dit ainsi: Que l'homme se espreuue soy mesme, & puis qu'il mange de ce pain, & boyue de ce calice. Car qui y viendra indignement, il recevra sa condamnation. En ces motz il y a deux articles à noter. Le premier est, que manger le pain du Seigneur indignement, n'est pas d'y communiquer avec ceux qui en sont indignes: mais c'est de ne se pas bien preparer en examinant si on a Foy & repentance. Le second est, que quand il nous faut receuoir la Cene, nous ne deuons pas commencer l'examen sur les autres: mais chacun se doit esprouuer. Et de fait, quand tout sera bien consideré de pres, ceux qui ont si bon loisir d'enquerir sur les autres, le plus souuent oublient de penser à leur propre cas. Il y a encore vn homme viuant, lequel estant detenu en cest erreur, qu'il craignoit de receuoir la Cene avec nous, à cause des imperfections de aucuns, se priuoit de la communion de l'Eglise.

Ce-

Cependant il auoit deux seruiteurs en sa maison d'une vie fort desbauchée & scandaleuse. Estant aduerty de cela, ie luy fis remonstrer, d'autant qu'il ne m'eust escouté pour lors, qu'il deuoit bien penser à purger sa maison, de laquelle il auoit la charge, si pensoit estre contaminé des fautes de ceux qui ne luy estoient point commis en son gouuernement. Alors il saduifa de sa folie: & print cela comme vn chastiment que Dieu luy enuoyoit, pour se moquer de sa presumption. Et ainsi se reconcilia tant à moy qu'à l'Eglise, congnoissant que le principal est de penser à soy & à sa famille: puis apres auoir esgard sur les autres, non pas pour nous retirer de l'Eglise en despit d'eux, quand ilz ne seront pas telz qu'ilz doyuent estre, mais pour les corriger & reduire, si nous pouuons, ou bien pour les faire exclurre: autrement les recommander à Dieu, à fin qu'il y mette ordre.

On pourroit repliquer, que saint Paul en la mesme Epistre reprent aigrement les Corinthiens, de ce qu'en leur congregation on ne punissoit point les vices par excommunication: & mesme defend de conuerser avec paillard, yurgne, trompeurs, idolatres & semblables. A cela ie respons, que c'est bien vn vice fort reprehensible en vne Eglise, qu'il n'y ait pas de correction sur les pechez. Je dy dauantage, que nostre Seigneur pourra bien punir tout vn peuple à cau-

se de ce seul deffaut. Et pourtant que nulle Eglise n'ayant encor la discipline d'excommunication ne se flatte: comme si c'estoit vne petite faute ou legiere de n'en point vser au besoing: mais plustost que chacune aduise en son endroit de la dresser & mettre en estat. Semblablement que chacun particulier s'y employe & y ayde de tout son pouuoir. Mais ce n'est pas à dire, qu'un particulier ait iuste cause de salier de l'Eglise, touteffoys & quantes que les choses n'y ront pas à son desir. Car il est à noter, que ceste police n'est pas en la puissance d'un membre, mais se doit exercer par le consentement de tout le corps. Pourtant saint Paul ne s'adresse pas speciallement à chacun, pour luy imputer ceste faute: mais l'impute à tout le corps. La somme est, que touchant la communion de l'Eglise, nous mettions peine que tous membres pourris ou infectz de maladie contagieuse: c'est à dire tous ceux qui sont d'une vie scandaleuse en soyent retranchez. Mais considerons ce qui est en nous: & quand nous auons fait ce qui estoit de nostre deuoir & office, si nous ne pouuons obtenir ce que nous voudrions bien & ce qui seroit à desirer, recommandons le reste à Dieu: Qu'il y vueille mettre la main comme c'est son œuvre. Cependant, combien qu'à bon droit nous soyons marris, de ne voir pas l'Eglise de Dieu en son ordre parfait: portons touteffois l'imperfecti-

fection, laquelle il n'est pas en nous de corriger. Quant à la defense que faict saint Paul de ne boyre ne manger avec ceux qui sont de vie scan-
daleuse, cela appartient à la conuersation priuée. 1. Cor. 5.
nō pas à la cōmunion publique. Mais sil n'est pas licite à l'hōme Chrestien, dira quelcun, de hanter vn meschāt, pour prendre sa refection corporelle avec luy: tant moins est il permis de māger le pain duSeigneur en sa compagnie. A cela ie res-
pons, que de hāter priuément les meschans, & auoir familiarité avec eux, il est en nostre liberté & puissance. Il nous en faut donc abstenir, chacun à son endroit. Mais de receuoir la Cene duSeigneur, ce n'est pas chose qui soit en nostre dispositiō. Et
pourtant la raison est diuerse. Notons donc, si l'Eglise tolere & endure vn hōme indigne, que celuy qui le congnoist tel, fera bien de s'abstenir de sa
compagnie priuée, & le doit faire d'autant qu'il le peut: moyennant qu'il ne face point de schisme n'y separation en l'Eglise quant à la communion publique.

Quand à la matiere d'excommunication, il en a esté parlé, autant que le passage le requeroit: sinon que ie veux bien aduertir en passant tous amateurs de verité, d'un point qui est en l'article des Anabaptistes cy dessus mentionné: à fin que sur cela ilz regardent, combien on leur doit adiouster de foy quant au reste. C'est qu'ilz disent qu'un homme qui aura failly par inaduer-

tence, sans malice delibérée, apres auoir esté admonesté deux foys en secret, doit estre chastié en public, ou excommunié. Ie leur pardonne vn erreur en cela. C'est que nostre Seigneur ne veut pas que l'Eglise procede iusque à excommunication, mesme quand le pecheur aura mesprisé deux admonitions priuées : mais veut que pour la troiziesme foys deuant que le reietter on l'admoneste publiquement. Ilz sabusent encor vne autre foys, en ce qu'ilz ne considerent point que nostre Seigneur ne parle en ce passage là que des pechez secretz. Car quant à ceux qui sont notoires & en scandale au peuple, il y a autre moyen & faceon d'y proceder, que d'en faire remonstrance secrete. Voila desia deux fautes qui monstrent bien quelz grans docteurs ce sont que les Anabaptistes, & quel espritz ilz ont pour tout reformer, veu qu'ilz ne sauroyent dire troys motz qu'en confondant tout. Mais encor ie leur pardonne tout cela, pour venir à vn poinct qui est de plus grande consequence. Car en disant que celuy qui aura peché par ignorance & non pas à son escient doit estre reietté, ilz denotent, comme aussi ilz l'enseignent & maintiennent ouuertement, que si vn homme auoit peché à son escient, il ne deuroit obtenir iamais pardon. D'autant que tout peché volontaire, selon leur phantasie est peché contre le saint Esprit, qui est irremissible. Ie dy que ceste opinion

on est vn blasphème execrable contre la grace de Dieu, & vne resuerie pernitieuse, pour mettre toutes pures ames en desespoir. Comme mesme i'en ay veu l'experience en d'aucuns, qui auoyent esté seduis pour vn temps de ceste malheureuse secte. Il est vray, que nous deuons bien penser en nous, & remonstrer aux autres, que ce n'est pas petite chose, que d'offenser Dieu à nostre escient, & de commettre quelque acte contre nostre conscience, pour prouoquer son ire contre nous. Ainsi quiconque vseroit de ces termes: encor qu'il nous aduienne apres auoir congneu Dieu, de pecher contre nostre conscience, c'est vne faute ayfée à pardonner: & nostre Seigneur n'en fait pas si grand cas, qu'il nous en faille beaucoup tormenter: il le faudroit reietter comme vn Sathan, qui nous voudroit induire par telles flatteries à vn contemnement de Dieu. Plustost meditons tousiours que ce n'est pas petit crime, de contreuenir à la sainte volonté de Dieu par rebellion & contumace, violant de propos aduisé sa iustice, & que cela est abuser trop outrageusement de la grace qu'il nous a faite. Et qu'il y a grand dangier, què l'homme, qui se deborde ainsi, ne soit mis en sens reprouué, pour s'endurcir en malice, à fin de iamais ne se conuertir. Reduisons aussi les menaces qui sont faites en l'Escripture sur telle ingratitude. Mais quand tout cela fera dict & fait, si ne faut il pas ietter

en desespoir ceux, à qui il fera aduenü d'ainfi trefbucher. Car ou en viendrons nous? Il ne sen trouuera pas à grand' peine de dix l'vn, qui se puisse vanter, de iamais n'auoir fally à son escient, depuis auoir congneu Dieu. N'est-ce pas ruiner toute l'Eglise, de les vouloir tous ietter en desespoir? Ilz diront que cela est endormir les consciences, pour les attirer à mal faire. Ie dy que plustost cestuy la sendort, qui se faict à croire que iamais ne faut que par ignorance, & qui se faict tant pur, & innocent, de iamais n'auoir eu mauuaise volonté ou mauuais propos. Considerons, ie vous prie, en combien de sortes le Diable nous tente. Si nous ne sommes surprins du tout qui est celuy si vertueux, qui ne decline quel que foys? Combien qu'il soit aduertý de Dieu, & qu'il ait le tesmoignage de sa conscience, pour le retirer au droict chemin. Ilz alleguent que tout peché contre le saint Esprit est irremissible. Ie le confesse. Mais il y a beaucoup à dire, que tout peché volontaire soit contre le saint Esprit. Car cestuy la resiste au saint Esprit, qui repugne ouuertement à la verité de Dieu, & sefforce comme par despit, tant qu'il peut, de la renuerser. Or vn hōme peut bien pecher à son escient, qui toutesfoys ne voudroit nullement faire la guerre à Dieu, n'y blasphemer contre sa parolle.

Mais nous aurons vne brieue, vuydence & facile de ceste question, remettant à Dieu la decision

cision d'icelle: c'est à dire, acquiesçant à ce qu'il en a prononcé: comme la raison le veut. Car puis qu'il s'est reserué à luy seul l'autorité de pardonner les pechez: c'est à luy aussi de determiner, quelz pechez sont remissibles, ou non. Or du commencement il a ordonné qu'entre le peuple Leuit. 2. d'Israel il y eust deux especes de sacrifices quotidiens: les vns pour les pechez volōtaires, les autres pour ceux qui seroyent commis par ignorance, adioustant la promesse, de pardonner tant les premiers, que les secondz. Que diront ces pures phantastiques à cela? Nostre Seigneur prononce, qu'il remettra les pechez volontaires à ses fideles (car les sacrifices se faisoient pour ceux qui estoient desia membres de l'Eglise) & eux ilz veulent lier les mains de Dieu, & empêcher qu'il ne face telle misericorde. S'ilz repliquent, que cela s'est fait en la Loy ancienne, & qu'il y a autre raison pour nostre temps: ceste cauillation est trop friuole. Car on fait, que la bonté infinie de Dieu n'a pas esté restraincte par la venue de nostre Seigneur I E S V S: mais plustost eslargie. Dauantage, nous sauons que les sacrifices anciens n'ont esté sinon figures, de ce qui deuoit estre accompli en I E S V S C H R I S T. Quand donc la remission des pechez volontaires est representée aux sacrifices anciens, & est dict, qu'elle sera faicte aux domestiques de la foÿ: c'est vn tesmoignage tout clair, & certain, que

les fideles obtiennent par le moyen de **I E S V S**
C H R I S T remission, non seulement de leurs
 ignorances, mais aussi des offences commises à
 leur escient. Et defaict nous en auons tant d'ex
 emples, que c'est vne grande impudence de reuo
 quer la chose en doute. Si nous prenons l'anci
 en Testament: les Patriarches, en conspirant la
 mort de leur frere, n'ont pas ignoré que ce fust
 mal faict. Ruben n'a pas contaminé le liét de
 son pere par simpleesse. Iuda estoit bien aduer
 ty, que paillardise estoit chose desplaisante à
 Dieu, & toutefois ne laissa pas d'en vser. Dauid,
 qui punissoit iournellement les malefices en ses
 subiectz, ne pouuoit pas commettre l'adultere
 qu'il commit par simple inaduertence. La mise
 ricorde que Dieu a monstrée enuers eux tous est
 elle faillie ou morte, qu'il ne la puisse aussi bien
 maintenant demonstrier? Mais nous n'auons que
 faire d'emprunter exemples du vieil Testament,
 veu qu'il y en a tant au nouueau? Saint Pierre,
 deuant que renoncer nostre Seigneur **I E S V S**,
 n'auoit il pas ouy ceste sentence? Qui me re
 noncera deuant les hommes, ie le renonceray de
 uant Dieu mon Pere. Il ne pouuoit donc pre
 tendre excuse d'ignorance. Et toutefois le Sei
 gneur Iesus luy a faict mercy. Saint Paul se com
 plainct d'aucuns qui viuoyent desordonnément
 en Thessalonique: mais il ne laisse pas d'en bien
 esperer, moyennant qu'on les corrige, pour les
 amener

Matt. 10.

amener à repentance. Ceux qui festoyent des-
bordez à dissolution & immundicité en l'Eglise
de Corinthe, & se plaifoyent tellement en leurs
vices, qu'ilz ne vouloyent escouter nulle remon-
strance, estoient bien coupables d'auoir peché
de mauuaise volonté. Toutefois le mesme
Apôstre ne laisse pas de les exhorter à se reduire,
leur reseruant tousiours espoir de trouuer grace
enuers Dieu. Autant lisons-nous qu'en a faict S.
Pierre à Simon Magus. A. A. S. Que voulons-nous
plus? Nostre Seigneur ouure les thresors de sa
grace à ceux qui auront esté surmontez par leurs
concupiscences, & combien qu'ilz congneussent
le mal: toutefois y auront decliné par infirmi-
té de leur chair. Qui sera l'homme qui ferme-
ra la porte aux pources pecheurs, & ne leur vou-
dra permettre de reccuoir la grace que Dieu leur
offre? Nous voyons donc, qu'il y a vne poison
mortelle cachée en ces motz des Anabaptistes,
quand ilz ne font autres pechez remisibles, que
ceux qui auront esté commis par inaduertence.

Pour faire vne conclusion de cest article:
il est besoing que tous Chrestiens soyent aduer-
tiz, quelle queue il tire apres soy. Car encor
qu'on iuge bien, que c'est vne rigueur trop extre-
me, de ne vouloir supporter aucun defaut en vne
Eglise: toutefois de premiere face on ne voit
pas combien ceste opinion est pernicieuse, d'au-
tant qu'on ne regarde point la consequence qui

envient. Il y a eu anciennement deux sectes d'heretiques, qui ont fort trouble l'Eglise. Dont les vns se nommoient en Grec Cathares, c'est à dire purs: les autres Donatistes, du nom de leur premier autheur & maistre. Iceux, tant les premiers, que les secondz, ont esté en vne mesme phantasie que sont à present ces pures refuseurs, de chercher vne Eglise, en laquelle il n'y eust que redire. Pourtant se sont separez de toute la Chrestienté, pour n'estre point souilleez par les imperfections des autres. Mais qu'en est il adue nu? Nostre Seigneur les a tous confonduz avec leur entreprinse tant presumptueuse. Que cela donc nous soit vn aduertissement, que quand soubz vmbre de zeile de perfection nous ne pou uons porter nulle imperfection, tant au corps, qu'aux membres de l'Eglise, que c'est le Diable qui nous enfle d'orgueil, & nous seduit par hypocrisie, pour nous faire abandonner le troupeau de I E S V S C H R I S T. sachant bien qu'il a tout gaigné, quand il nous en a retiré. Car d'autant qu'il n'y a ny remission des pechez, ny salut ailleurs: quand nous aurions au reste vne apparence de sainteté plus qu'Angelique, si par vne telle presumption nous venons à nous separer d'une compagnie Chrestienne, nous sommes faictz Diabes.

A ct. 4.

Leur troisieme article est de la reception de la Cene, en quoy ilz ne disent rien que nous
ne

ne leur accordions : comme aussi nous le preschons tous les iours . C'est que nul ne se ose approcher de ceste sainte Table, qui ne soit vrayement du corps de Iesus CHRIST, adorant vn Dieu avec tous fideles, & le seruant en vocation bonne & legitime . Mais quand ce vient à faire declaration au quatriesme article , comment l'homme se doit separer de toutes pollutions de ce monde, pour sadioindre à Dieu, en cela ilz recommencent à tout deprauer . Combien que du commencement encore ilz ont d'assez bons propos : comme en condamnant les superstitions Papales, & defendant à tous Chrestiens de se y mesler . Mais en la queue gist le venin : comme dit le Prouerbe . Car finalement ilz concluent, que tout vsage d'armes est chose diabolique . Or il est vray qu'en particulier l'vsage du glaiue ne doit estre permis à nul , pour faire resistance au mal . Car les armes des Chrestiens sont prieres & mansuetude, pour posseder leurs vies en patience, & vaincre le mal en bien faisant, selon la doctrine de l'Euangile . L'office donc d'un chacun de nous est de souffrir patiemment , si on nous fait quelque outrage , plustost que d'vsfer de force & violence . Mais de condamner le glaiue public , lequel Dieu a ordonné pour nostre protection , c'est vn blaspheme contre Dieu mesme . Voila l'Esprit de Dieu, qui prononce par saint Rom. 13. Paul, que le Magistrat est ministre de Dieu à no-

stre profit & en nostre faueur, pour reprimer & empescher la violence des meschans. Et que pour ceste cause le glaiue luy est dōné en main, à fin de punir les malefices. Puis que Dieu luy or donne de ce faire: qui sommes nous, pour l'empescher? Semblablement, puis que Dieu nous presente vne telle sauuegarde, pourquoy ne sera-il loisible d'en vser?

Dauantage, il est certain que l'intention de ces pources phantastiques est de condamner toutes munitions, fortereſſes, portz d'armes, & toutes choses semblables, qui se font pour la defense des pays: & empescher les ſubiectz d'obeir à leurs Princes & ſuperieurs, quand ilz se vouldroyent ſeruir d'eux à cela en la neceſſité. Or de reprouuer ce que nostre Seigneur n'a iamais reprouué, c'est trop entrepris à l'homme mortel. Retenons toujours cela, que c'est vſurper ſur l'authorité de Dieu, de condamner pour mauuais ce que nostre Seigneur nous a permis. Or qu'il ait iamais defendu l'vſage des armes aux Princes, pour maintenir leurs pays contre ceux qui les moleſteront à tort, l'Eſcriture ne le porte point. Il est bien vray que les Prophetes, parlans du Regne de I E S V S C H R I S T, diſent bien que les eſpées & les lances ſeront changées en inſtrumens de labeur, pour cultiuer la terre. Mais par telles formes de parler ilz ne denotent autre choſe, ſinon que toute guerre & inimitié ſera abba.

abbatue entre les fideles. Et pleust à Dieu, que l'Euangile eust tellement profité au monde, que cela se practiquast bien de tous. Mais puis que la Foy & l'amour de Dieu ne dominent pas tellement en la pluspart, que l'ambition & l'auarice ne soyent souuent superieures: quand on inuadera iniustement vn pays, & qu'on le molestera par guerres: tant sen faut que le Prince, qui est ordonné de Dieu pour la protection & defence d'iceluy, face mal de resister à la violence iniuste, qu'il est tenu de ce faire par le deuoir de son office. Bien est vray, qu'un Prince Chrestien doit chercher tous moyens de paix, estant prest de la racheter bien cher, en quittant du sien. En sorte qu'il ne vienne point à l'espée, iusques apres auoir essayé tous remedes, pour euitier ceste necessité. Mais quand il a faict tout ce qui estoit en luy, & a reculé tant qu'il a peu, sil ne peut autrement maintenir le pays qui luy est commis, le dernier refuge est d'vser du glaïue que Dieu luy a donné en main. Car il y a vne mesme raison, de desgainer le glaïue pour punir les mal-faicteurs qui troublent l'ordre publicq, & de repoulsers ceux qui iniustement viennent assaillir vn pays. En ce cas aussi l'homme Chrestien, si selon l'ordre du pays il est appelé pour seruir à son Prince, non seulement n'offense pas Dieu en prenant les armes, mais aussi est en vne vocation sainte, laquelle ne se peut reprouuer sans blas-

Luc 3.

A 4. 10.

phemer Dieu. Et de faict, nous voyons quand les gendarmes sont venuz à Iehan Baptiste pour estre instruitz, qu'il ne leur a pas commandé de jeter les armes bas, & renoncer à leur estat: mais seulement les a admonesté d'estre contens de leurs gages, ne piller & ne vexer personne, mais s'abstenir de tout malefice. Sainct Pierre baptise Corneille, qui estoit Centenier: c'est à dire, Capitaine de bande: & toutefois il ne luy commande pas de laisser son train, comme du tout meschant. Qui plus est, ayant receu le saint Esprit visiblement, il ne laisse pas pourtant le train des armes. Pour conclurre ce propos, si nous voulons tenir bon moyen à reprendre ce qu'il y a de mal & de vice aux armes, ne condamnons pas simplement le port d'armes qui se fait en l'autorité du Prince, pour la defense du pays: quand le Prince n'a autre regard qu'au bien commun de son pays, & que les subiectz de leur costé n'ont autre consideration que de sacquitter de leur devoir: mais reprenons les meschantes cupiditez qui sont causes de susciter les guerres: reprenons les cruautéz, voleries, rapines, violences, extorsions, & autres telles insolences qui se y commettent. De mesler le bon avec le mauuais, pour condamner tout ensemble sans discretion, il n'y a nul propos.

Le cinquiesme article est des Pasteurs: en quoy ilz se sont aucunement rauisez. Car ilz estoient

estoyent au parauant en ceste resuerie, que c'estoit contre DIEV qu'un Pasteur fust deputé à certain lieu: mais vouloyent que tous ceux qui seroyent en l'estat, courussent d'un costé à l'autre, contrefaisant les Apostres comme singes, & non pas comme vrais imitateurs. Mais ie pense bien qu'ilz faisoient cela pour la bonne deuotion qu'ilz auoyent que les Ministres qui enseignent fidelement leur laissassent la place vuyde, à fin de pouuoir espandre leur poison par tout. Or maintenant, soit qu'ilz recongnoissent leur erreur, ou bien qu'ilz se donnent plus de priuilege qu'ilz n'en veulét octroyer aux autres: nous sommes de bon accord avec eux, que nulle Eglise ne se peut entretenir en son estat sans Ministre: & pourtant qu'il en faut ordonner par toutes les congregations, moyennant qu'ilz recongneussent consequemment, que par tout ou il y a Ministre deuement constitué, & qui exerce fidelement son office, quiconque veut estre tenu pour Chrestien, doit adherer à luy, & vser de son ministere avec la reste du troupeau. Or que font ilz? Pource que nous ne voulons complaire à leurs erreurs, combien que nous portions la parole de IESVS CHRIST purement, nous leur sommes loupz rauissans, & nous ont en telle abomination, qu'ilz penseroient auoir offensé DIEV mortellement d'auoir ouy vn sermon de nous. Sur cela ilz créent des Ministres à la ha-

ste, pour faire separation en l'Eglise, pour distraire le peuple, & faire vne assemblée contraire à l'autre, à ce que le Nom de Dieu ne soit point inuoké en vnité & concorde, comme il doit.

Le sixiesme article du Magistrat.

Nous sommes d'accord, que le glaive est vne ordonnance de Dieu, hors la perfection de CHRIST. Ainsi les Princes & superieurs du monde sont ordonnez pour punir les mauuais, & les mettre à mort. Mais en la perfection de Christ, l'excommunication est la derniere peine, sans mort corporelle.

Or il faut noter, que c'est vne moderation qu'ilz ont faicte, pour corriger ce qu'ilz en auoyent dict au parauant, apres qu'ilz ont veu, qu'à cause de son absurdité ilz estoient reiettez de tout le monde. Car ilz ont fait cest honneur aux principautez & seigneuries, de les tenir comme briganderies. Mais voyans que cela ne se pouuoit porter, ilz ont aduisé de se retracter tout doucement, vsant de ceste belle couleur, que c'est bien vne ordonnance de Dieu, que domination terrienne, hors la perfection de Christ. Or par cela ilz denotent, que c'est vn estat illicite & defendu à tous Chrestiens: comme euxmesmes l'ex-
po-

posent puis après. Nous auons donc à regarder si ce sont choses incompatibles, que la Chrestienté & estat de iustice ou superiorité terrienne. Tellement qu'un homme pour estre l'un soit contrainct de renoncer à l'autre. Pour le premier ie demande si c'est vn estat repugnant à la vocation des fideles, d'exercer l'office du glauiue, ou de la superiorité terrienne: comment c'est que les Iuges en l'ancien Testament, item les bōs Roys, comme Dauid, Ezechias, Iosias, & mesme aucuns des Prophetes, comme Daniel, en ont vsé. De dire que ce ait esté vne imperfection vitieuse en eux, il n'y a nul propos: veu que le saint Esprit tesmoigne des Iuges, que Dieu les a suscitez pour deliurer son peuple, singulierement cela appert en Moyse, lequel ayant commandement expres eust volontiers reculé si eust peu. Mais il faut que pour obeir à Dieu il receoyue ceste charge. Quant à Dauid, son Regne est non seulement approuué de Dieu: mais loué & orné de tiltres fort honorables. Le semblable se doit estimer de ses successeurs: veu qu'il y a vne mesme raison. Il ne reste donc autre subterfuge à ces ennemiz de tout ordre, sinon de dire que nostre Seigneur requiert vne perfection plus grande en l'Eglise Chrestienne, qu'il n'a pas faict au peuple Iudaïque. Or cela est bien vray, quant aux ceremonies. Mais que nous ayons autre reigle de viure, quant à la Loy morale qu'on appel

le, que n'a eu le peuple ancien, c'est vne faulſe opinion. Ceux qui l'ont penſé, ont prins occaſion du cinquieſme de ſainct Matthieu: ou il ſemble bien aduis de prime face, que noſtre Seigneur Ieſus adiouſte quelque choſe à ce qu'il auoit deſia commandé au peuple. Mais quand on regardera ce que la Loy de Moyſe contient, & qu'on rapportera l'un à l'autre, pour en faire comparaifon, on congnoiſtra que l'intention de noſtre Seigneur I E S V S n'a pas eſté de faire addition aucune: mais ſeulement de remettre la vraye intelligence de la Loy en ſon entier, laquelle auoit eſté depraüée par les faulſes gloſes des Rabins. Tenons donc ceſte reſolution, que quant à la vraye iuſtice ſpirituelle: c'eſt à dire, que l'homme fidele chemine en bonne conſcience, & ſoit entier deuant Dieu, tant en ſa vocation qu'en toutes ſes œuvres, il y en a eu vne declaration pleine & entiere en la Loy de Moyſe: à laquelle il nous conuient ſimplement tenir, ſi nous voulons ſuyure le droit chemin. Quiconque donc y adiouſte ou diminue ſort des limites. Ainſi ceſt argument ſera ſeur & infallible. Nous ſeruons à vn meſme Dieu que les Peres anciens. Nous auons vne meſme Loy & reigle qu'ilz ont eu, pour nous monſtrer comment il nous faut gouverner, pour cheminer droitement deuant Dieu. Il ſenſuit donc, qu'une vocation laquelle a eſté lors ſaincte & legitime, ne peut eſtre reprouüée
entre

entre les Chrestiens. D'autant que la vocation est la principale partie de la vie humaine, & qui emporte plus deuant Dieu. De là il sensuit que nous ne deuons exclurre d'entre nous l'estat de iustice ciuile, ny le chasser hors de l'Eglise Chrestienne: puis qu'ainsi est que nostre Seigneur l'a ordonné & approuué comme bon au peuple d'Israel: & y a constitué ses plus excellens seruiteurs & mesme ses Prophetes.

Ilz repliqueront possible, que tout ce gouuernement ciuil du peuple d'Israel estoit vne figure du Regne spirituel de IESVS CHRIST, & pourtant qu'il n'a duré que iusque à sa venue. Le leur confesse bien, qu'en partie il a esté figure: mais qu'il n'ait esté autre chose, ie leur nye: & non pas sans raison. Car ce a esté de soy mesme vn gouuernement politique, comme il est requis qu'il y en ait en tous peuples. Qu'ainsi soit: il est dict de la prestrie Leuitique, qu'elle deuoit prendre fin & estre abolie à l'aduènement de nostre Seigneur Iesus. Ou est-ce que cela est dict de la police externe? Il est vray, que le sceptre & le gouuernement deuoit estre osté de la lignée de Iuda, & de la maison de Dauid: mais qu'il n'y deut plus auoir gouuernement aucun, cela est manifestement contre l'Escripture.

Mais pour ne laisser nul scrupule de cela, nous auons bien vne probation encor plus euidente & expresse. Car quand il est parlé du Re

gne de IESVS CHRIST par les Prophetes, il est dict que les Roys viendront pour l'adorer & luy faire hommage. Il n'est pas dict qu'ilz se deposeront de leur estat pour estre Chrestiens: mais plustost qu'estans constituez en dignité Royale, ilz serôt subiectz à IESVS CHRIST, comme à leur Seigneur souuerain. Suyuant cela, Dauid les exhortant de faire leur deuoir, ne leur commande pas de ietter leurs Diademes ou leurs sceptres bas: mais seulement de baïser le Filz: c'est à dire de luy faire hommage, pour luy estre subiectz en dominant sur les autres. Vne fois il parle du Regne de nostre Seigneur Iesus. Il admoneste tous Roys & superieurs d'estre sages, & de penser bien à eux. Quelle est ceste sagesse? Quelle leçon est-ce qu'il leur baille? De plaquer tout? Nenny: mais de craindre Dieu, & donner honneur à son Filz. Qui plus est: Esaie Prophetise, que les Roys seront comme Peres nourriciers de l'Eglise Chrestienne, & que les Roynes l'alaitteront de leurs mammelles. Je vous prie, comment s'accorde il, que les Roys se ront protecteurs de l'Eglise Chrestienne, & que leur estat ne puisse consister avec la Chrestienté? Si nostre Seigneur leur donnoit seulement lieu entre son peuple: comme il faict aux Prophetes precedentz: il suffira desia pour approuuer nostre intention. Maintenant qu'il leur assigne vn lieu tant honorable en la compagnie de son peuple, qu'il

Psal.

Esa. 60.

qu'il leur faiſt, dy-ie c'eſt hōneur, que de les ordōner protecteurs de ſon Eglise: quelle impudence eſt-ce de les en exclurre du tout? Concluons donc, que les Princes ſeruans à D I E V peuuent bien eſtre Chreſtiens, veu que noſtre Seigneur leur donne vne telle preminence en la Chreſtienté.

Et deſaiſt, ce ſeroit vne choſe trop abſurde, qu'une telle vocation fuſt tant magnifiée & exaltée de D I E V, ſi elle empeſchoit vn homme d'eſtre ſeruiteur de D I E V. Saint Paul exhorte vn chacun Chreſtien de perſiſter en la vocation en laquelle il aura eſté appellé. Tous bergiers & laboureurs des champs, tous mechaniques, & autres ſemblables doyuent eſtimer leur eſtat eſtre ſainct, & qu'il ne les empeſche nullement, quant à la perfection Chreſtienne. Regardons maintenant lequel eſtat eſt plus approuué de Dieu, d'un conducteur de beſtes, ou d'un gouverneur de peuple: & non ſeulement approuué: mais auſſi priſé, comme digne & excellent entre les autres. Je laiſſeray beaucoup de teſmoignages qui ne ſeroient pas impertinens à ce propos: ſeulement à cauſe de briueuté. Et auſſi qu'un ſeul ſuffira pour tous. Voudrions nous plus grande louange d'un eſtat, que quand par la bouche de Dieu meſme il eſt nommé diuin? Si donc ce tiltre eſt donné à l'eſtat des Princes: qui oſera dire qu'il ſoit indigne d'un homme fidele?

Or il y a dauantage. Car nostre Seigneur fait ceste grace aux Princes, de les appeller dieux: & ce non pas à cause de leurs personnes: mais en consideration de la dignité ou ilz sont. Nostre Seigneur Iesus rend la raison, que c'est pource que Dieu les a là commis & leur a donné telle charge. Il m'est bien aduis que nostre Seigneur ne sauroit donner plus expres tesmoignage de l'approbation de quelque estat, que quand il communique son nom à l'homme qui est constitué en iceluy, comme fil l'appelloit son lieutenant, qui represente sa personne. Parquoy ie conclus, que quiconque desprise ceste vocation tant honorée de Dieu, blaspheme contre la maiesté celeste d'iceluy. Ilz me respondront, que ce n'est pas le despriser, que de le faire inferieur à la perfection Chrestienne. Mais ie replique qu'ilz n'en sauroient parler avec plus grande contumelie. Car en disant qu'il ne conuient pas à la Chrestienté, ilz le reiettent comme profane. Ie ne me soucie de ces belles couleurs, par lesquelles ilz couurent leur blaspheme, en disant que c'est vne ordonnance de Dieu. Car le tout gist en cela, assauoir si c'est vn office saint, & qui puisse estre exercé par les fideles: ou bien si vn homme en approchant d'iceluy en est pollué. Or ilz disent que quiconque est assis en chaire de Iustice ne merite d'estre reputé Chrestien, pource que l'office du glaue n'a point lieu en la Chrestienté.

Quand

Quand il n'y auroit que ce que dit saint Paul, il y a bien pour contenter tous ceux qui voudront acquiescer à raison. Il prononce que les Princes sont ministres de DIEU; & que le glaive leur est donné de Dieu en la main, pour la conservation des bons, & pour punir les mauvais. Sur cela ces pures phrenétiques glosent, qu'il est bien vray, qu'ilz sont ordonnez de Dieu, mais qu'il n'est pas licite à vn fidele de s'en mesler.

C'est autant comme qui diroit: Je confesse que cest ouvrage est commandé de Dieu. Mais nul ne le peut faire en bonne conscience. Et mesme quiconque le fera renoncera Dieu. Je vous prie, vn homme qui auroit vne seule once de ceruelle parleroit-il ainsi? Mais qu'ilz me respondent à ce mot. Puis qu'ilz ne font nul doute, que tous mestiers qui sont pour servir à l'vtilité commune du genre humain, ne soyent licites & saintz, pourquoy ilz excluent de ce nombre la vocation des Princes, laquelle passe toutes les autres? Comme pour exemple. Ilz ne nieront pas qu'un Chrestien ne puisse estre cousturier ou cordonnier. Et toutefois ces mestiers n'ont pas tesmoignage expres en l'Ecriture. Pourquoi donc est-ce, qu'ilz ne permettent aussi bien à vn Chrestien d'estre homme de iustice, veu que cest estat a si ample approbation avec louange de la bouche de Dieu? Dieu prononce, que les Princes & tous superieurs sont ses ministres, &

qu'il les a constituez pour estre tuteurs des bons & innocens, & chastier les meschans: & qu'en ce faisant ilz executent son œuvre, qu'il leur a commis en mains. Qui est ce qui cōtraint ces phrenetiques à faire ceste addition, que les Magistratz en seruant à Dieu sont forcloz de la compagnie des Chrestiens? Ce qui ne fera pas en vn bourreau de chiens, par leur confession.

1. Tim. 2.

J'allegueray encore vn passage: & puis la fin. Sainct Paul voyant que de son temps la plus part des Princes estoient ennemis mortelz de l'Euangile, & que cela pouuoit indigner les fideles, pour ne leur porter guere bonne affection, commande à Timothée qu'on ne laisse point de faire prieres solennelles pour eux en l'Eglise adioustant pour raison, que Dieu veut que tous soyent sauuez, & viennent à la congnoissance de verité. Il n'entend pas que Dieu vueille amener à salut, & par consequent à la congnoissance de son Euangile, tous les hommes de la terre, depuis le premier, iusques au dernier: mais il entend tous estatz: pource qu'il pouuoit sembler, que cest estat des Princes, duquel il parloit, estoit comme reiecté & maudit, d'autant que tous persecutoyent l'Euangile. Or si cela eust esté, c'estoit chose superflue & follie de prier pour eux. Recueillons maintenant de ces motz de l'Apostre, ce qui sen peut clairement tirer & desduire. Si Dieu veut amener les Princes à la congnoissance de

ce de verité: en quelle autorité les Anabaptistes les repoulseront-ils? Si quelcun me replique, que les Princes se pourront bien cōuertir à Dieu, mais en laissant leur dignité: cela est vne calumnie trop patente. Car saint Paul ne dit pas qu'ilz renonceroient à leur principauté, pour deuenir Chrestiens. Et mesmes les parolles, dont il vse, ne pourroyent nullement consister avec telle euasion. Car s'il falloit qu'un Prince abandonnast sa dignité, pour deuenir Chrestien, il sensuyuroit que cest estat là demeureroit priué de la grace de Dieu, comme indigne & reprouué.

Mais ilz pensent bien auoir des obiections inuincibles, pour excommunier de l'Eglise, & de toute esperance de salut l'estat des Princes, en alleguant quelques passages mal entenduz, lesquels ilz destournent impudemment à ce propos. Ilz alleguent premierement, que nostre Seigneur Iesus n'ordonna pas que la femme qui auoit esté surprinse en adultere fust lapidée, comme la Loy de Dieu le portoit: mais qu'il vfa enuers elle de misericorde, disant: Va, ne peche plus. Deuant que respondre, ie leur demande vne question. Ilz disent que l'excommuniement a succédé au glauiue materiel en l'Eglise Chrestienne: tellement qu'au lieu qu'on punissoit autrefois vn crime par mort, il se doit à present punir en priuant le delinquent de la compagnie des fideles. Je leur demande donc comment ilz

Ieh. 8.

excuseront IESVS CHRIST en ce qu'il a fait. Car il n'a pas obserué leur reigle: ne condamnant la femme non plus à estre bannie de la congregation sainte, qu'à mourir. Par cela voit on desia, comme ce sont pources éceruelez parlans sans raison. Ie viens maintenant à la vraye solution, qui est bien facile. Il est à noter, que ces pources bestes suyuent en ce passage l'exposition dont les Prestres Papistiques ont tresbien fait leurs choux gras. Car pource que le mariage leur estoit defendu, ilz ont voulu auoir pour recôpense cōgé de paillarder. Ainsi ont emprunté les femmes de leurs voisins. Or à fin qu'il ne semblaist que ce fust vn si grand peché qu'adultere, ilz ont dict, que nous estions soubz la Loy de grace, quant à ce cas. Et n'ont quasi recongneu la grace de Iesus Christ en autre chose, que pour laisser les adulteres impuniz. Ces pources gens, comme j'ay dict, les ensuyuent, & en aduiuent selon la sentence de Iesus Christ, que quand vn aueugle conduit l'autre, tous deux tombent en la fosse. Or il est certain, que nostre Seigneur n'a rien voulu changer de la police, ou de l'ordre ciuil: mais sans y rien deroguer a fait l'office, pour lequel il estoit venu au monde: assauoir de pardonner les pechez. Car il n'a pas esté enuoyé de Dieu son Pere, pour exercer l'office d'un iuge terrien: mais pour racheter le monde par sa mort, & testifier par la predication de l'Euangile

Matt. 15.
Luc 6.

le la grace de ceste, redemption, & semblablement tous les biens que nous receuons par luy. Comme nous voyons qu'il promet au brigand de le receuoir en son paradis: & toutefois icy luy ne laisse pas de porter la peine de son malefice. C'est donc vne mesme absolution qu'il fait à la femme & au brigand. Mais la iustice terrien ne punit le brigand: la femme sen retourne impunie, pour ce que les iuges se sont retirez de honte. En somme, l'acte qu'a faict nostre Seigneur enuers la femme adultere, n'est autre que celuy que font aujourd'hui ses seruiteurs, & ministres de sa parolle enuers tous malfaiteurs. Car ilz mettront seulement peine de les exhorter à repentance, & se retourner au droit chemin, puis apres de les consoler en leurs consciences, leur presentant la grace de nostre Seigneur *Iesus*, & les asseurant de la remission des pechez. Ilz n'entreprendront pas de les punir. Car ce n'est pas chose qui leur appartienne. Mais cependant ilz n'empescheront pas la iustice d'y mettre la main. Le tout est, que nous sachions l'office de nostre Seigneur *Iesus*: & alors nous ferons hors de toute difficulté. Son office est de pardonner les pechez, & adresser sa parolle aux consciences des pecheurs. De faire les punitions corporelles, il ne sen mesle pas: mais laisse ce la à ceux qui en ont l'autorité, & ausquelz la charge en est commise: suyuant ce qu'il dit enu

lieu: Rendez à Cesar, ce qui est à Cesar.

Mat. 22.

Luc 12.

1. Cor. 6.

D'une mesme ignorance procede la seconde allegation qu'ilz font. **I E S V S C H R I S T**, disent-ilz, n'a pas voulu faire le partage entre les deux freres. Il sensuit donc qu'un Chrestien ne se doit entremettre des querelles ciuiles, pour en iuger. Premièrement, saint Paul permet aux Chrestiens de faire ce que **I E S V S C H R I S T** a refuse en ce passage là: c'est d'appoincter amiablement les differens qui suruiendront entre les fideles, pour les biens terriens. Car apres auoir repris les Corinthiens de ce qu'ilz plaidoyoit deuant des Iuges Payens: & que par ceste occasion le Nom de **D I E U** estoit blasphemé, il leur remontre combien il seroit meilleur qu'ilz vuydassent leurs controuersies par arbitrages, elisant Iuges d'entre les fideles, pour decider leurs procez. Et mesme fait cest argument, que puis que nous iugerons les Anges, par plus forte raison nous sommes bien capables de iuger des choses terriennes. Si nous deuons, à l'exemple de **I e s u s C h r i s t**, refuser tous arbitrages & iugemens, saint Paul feroit mal de nous induire à cela. Or il est certain, que c'est le saint Esprit qui parle par sa bouche. On voit donc comment ces estourdis blasphement Dieu, en voulant condamner ce qu'il approuue. Dauantage, si n'est licite à un homme Chrestien de s'entremettre aucunement de vuyder les querelles touchant les possi-

feſſions, heritages, & autres biens ie demande à ces bons Docteurs, que deuiendra le monde. Car il n'eſt pas poſſible que les hommes ſe maintiennent contractant enſemble comme la neceſſité humaine le requiert, qu'il n'y ſuruiennent quelqueſois des doubtes, lesquelles requerront vn moyennneur pour les decider, ſoit Iuge, ſoit arbitre. S'ilz diſent qu'entre Chreſtiens cela n'aduiendra pas: c'eſt vne reſuerie. Veu que meſme deux hommes de bonne conſcience, ſelon l'infirmité qui eſt en noſtre nature, pourront cheoir en quelque different. Comme nous ſommes aueugles en noſtre propre cas: chacun penſera auoir bon droit. Si vn homme Chreſtien ne doit toucher à leur controuerſie, pour les mettre d'accord par arbitrage: quelle conſuſion aduiendra il en la fin? Par cela il eſt facile à voir que ces malheureux phantaſtiques ne pretendent à autre but, que de mettre tout en deſordre, faire vne communauté de biens telle que celuy qui en pourra auoir ſoit le bien venu. Combien qu'ilz le nient fort & ferme. Mais qu'on oſte tous iugemens & arbitrages du monde, ſelon leur intention & ſelon ce qu'ilz cōmandent eſtroictement, qu'aduiendra il, ſinon vne briganderie desbordée? Ou bien ilz ſeroyent bien contents d'auoir perſuadé à tous Seigneurs & gens de iuſtice, de leur faire quitter leur place, pour ſucceder & ſe mettre dedans comme en poſſeſſion vuyde.

Quoy donc, diront-ilz, nostre Seigneur IESVS auroit il refusé de faire vne œuvre bonne & sainte? Escoutons sa responce: & ceste question sera solue. Qui m'a, dit-il, constitué Iuge ou faiseur de partages entre vous? Il ne dit pas que ce soit chose illicite: mais seulement il allegue, qu'il n'est pas ordonné en ceste vocation. Et de fait, ce eust esté obscurcir l'office pour lequel il estoit venu au monde, si se fust occupé en ces choses là. Pourtant si nous voulons bien faire nostre profit de cest exemple, pour le bien ensuyure, prenons la reigle que nous baille saint Paul, que chacun regarde à quoy il est appelé: & d'autant que nous sommes vn corps en nostre Seigneur, que le bras n'entreprenne point sur l'œil, ny la main sur le pied. Et pour conclurre en peu de parolles, Je demande si faire partages n'est pas chose licite entre les Chrestiens: ou bien si tout doit estre confus? Car si est permis de partir les heritages: celuy qui se messera de les partir ne fait rien digne de reprehension. Voire moyennant qu'il soit constitué à cela.

Ces ennemiz de police font apres vn autre argument. IESVS CHRIST s'est retiré en la montaigne, & s'est caché, quand on le vouloit faire Roy. Il senfuit donc, que si vn Chrestien estoit eleu en l'estat de iustice, il ne le doit nullement accepter: mais senelongner à l'exemple du Maistre. J'ay quasi honte de raconter des
cho.

choses tant friuoles. Mais puis que ie voy que les simples & rudes en sont seduiz, ie suis contrainct d'aduerdir comment ilz sen pourront depeschier. Chacun fait la folle phantasie qu'auoyent les Iuifz du Messias : c'est qu'il leur estoit aduis qu'il auroit son Regne florissant en ce monde, pour les faire viure en ce monde à leur aise, & en bon repos, & pour les faire triompher. Tellement que les Apostres mesmes, iusques apres sa resurrection, auoyent bien ceste phantasie en leur teste: comme saint Luc monstre au premier des Actes. Voila qui meut le peuple de vouloir faire I E S V S C H R I S T Roy par force, à fin qu'il fust affrâchy par ce moyen de la subiection des Romains. Pourtant ce n'est pas merueille si nostre Seigneur se cache: veu que cela procedoit d'un erreur mauuais & peruers, & tiroit vne consequence fort pernicieuse. Il est certain que son Royaume n'est pas charnel ny de ce monde: mais spirituel, & qui consiste en choses non appartenantes à la terre. Or quel Royaume luy vouloit on donner? Si donc il eust obtemperé à la folie du peuple, n'eust-il pas confermé l'erreur qui estoit desia par trop enraciné? N'eust-il pas aussi par ce moyen enseuely sa grace & sa vertu? d'autant qu'on n'eust rien imaginé de luy que charnel. Dauantage il eust esté mis par sedition, & de ceux ausquelz il n'appartenoit pas. Car puis que Iudée estoit en la subiection de l'Empi-

Prouer.8.

re Romain, le peuple n'auoit pas liberté d'elire vn nouveau Roy à son plaisir. Ainsi pour ses causes I E S V S Christ a refusé d'estre Roy, & non pas pour reprouuer l'estat comme meschant, ou repugnant à la vie Chrestienne. Mais cependant il est dict que c'est par luy que les Roys regnent: que c'est luy qui donne la grace aux gens de iustice, de faire loix & statutz, & gouverner les peuples en equiré. Que voulons nous plus? I E S V S Christ n'est pas Roy en sa personne: mais il est le protecteur de tous Royaumes, comme il les a fondé & institué.

Luc 22.

Mais ces phantastiques repliquent, qu'il nous a commandé aussi bien de faire le semblable, en disant à ses Apostres: Les Roys des peuples dominant sur iceux: mais de vous il ne sera pas ainsi. Le leur confesse, que ce n'est pas tout vn voirement, de l'office des Apostres, & des principautez terriennes: & qu'en iceluy il n'y a point de domination. Or I E S V S Christ n'a voulu autre chose, sinon discerner l'vn de l'autre. Car le commencement du propos vint de ce que les Apostres auoyent contention desia entre eux lequel seroit le plus grand, & comme gouverneur des autres au Royaume de Iesus Christ. Pour oster vne telle ambition, il leur remonstre que son Royaume est spirituel: & pourtant qu'il ne gist pas en hautesse mondaine, ny en pompe, ny en seigneurie: mais que toute la préeminence qu'ont

qu'ont les Ministres & officiers, est de seruir. Puis donc que ce passage ne parle pas si les Roys peuuent estre Chrestiens ou non: mais seulement dit, que les Apostres & Ministres de l'Eglise ne seront pas comme Roys, pour dominer: c'est vne grand' bestise d'inferer de là, que Iesus Christ nous ait defendu toute superiorité. C'est autant comme qui diroit: Il n'est pas licite à vn Roy de faire l'office d'un Ministre, auquel il n'est pas appellé. C'est donc vne chose mauuaise & illicite que l'estat d'un Ministre. Je vous prie, la distinction & difference des estatz fait elle que l'un soit à condamner, pource que l'autre est loué & prisé? Que les Roys donc se contiennent entre leurs limites, & les Pasteurs spirituelz semblablement se contentent d'exercer leur office, sans v-surper ce qui ne leur conuient point: & tout ira bien. Et nostre Seigneur I E S V S approuuera les vns & les autres. C'est donc mal exposé à ces phantastiques, de dire que la puissance du glaive est defendue en ce passage.

Ilz alleguent pareillement, pour assembler gros mōceau de tesmoignages, ce que dit saint Paul: que ceux que Dieu a preueu, il les a preor-
 donnez à estre faictz conformes à l'exemple de son Filz. Je leur accorde, que suyuant l'exhortation que fait là saint Paul, il nous conuient porter la mortification de Iesus Christ en noz corps, & endurer les tribulations & miseres, par les-

Rom. 8.

quelles Dieu voudra nous esprouuer. Mais s'enfuit il de cela, qu'un fidele ne puisse gouverner un peuple qui luy sera commis? Ilz disent que ouy, pource que Iesus Christ a souffert, & non dominé. Quant au premier, qu'il a souffert, ie dy qu'aussi a Dauid: en la personne duquel les passions & souffrances d'iceluy ont esté prefigurées. Et toutefois ce n'est pas à dire qu'il n'ait dominé. Ilz adioustent donc du leur ceste seconde partie au texte de saint Pierre, le falsifiant meschamment, pour decevoir les pources simples gens. Car ilz font à croire en leur liure, que saint Pierre parle ainsi, & il n'en est rien. Voila donc Dauid qui a esté Roy, administrant la puissance du glaive. Et neantmoins il n'a pas esté empesché par cela de souffrir, pour estre fait conforme à l'image de Iesus Christ, voire iusques à le representer. Suyuant cela, quand saint Philippe deuoit baptiser l'Eunuque, qui estoit l'un des gouverneurs du Royaume d'Ethiopie, il ne luy impose pas ceste condition de ne plus dominer: mais seulement luy demande s'il croit de tout son cuer en Iesus Christ: & le laisse en son estat comme il estoit. Et de fait, si c'est chose contraire à l'homme Chrestien de dominer, cela sera aussi bien vray sur un homme que sur un peuple. Or est-il ainsi que saint Paul a permis aux Chrestiens la superiorité & domination sur leurs serfs, qui estoient alors comme esclaves: & ne leur

A. 8.

I. Cor. 7.

leur a pas commandé de quitter ce droit : mais seulement d'en vser modérément: traictans leurs serfz gratieusement & avec humanité. Qui plus est, il a bien souffert à Philemon, le quel il appelle son compaignon, de retenir son serf en sa puissance: seulement il luy a recommandé de le traicter humainement. Nous voyons donc, encores qu'il fust expressement dit que Iesus Christ n'a pas dominé, combien c'est sotement arguer, de dire Iesus Christ a souffert, & non dominé. Pour tant toute domination est reprouuée. Car c'est autant comme qui diroit: Iesus Christ n'a point eu pour reposer seulement son chef, comme il le testifie. C'est donc mal faict à vn Chrestien de posseder ne maison, ne iardin, ny aucun heritage. Or c'est vn argument trop exorbitant de raison, comme chacun voit.

Philemon.

Luc 9.

En la fin, comme vn yurongne, apres auoir bien rotté, desgorgé le villain brouet qui luy charge l'estomac: ainsi ces malheureux, apres auoir detracté de ce sainct estat que nostre Seigneur a tant hōnoré, vomissent finalement à pleine gorge des blasphemes beaucoup plus desordonnez. Le gouuernement, disent-ils, des Magistratz est selon la chair: & celuy des Chrestiens selon l'Esprit. Il me semble aduis que i'oy le Pape Syrice blasphemant contre le sainct mariage. Car il vse de ces propres termes. Mais ce n'est encore rien au pris de ce qui sensuit. L'habi-

tation des Magistratz, disent-ilz est permanente en ce monde. Celle des Chrestiens aux cieux. Et choses semblables. Je vous prie, au Nom de DIEU, tous vrayz fideles, & vous admoneste de bien considerer ce qu'ont dict saint Pierre & saint Iude d'aucuns corrupteurs, qui desia de leur temps peruertissoyent la Foy des simples: & faire comparaison de leurs parolles, avec les propos que ie viens de reciter des Anabaptistes. Je ne vous dy autre chose, sinon que chacun verra, qu'en ce poinct l'une des sectes ne differe en rien d'avec les autres. Mais pource que chacun n'a pas les liures en main, j'adiousteray icy les passages. Le premier dit ainsi: Ilz seront audacieux & hautains, mesprisans les seigneuries, & n'ont point de honte de blasphemer contre les dignitez, semblables aux bestes brutes, vituperans les choses qu'ilz ne congnoissent. Et saint Iude. Ilz reiectent, dit-il les seigneuries, & blasphemement contre les dignitez. Or Michel Archange, plaidant du corps de Moyse contre le Diable, n'osa point prononcer sentence de vitupere contre luy: mais dict: Que DIEU te reprime Satan, Quand à ceux cy, ilz detractent de tout ce qu'ilz ne congnoissent: & ce qu'ilz apprehendent par leur sens naturel, comme bestes brutes, en cela ilz se corrompent. Voila les mortz des Apostres: lesquelz competent si proprement à noz Anabaptistes d'aujourd'hui, qu'il semble bien aduis

2. Pier. 2.

Iude

aduis qu'elles ayent esté dictes d'eux par expres. De ce qu'ilz disent, que l'habitation des Princes est permanente au monde: combien de foys Dauid les dement il en cela, protestant que sa meditation estoit totalement à tendre & aspirer à la vie spirituelle? Il est bien certain, qu'aussi les autres bons Roys ont fait le semblable. DIEU commande à Daniel d'exercer son office de gouuernement terrien en la court du Roy de Perse, en attendant les choses qui luy auoyent esté reuelées, & finalement le iour de la resurrection. Et moyse, Prince des Prophetes, n'a pas laissé d'auoir sa conuersation au ciel en esperance & desir: combien que cy bas il eust le gouuernement ciuil du peuple. Je metz donc en barbe aux Anabaptistes Moyse, Dauid, Ezechias, Iosias, Ioseph, Daniel, tous les Roys & Iuges d'Israel, à ce qu'ilz maintiennent leur cause: assauoir filz ont esté bannis du Royaume de Dieu, pour auoir eu la charge du glaue en ce monde. En ce qu'ilz disent, que toutes les sollicitudes des Princes sont de ce monde, Esaie leur repugne bien, promettant que les Roys terriens seruiront à maintenir le Royaume celeste & spirituel de Iesus Christ. Sainct Paul aussi en exhortant qu'on face prieres pour tous qui sont en estat de préeminence, à fin que nous menions vie paisible soubz eux, avec la crainte de Dieu, & sainte vie. En quoy il demonstre, que la principale fin des Magistratz

Isa. 60.

1. Tim. 2.

n'est pas d'entretenir leurs subiectz en paix selon la chair:mais plustost de procurer que Dieu soit seruy & hōnoré en leurs pais,& que chacun mēne bonne & honeste vie. Nous voyons donc quant à ce poinct, combien faulses & peruerſes ſont les allegations des Anabaptiſtes,pour condamner la vocation des Magiſtratz, que Dieu a ſi bien approuué.Meſme nous voyons comment le Diable parle par leurs bouches, à fin de deſtourner les Princes,& les empescher de faire leur deuoir.Car au lieu qu'on les doit exhorter à ſapliquer & mettre peine, que le Nom de Dieu ſoit exalté,& qu'il regne par deſſus,eux,tellement qu'ilz ne ſoyent que ſes vaffaux & officiars:ceux cy veulent faire à croire, que cela ne leur attouche en rien,& qu'ilz ne ſe doyuent aucunement meſler ny empescher de l'honneur de Dieu.Touchant de la fin ou ilz pretendent, ie n'en diray que deux motz.Qu'ilz ſe mōſtrent en cela ennemis de Dieu,& du genre humain. Car c'eſt faire la guerre à Dieu,de vouloir mettre en vitupere ce qu'il a hōnoré,de vouloir fouler aux piedz ce qu'il a exalté. Et on ne ſauroit mieux machiner la ruine du mōde,& introduire comme vne briganderie par tout,qu'en taſchant d'abolir le gouuernement ciuil,ou la puissance du glaïue.Laquelle eſt bien miſe bas,ſil n'eſt licite à vn homme Chreſtien de l'exercer.

Le septiesme article du serment.

Nous sommes venuz à cest accord touchant le serment, que c'est vne confirmation qui se doit faire seulement au nom de Dieu, & en verité, non pas en mensonge, selon le commandement de la Loy. Mais aux Chrestiens tous sermens sont defenduz par nostre Seigneur Iesus Matt. 5.
CHRISTS.

Il semble bien de premiere face, qu'il n'y ait rien de mal en cest article. Nous voyons le monde aujourdhuy fort desbordé en iuremens. Il n'y a nul bon cueur qui ne soit fasché, de voir ainsi le nom de Dieu en mespris. Cela faiet que tout serment, quel qu'il soit, est rendu odieux. Dauantage, il y a quelque apparence, qu'en ces parolles de nostre Seigneur Iesus, qu'ilz alleguent, tous sermens en general, sont defenduz. Voire qui ne regarderoit de pres au sens. Mais quant au premier, il est vray qu'une telle dissolution & licence tant enorme & deprisée, qui est aujourdhuy au monde en matiere de sermens, nous doit fort desplaire. Et seroit beaucoup meilleur, de ne iurer nullement, que de iurer ainsi legierement à tout propos, ou plustost sans propos. Toutefois nous auons à noter, que le moy

en de reprendre & corriger vn abus, n'est pas de le meller & confondre avec le bon vsage, pour condamner indifferemment l'vn&l'autre ensemble. Il y a auiourdhuy vne pompe & superfluité fort excessiue entre plusieurs au boire & au manger: principalement en leurs banquetz. L'yron gnerie, qui est vn vice fort deshoneste & vilain, regne à present en beaucoup de gentz. Si pour reprendre ces abuz quelcun condamnoit totalement l'vsage du vin, & de toutes bonnes viandes: ne seroit-ce pas blasphemer Dieu, d'ainsi vituperer & reprouuer les bonnes creatures, qu'il a destinées à nostre vsage? Autant ou plus en est-il du serment. Le Seigneur l'a ordonné, pour confermer & ratifier la verité, quand il en est besoing. Vne telle faceon de iurer reuient à son honneur doublement. C'est que par ce moyen la charité sentretient entre les hommes, & la verité, qu'il a en singuliere recommandation, est maintenue: & entant qu'on l'allegue pour seul tesmoing de la verité, on luy rend en ce faisant vne des principales louanges qu'il requiert. Et de fait, il denote en la loy, que le serment vray & legitime est vne espece de l'honneur, qui luy est fait par son peuple. Car tout ainsi qu'il commande qu'on l'dore & qu'on l'inuoque luy seul: aussi il commande qu'on iure par son nom, Et les Prophetes criant contre l'idolatrie, font souuent mention, qu'on a iuré par les dieux

dieux estranges: comme au contraire en voulant signifier que le seruice de Dieu sera remis en son entier, ilz disent qu'on iurera par son nom.

Voicy donc la droite faceon de bien traiter du serment. Pour le premier, il faudroit monstrer, que l'vsage en est double, assauoir pour rendre tesmoignage des choses passées & ia faites: & pour nous obliger au temps aduenir de faire ce que licitement on peut requerir de nous: apres il faudroit remonstrer, que iurer est appeller Dieu en tesmoing: & pourtant qu'il nous conuient monstrer en cest endroit, quelle reuerence nous portons à son nom. De là il sensuit, que iamais l'homme ne doit ouurir la bouche pour iurer, sinon avec crainte de Dieu, en singulier honneur & humilité. Ainsi par ce moyen toutes ces formes de blasphemes où le nom de Dieu & de Iesus Christ est prins contumelieusement, seroyent tresbien reprouuées. Il faudroit plus outre monstrer, en combien de sortes le nom de Dieu est prins en vain: & premierement detester les pariures & faulses attestations, comme blasphemes execrables: d'autant que la verité de Dieu y est conuertie en mensonge: d'autant que toute sa gloire y est renuersée, & qu'on le veut quasi contraindre de se renoncer soy-mesme. Consequemment remonstrer quel mespris c'est de Dieu de prendre son sacré nom à la volée, comme par plaisir, ou pour farder nostre

language, ou pour vn remplage superflu ou par cholere, ou par risée & ioyeufeté: & reprendre ce vice d'autant plus asprement, que nous le voyons auiourdhuy enraciné au mode, & que la coustume en est si ordinaire. D'autre part il faudroit taxer les superstitious, par lesquelles le nom de Dieu a esté pollué, quand on a prins indifferement les noms des sainctz, pour les mesler avec iceluy. En ceste maniere le serment non seulement n'emporteroit nulle profanation du nom de Dieu: mais seruiroit grandement à son honneur. Car quand la fin seroit telle: qui oseroit dire que ce fust chose vitieuse & mauuaise? La somme est, que le monde soit aduertty, que Dieu n'a rien plus en recommandation que la gloire de son nom, pour la maintenir en son entier, & punir ceux qui l'auront obscurcie, ou amoindrie. Pourtantque nul ne doit prendre son nom, que en grande reuerence, pour le faire seulement seruir à telle fin, qu'il en soit glorifié.

Mais les Anabaptistes se iettantz aux champs à l'estourdie, condamnent tous sermens sans exception: sans discerner sil y a bien, ou mal. Et pourtant il appert que leur dire n'est nullement fondé en raison. Venôs maintenant à l'authorité: assauoir silz ont quelque tesmoignage de la parolle de Dieu. Ilz font bien vn grand bouclier de ces parolles de nostre Seigneur Iesus, ou il defend de iurer du tout. Car de là ilz concluent, que n'a
tord,

tord, n'à droit, il n'est licite de iurer. Pour responce, ie leur demande premierement, filz pensent que IESVS CHRIST ait voulu adiouter à la Loy de Dieu son Pere, ou fil l'a voulu simplement interpreter? Ilz disent quant à cela, qu'il a enseigné la perfection de la Loy. Mais ie insiste plus outre, & demande si ceste perfection n'auoit iamais esté congneue auparauant? Car filz respondent que non: ie dy que c'est vn menfonge euident. Moysé apres auoir publié la Loy, protesta au peuple, qu'il luy auoit montré la voye de vie, & la voye de mort. Item, reduisant le tout en vn brieu sommaire, il dit que sa doctrine tend à cesté fin, que l'homme ayme Dieu de tout son cuer, de tout son entendement, de toute son ame & sa force. Item en vn autre passage: Et maintenant Israel, qu'est-ce que Dieu requiert Deut. 10. de toy, sinon que tu adheres à luy de tout ton cuer? &c. Ces sentences prouuent bien suffisamment, que la doctrine de la Loy contient vne reigle de bien viure, pour mener l'homme à vne perfection entiere. C'est donc chose certaine, que Dieu a declairé en la Loy sa bonne volonté: qu'il a, dy-ie, vne foys pour toutes prononcé, Matt. 19. & ailleurs. du bien & du mal, de ce qui luy est agreable, ou desplaisant. Pourtant nostre Seigneur Iesus traitant de la vie parfaite, a tousiours là renuoyé ceux qu'il enseignoit. Et saint Paul au douzieme des Romains nous rameine à ce mesme but,

pour bien comprendre quel est nostre deuoir. Pourtant de dire que Moyse n'eust enseigné le peuple d'Israel d'hôner & seruir Dieu qu'à de my: c'est vn blaspheme, forgé premierement des Papistes, & maintenant renouuellé de ces pources phantastiques, qui prennent pour reuelation du ciel toutes les fables qu'ilz ont ouy compter à leurs grans meres.

Si on replique à cela, que touteffoys Iesus **C H R I S T** est nommé la perfection de la Loy: & qu'il est dict, que nous ne sommes plus gouuernez par doctrine puerile, comme le peuple ancien: ie respons, que ce mot de perfection ne se rapporte pas à la doctrine: mais à la grace du saint Esprit, par laquelle ce qui est contenu en la Loy, est escrit & imprimé en nostre cueur, à fin que nostre Seigneur parle: non seulement à noz aureilles: mais aussi à nostre volonté: & que non seulement nous oyons ce qu'il nous commande, mais que nous le faisons. Il y a aussi vne seconderaison, c'est que nostre Seigneur **I E S V S** a luy seul accomply toute iustice en sa personne, & a esté entier obseruateur de la Loy, à fin que ceste obeissance qu'il a rendue à Dieu son Pere nous fust imputée. Quant à ce que saint Paul nomme la Loy doctrine puerile: cela n'appartient qu'aux ceremonies & figures. Et en ce mesme sens il est dict, que la Loy ne peut amener ses disciples à perfection. D'autant que la fin, l'accomplisse.

l'accomplissement & la verité en est en I E S U S C H R I S T. Au reste, quant à la doctrine de vie, telle qu'elle a esté du commencement, elle est encore maintenant: & nous est commune avec le peuple d'Israel. Car elle ne varie point: mais comme la volonté & iustice de Dieu est immuable, aussi la Loy qui en est vraye. & certaine declaration, demeurera iusques en la fin telle qu'elle a esté du commencement.

Si on concede que Iesus Christ ait simplement interpreté le commandement de Dieu son Pere touchant le serment, & non pas rien adiousté à iceluy: comme il est necessaire de le confesser: nous auons gaigné le point que nous voulons. Car la Loy ne defend pas de prendre le Nom de Dieu, comment que ce soit: mais defend de le prendre en vain: signifiant qu'il y a quelque faceon legitime de le prendre, & en vser, laquelle est permise. Toutefois il est mestier d'exposer les parolles de nostre Seigneur Iesus, pource qu'il semble de premiere entrée, que il vueille interdire tous sermens. Or pour en auoir bonne & seure intelligence, il conuient de sauoir l'occasion qui l'a esmeu d'ainsi parler. Les Scribes & Pharisiens, comme il appert en tout le chapitre cinquiesme de saint Matthieu, auoyent par leurs faulses gloses tellement corrompu le peuple, qu'on ne faisoit nulle conscience de contreuenir en plusieurs sortes aux commandemens

de Dieu: moyennant qu'on eust quelque tergiuer
sation ou eschappatoire pour se couvrir. Ainsi
on ne pensoit point communement que ce fust
mal faict, de iurer en vain & friuolement par le
ciel & par la terre: moyennant qu'on ne iurast
point directement par le Nom de Dieu. Or no-
stre Seigneur Iesus monstre, que c'est vne folle
cauillation & sophisterie, que de se vouloir ainsi
purger deuant Dieu: veu que soubz le ciel & la
terre son Nom est obliquement comprins. Ainsi
quand il defend de iurer du tout, ce mot, du tout,
se rapporte à la forme de parler, ou aux motz
dont on vse. Ce qui se peut aisément conser-
mer par ce qu'il adioust consequemment, ny
par le ciel: car c'est le Throne de Dieu, ny par
la terre: car c'est son marchepied. Or les Anabap-
tistes appliquent cela peruersement au motif, ou
à la cause. Côme sil estoit defendu de iurer pour
quelque raison que ce fust. Ce qui est contre l'in-
tention du Seigneur, & contre le sens que luy
mesme donne en la procedure & deduction des
parolles.

Cependant ilz nous veulent faire à croire,
que nous glosions ce passage, comme sil estoit
dict, que c'est mal faict de iurer par le ciel, ou par
la terre: mais que de iurer par Dieu, il est permis.
Ou, pour le moins, ilz nous imposent cela enuers
les simples idiotz, qui n'ont rien veu n'ouy de
nous, pour en iuger. Et puis ayant ietté en auant
ceste

ceste calomnie, ilz s'escrient, en disant: O les folz & aueugles, qui ne regardent pas que Dieu est plus grand que son Throne. Mais à qui sadressent ilz, sinon à euxmesmes: veu qu'eux, & non autres, ont forgé cela en leur ceruelle phantastique. Pource qu'il sensuit aux parolles de nostre Seigneur, que nul n'ait à iurer par son chef: d'autant que nul de nous ne sauroit faire vn cheueu de sa teste blanc ou noir. Voila, disent ilz, la cause pourquoy tous sermentz sont defenduz: d'autant que nous ne saurions accomplir ce que nous promettons. Mais ie dy aucontraire, que si les bestes pouuoient parler, elles parleroyent plus sagement. Pour le premier, il y a contradiction manifeste en ce qu'ilz babillent. Car ceste raison est speciale, pour les sermentz ou nous promettons de faire quelque chose à l'aduenir. Il sensuit d'oc, qu'un serment, par lequel i'affirmeray de ce qui a desia esté faict, ne sera pas mauuais. Ne faut il pas, ie vous prie, qu'ilz soyent du tout hors du sens, d'arguer ainsi? Nous ne pouuons accomplir ce que nous promettons: pourtant tous sermentz sont defenduz. La replique est prompte à cela, qu'il y a vne espee de serment, en laquelle il ne est point question de s'obliger à rien faire: mais seulement de rendre tesmoignage à la verité, pour vn faict ia passé. Mesme que c'est la faceon de iurer dont on vse le plus. Secondement, il sen faut beaucoup, que le sens soit tel qu'ilz ima-

ginent . Car nostre Seigneur Iesus poursuit tousiours à monstrier , comme il auoit commencé, que si quelcun iure par son chef, c'est prendre aussi bien le Nom de Dieu obliquement , comme de iurer par le ciel, ou la terre, ou par Ierusalem. Comme d'oc il auoit dict, que le ciel est le Throne de Dieu, la terre, son marchepied , Ierusalem, sa sainte cité : aussi consequemment il demonstre, que le chef de l'homme est vne portion de sa seigneurie: d'autant qu'il en dispose luy seul à sa volonté. Comme sil disoit: Quand quelcun iure par son chef , sil pense iurer par ce qui luy appartient, sans que son serment attouche à Dieu, il s'abuse. Car Dieu a là son regne aussi bien, en sorte que l'homme n'y peut rien. C'est donc tousiours prendre le Nom de Dieu . Nous voyons comment nostre Seigneur a tousiours continué son propos. Ces eceruelez le veulent transporter avec eux pour le faire sauter subit du coq à l'asne.

La conclusion est , que nostre parolle soit ouy, ouy: non, non: & que tout ce qui est par dessus, vient du mal. Ces parolles sont aisées à entendre , n'estoit que ces porceaux les renuersent avec leurs groins, tellement qu'ilz les rendent toutes confuses. Car ilz disent, que cela vaut autant, comme sil auoit dict , que noz propos doyuent estre ouy & non: & que c'est mal fait d'y adiouster dauantage . Or nostre Seigneur Iesus met
deux

deux foys chacun de ces deux motz , pour signifier que nous deuons estre fermes & constantz en noz propos . Comme sil disoit : Ne variez point, pour retracter à chacune foys voz parolles:&qu'il n'y ayt point de mensonge ne d'hypocrisie en voz propos . Mais que vostre ouy, soit ouy:& vostre non, soit non. Et de fait, saint Iaqu^{es}, voulant donner vne mesme doctrine, parle ainsi de mot à mot: Que vostre ouy soit ouy:& vostre non soit non. En quoy il signifie, que les fideles doyuent auoir certaine tenure en leurs parolles . S'il y auoit vne telle loyauté & fermeté en nous, tous sermentz seroyent superfluz . Car ceste simplicité de parolles suffiroit , d'affirmer & nier, sans iurer. Il faut donc que la verité ne regne point, où il y a frequent vsage de sermentz. Pourtant , ce n'est pas sans cause que nostre Seigneur prononce, que cela procede du mal. Car à dire vray, la cause qui nous induit à iurer est, que tout le monde est si plein de mensonges, cautelles, feinctises & desloyautez , qu'il n'y a nul qui ose mesme fier à son propre frere. Ainsi vn mal attire l'autre . Mais en tout cela nostre Seigneur Iesus n'attouche nullement aux sermentz legitimes, qui estoient permis en la Loy: ains seulement reprend & corrige ceste licence que le peuple, estant mal instruit par ses mauuais Docteurs, se donnoit: pensant pour le premier, que ce n'estoit point iurer de prendre le Nom de

Dieu obliquement: puis apres, ne faisant cas que de pariures, & estimant tous sermentz vains & legiers, comme rien.

Puis que i'ay suffisamment renuersé tous les fondemens, sur lesquelz sappuyent les Anabaptistes, voulans condamner tous sermentz, sans distinction ny exception quelconque: il reste maintenant de monstrier par bonnes raisons & tesmoignages de l'Escripture, comment vn Chrestien peut licitement iurer sans offenser Dieu. Or ie proteste encore icy derechef, ce que i'ay dict au parauant: assauoir, que ie n'entens pas lasser la bride au monde, pour l'induire à abuser du Nom de Dieu, en faisant sermentz volages & temeraires. Je say que c'est vn vice qui n'est que trop commun: & pourrant qu'il faudroit plustost aduiser de le reprimer, que de l'augmenter. Je say aussi que ce n'est pas petite faute, que de prendre le Nom de Dieu en vain, & que d'autant plus deuons nous trauailler à empescher vn tel mal par tous moyens. Mais quoy? De condamner ce qui est bon, pour empescher l'abus, ce n'est pas bonne faceon de proceder. Parquoy, quand ie dy qu'il est licite en quelque cas à l'homme Chrestien de iurer, que chacun soit aduertý, que ie parle du droit vsage, lequel est conioinct avec crainte & reuerence du Nom de Dieu, & que nul ne prenne occasion de mes parolles, de se desborder à faire sermentz vains, ou superfluz, ou
au-

autrement vicieux . Et pour en definir plus apertement , quand ie dy qu'un homme Chrestien peut iurer sans offense , i'entens pour le premier, quād il est question de rendre tesmoignage à la verité. Secondement, si c'est l'affaire qui le merite : laquelle consideration se doit rapporter à l'honneur de Dieu , & à l'amour de nostre prochain. C'est à dire, qu'il soit expedient & profitable de iurer , tant pour l'honneur de Dieu , que pour garder charité entre nous. Tiercement, que la necessité le requiere : c'est à dire, qu'il soit besoing d'vser de telle cōfirmation. Quartement, que la deliberation & la fin de celuy qui iure soit telle. Finalement, qu'il y procede en crainte, ayant soing & affection de sanctifier le Nom de Dieu. En tel cas, & non autrement, ie dy que l'usage du serment est permis aux Chrestiens . Si quelque gaudisseur en abuse: ce sera à sa condamnation.

Pour confirmation donc de mon dire , i'allegue le commandement de Dieu, auquel ie me arreste . C'est, qu'il a ordonné & voulu qu'on iurast par son Nom , quand il y auroit cause legitime . De là ie conclus, que ce ne peut estre chose simple & de soy mauuaise, que iurer. Car il ne se peut faire, que ce qui est mauuais plaise iamais à Dieu. Qui plus est, d'autant que c'est vne espece de l'hommage que rendent les fideles à Dieu, comme il le demonstre souuent par les Prophe-

tes: de dire que c'est vice & peché, c'est trop aপর
 temment résister à la verité. La raison y est quant
 & quant. C'est que souuent il est expedient que
 la verité, qui autrement est douteuse, soit con-
 fermée: & n'y a autre moyen que par serment.
 Ce qu'alleguent les Anabaptistes, touchant la
 correction de ce commandement, est vn blas-
 pheme manifeste. Car il sensuyuroit que Iesus
 Christ auroit retracté ce qui vne fois auroit esté
 estably de Dieu son Pere. Ce qui ne se peut aucu-
 nement tolerer, comme nous auons veu. Et de
 fait, l'Apostre parlant du serment, combien que
 il en parle incidemment, traictant autre propos,
 ne dit pas que l'vsage en soit abrogué: mais le
 nomme fin & decision des controuersies huma-
 nes. Je vous prie, quand l'Apostre parlant aux
 Chrestiens, prononce que le serment est pour
 mettre fin à toutes controuersies, ne signifie il
 pas suffisamment, que c'est vn ordre approuué
 de Dieu, lequel a lieu en l'Eglise Chrestienne?
 Quelle temerité est-ce donc de se rebecquer a-
 lencontre, & reietter ce remede, qu'il donne,
 comme vn vice damnable?

Auec la doctrine il y a aussi les exemples,
 tant de Dieu comme de tous ses seruiteurs. Les
 hommes, dit l'Apostre au passage preallegué, iu-
 rent au Nom de Dieu, entant qu'il est par dessus
 eux: Dieu iure par soy mesme, d'autant qu'il n'a
 point de superieur, mais est souuerain de tous.

Quant

Heb. 6.

Quant à Dieu, les Anabaptistes respondent, que il peut bien iurer, d'autant qu'il peut accomplir tout ce qu'il dit: & ainsi est hors des dangiers de se pariurer, attendu qu'il est fidele, & veut garder tout ce qu'il promet. Mais que c'est autre chose de l'homme mortel, lequel souuent ne se peut acquitter de ce qu'il a promis, encore qu'il le vueille: & pourtant que c'est temerité à luy de iurer, s'obligeant à ce qui est par dessus son pouuoir. Quand ilz ont ietté ceste solution en l'air, il leur semble aduis que c'est fait, & qu'ilz nous ont fermé la bouche. Mais la repliche est prompt: qu'ilz ne peuuent dire le semblable de tous les Patriarches, Prophetes, saintz Roys, & peres anciens, qui ont aussi bien iuré à l'exemple de Dieu. Voila Abraham, pere de tous fideles, qui a iuré. Voila Isaac, voila Iacob, Dauid, Ezechias, & Iosias, qui en ont fait autant. Quelle difference y a il entre eux & nous? Pour le moins, il appert que leur response cy dessus mise, est vne pure cauillation. Et mesme il est facile de iuger, que comme bestes ilz se couppent au premier mot.

Si pour tergiuerfer ilz alleguent que ce sont exemples prins du vieil Testament: & que à present, en l'Eglise Chrestienne, nous auôs vne bride plus roide: combien que desia cest erreur a esté refuté: touteffoys encore ne profitêt ilz rien par cela. Car nous leur produirons aussi bien les Apostres, qui ont vsé de iuremens, voire en leurs

Escritz, quand mestier estoit. Or oyons la belle excuse qu'ilz font sur cela, pour eschapper. S. Pierre & saint Paul n'ont pas, disent ilz, juré pour rien promettre: mais seulement pour asseurer la promesse faicte de Dieu. Nous pouuons bien voir icy clairement comment ceux qui se deliberent de contredire à la verité s'enveloppent en mille absurditez: & toutesfoys n'ont nulle honte de leur impudence. Pour le premier, en donnant telle responce, ilz nous concedent que il y a quelques sermentz licites: assauoir quand on rend tesmoignage aux choses passées. Car il sensuit de leurs parolles, que lors seulement le serment est mauuais, quand nous promettons quelque chose pour l'aduenir. Mais encore ne font ilz pas bien effrontez, de mentir ainsi euidentement, voulans faire à croire qu'il n'est rien de ce qui se voit à l'œil. Saint Paul iure aux Corinthiens, qu'il n'est point venu à eux, à fin de les espargner, d'autant qu'il eust fallu qu'il les eut traitté asprement. Il iure aux Romains, qu'il seroit content d'estre reietté de Christ, à fin de sauuer le peuple des Iuifz. Pour confermer l'amour qu'il porte aux Philippiens, il iure aussi bien. De rechef il iure aux Corinthiens, qu'il a conuersé entre eux en bonne conscience. Item, aux Thessaloniciens, qu'il n'est point entré à eux par auarice, ou pour gagner: & appelle Dieu en tesmoing, combien saintement il s'est porté. Ces phrenetiques

2. Cor. 1.

Rom. 9.

2. Cor. 12.

1. The. 2.

ques disent, que les Apostres n'ont iamais iuré pour affermer de leur propre faict, mais seulement pour testifier de l'alliance de Dieu. Je vous prie, que merite vne telle impudence? Pour le moins, sont ilz dignes qu'on ouure la bouche, pour parler à eux?

Mais encore il est mestier d'expedier ceste difficulté qu'ilz mettent en auant. Assauoir, que l'homme ne doit rien promettre avec serment, pource qu'il n'est pas en luy de le tenir. A cela ie respons, que quād vn subiect iure à son Prince, de faire ce que son deuoir porte, c'est de luy obeir & estre fidele: ce n'est pas en confiance de sa vertu, ou qu'il se vueille vanter, comme en despiant Dieu & luy faisant la figue: mais plustost en inuoquant l'ayde de Dieu, il respond de sa volonté, qu'elle sera telle qu'elle doit estre. Combien que c'est vne trop folle imagination, de reprouuer les sermentz, en permettant les simples promesses. Car sil y a temerité en l'un, aussi y aura il bien en l'autre. Pourtant, sil nous est licite de promettre, il faudroit alleguer raison, pourquoy c'est que nous ne pouuons acertener nostre promesse avec serment, quand la necessité le requiert. Mais qu'en tel cas le serment soit saint & legitime, nous en auons plusieurs exemples en l'Escripture: & entre autres trois, qui sont principalement notables. Il est dict au liure des Chroniques, que Asa, Roy de Iudée, estant admoneſté ^{2. Chro. 15.}

4. Roy. 24.

3. Esra 10.

par Azaria Sacrificateur & Prophete, appella tout le peuple en Ierusalem, & là le fist iurer de seruir à Dieu à iamais. Autant en est il recité de Iosias, quand le liure de la Loy fut retrouvée, que pour renouueler l'alliance faicte par Moyse, il adiura le peuple, le faisant promettre de tousiours perseuerer en l'obeissance de Dieu. Le troiesime exemple est d'Esra & Nehemia, à l'instance desquelz le peuple, estant retourné de Baby-lone, iura de suyure pour le temps aduenir, Dieu & sa parolle. Combien que tout bien considéré, le semblable fust faict à la premiere publication de la Loy. Mais pource que ie say que i'ay affaire à gentz eceruelez & obstinez, ie n'ay voulu alleguer sinon les passages ou il est notamment faict mention expresse de serment. Voila donc toute l'Eglise d'Israel qui fait serment solennel à Dieu, promettant la chose la plus difficile qui soit, d'adherer fidelement à luy. Cela se fait par plusieurs foys. Que l'acte soit bon, il n'y a doute. Car il a tesmoignage & mesme est loué par le saint Esprit. Je ne m'arreste pas beaucoup à exposer comment les hommes se peuuent ainsi obliger à Dieu, de faire ce qui n'est pas en eux: sinon qu'il nous conuient auoir souuenance de ce que i'ay touché comme en passant, que les fideles presuppisent tousiours que Dieu ne leur defaudra point en la grace qu'il leur a promise: & sur icelle ilz fondent leur serment. Mais puis que
ainsi

ainsi est, que Dieu approuue ceste espece de serment, & que son Eglise en a vsé plusieurs fois par son ordonnance : ie demande à noz estourdis, en quelle authorité c'est qu'ilz l'osent reprobuer ? Ou plustost, sans m'amuser à eux, pource que c'est autant de temps perdu, ie prie & exhorte tous seruiteurs de Dieu, de considerer quelle outrecuidance c'est à ces pources ignorantz, de faire telles determinations magistrales, & vouloir contraindre le monde à les tenir comme arrestz irreuocables & sans contredict. Quant à moy, ie ne doute point, qu'en la matiere du serment, comme aux autres precedentes, ie n'aye pleinement satisfait à tous ceux qui auront ouïes & entendement, & voudront acquiescer à la verité congneue.

I'ay depesché les sept articles contenuz au liure que les Patriarches des Anabaptistes ont fait, comme vne resolution finale de ce qu'ilz tiennent à part des autres. Et pourtant, il ne resteroit plus autre chose, que de conclurre & mettre fin à ce present liuret, n'estoit qu'ilz ont laissé deux articles d'aussi grande consequence que nul des autres, desquelz il est mestier de traicter: veu que communement tous Anabaptistes y adherent. Mesme ie say que ceux qui ont composé ceste belle resolution, de ce temps là les enseignoyent. L'un est, qu'ilz ne tiennent point que Iesus Christ ait esté vray homme : mais plustost

le font comme vn phantofme quant à fon corps. L'autre eft, qu'ilz penfent que les ames eftans feparées du corps, dorment iufques au Iour du iugement, fans rien sentir ny congnoiftre: ou bien que l'ame de l'hōme n'eft que fa vie, laquelle defaut en mourant, iufques à ce qu'il foit reffuscité. Chacun peutvoir la cōfequence qu'emportēt ces deux erreurs. Ce qu'ilz n'en ont fonné mot, ie ne fay fi ce a eſté par cautelle, d'autāt qu'ilz font tāt odieux, qu'à bō droit leur doctrine en deuroit eſtre rendue execrable. Quoy qu'il en foit, puis que i'ay entrepris d'armer tous bons fideles contre leurs faulſes opinions, il n'eſt pas bon que ie diſſimule ces deux tant peſtilentes & meſchantes: veu qu'elles font communes entre eux. De ce qu'aucuns d'entre eux ont tenu, touchant la communauté des biens, item, qu'un homme peut auoir pluſieurs femmes, iufques à y contraindre ceux qui ſe contentoyent d'une, & mille autres abſurditez: ie me deportē d'en toucher. Car eux-mefmes, eftans confuz en leurs follies, ſen ſont retiré tout bellement pour la pluſpart. Mais des deux poinctz que i'ay dict, il y a autre raiſon: veu que tous y perſiſtent encore.

Quant au premier, qui eſt du corps, ou de la nature humaine de noſtre Seigneur I E S V S, il eſt à noter qu'il y a eu deux herēſies anciennes conformes ou approchantes de ce qu'ilz en diſent. Car les Manichéens ont phantaſtiqué que Ie
fus

fus Christ auoit apporté vn corps celeste au ventre de la Vierge sa mere. Les Marcionites ont eu vne resuerie vn peu diuerse, qu'il n'auoit pas vn corps vrayement substantiel, mais seulement apparence ou semblance de corps, que nous appellons phantomsme. La fin des vns & des autres a esté de nier que Iesus Christ fust descendu de semence humaine. Pourtant nous voyons que les Anabaptistes ne font que reueiller en cest endroit les erreurs, que le Diable auoit fuscitez il y a plus de mille quatre cens ans, & qui auoyent esté confonduz par la parolle de Dieu. Toutefois, comme i'ay protesté du commencement, ie ne veux point que cela preiudicie en rien à leur cause, sinon que ie les aye premierement conuaincuz par la pure parolle de Dieu, comme si iamais les hommes n'en auoyent parlé. Ce que i'en dy est seulement pour aduertir, à fin que chacun sache de quelle origine est procedé ce que les Anabaptistes mettent à present en auant, comme si leur auoit esté n'a guere reuelé du ciel. Et mesme pour les aduertir aussi bien eux. Car tous les plus grans Docteurs qui ayent esté en leur secte ont esté si ignorantz des histoires & de toute ancienneté, que ie ne pense pas que nul d'eux ait iamais sceu que vouloit dire le nom de Marcion. Il est donc bon, que tant eux, que les autres, soyent aduertiz, que le premier autheur de ceste opinion, dont ilz brouillent auourd'hui le mon

de, a esté reietté & anathematizé avec icelle, non pas de quelque nombre, mais vniuersellement de toute l'Eglise Chrestienne, tantost apres: c'est à dire, enuiron quarante ans apres la mort des Apostres. Car Eusebe & saint Hierome racontent que Polycarpe, qui auoit esté disciple & familier de saint Iehan l'Apostre, l'ayant rencontré à Rome, l'appella filz aîné de Sathan. Je laisse les autres erreurs, dont il a troublé l'Eglise. Car quand cestuy cy aura esté bien espluché, on congnoistra, comme i'espere, qu'à grand peine en pourroit on trouuer vn plus execrable.

Pour le premier ie monstreray par plusieurs & trescertains tesmoignages de l'escriture, comme nostre Seigneur Iesus a prins vrayement nostre chair & nature humaine, quand il nous a esté reuelé de Dieu son Pere en ce monde: & le monstreray tant euidemment, qu'il n'y aura si petit enfant qui ne congnoisse, que ce seroit trop grande impudence aux Anabaptistes de tergiuerfer plus outre. Combien qu'il ne sera ia mestier d'assembler tous les passages qui seruiroyent à ce propos, Ainsi pour euitier prolixité, i'eliray ce ix qui me sembleront les plus conuenables. Nous sauons que des le commencement du monde nostre Seigneur promet à Heue, que sa semence auroit victoire par dessus le Serpent. Regardons si cela est accompli en nous, ou si l'a iamais esté accompli en homme mor-

mortel, sinon par le moyen de Iesus Christ, qui a vaincu pour nous & surmonté Sathan. Mais pource que ceste promesse estoit encore aucune ment obscure, elle a esté beaucoup plus clarifiée depuis: tant à Abraham, qu'à Iacob: quand il leur a esté dict, qu'en leur semence seroyent benictes toutes nations de la terre. Or ceste semence, com me saint Paul l'interprete, & la raison le demon stre, est Iesus Christ. La promesse donc ne peut autrement estre verifiée, que Gen. 23. I E S U S C H R I S T ne soit descendu de la race d'Abraham. Pareille ment quand il fut dict à Daud: Je colloqueray Psal. 132. sur ton siege le fruit de ton ventre, pour regner eternellement. Et aussi quand en vn mesme sens il est confirmé par le Prophete Esaie, qu'il sera comme vn bourgeon procedant de la racine, de Esa. 53. Isai. Nous sauons que cela ne peut estre autre ment entendu, que du mesme Redempteur qui auoit esté promis à Abraham. Il faut donc qu'il soit de la lignée de Daud, selon la generation de la chair: ou la promesse seroit frustratoire. Pour tant saint Matthieu voulant reciter la genealo gie d'iceluy, commence par là, en le nommant Matth. 1. filz de Daud, filz d'Abraham: à fin de specifier plus expressement, que c'est celuy mesme qui auoit esté promis. Et de fait, c'estoit vne forme de parler toute commune & vsitée entre le peuple Iudaïque, de l'appeller ainsi: comme nous voyons par les Euangelistes.

A tout cela les Anabaptistes donnent vne solution, laquelle seule monstre suffisamment, quelles bestes ce sont, & combien leur impudence est desesperée. Il est, disent-ils, nommé filz de Dauid, non pas qu'il ait rien prins de la vierge Marie, ne qu'il ait esté faict homme de sa substance: mais seulement qu'elle l'a porté en son corps: comme l'eau passe par vn canal. Cela se pourroit dire, si ce mot de semence n'estoit point exprimé. Combien à la verité, que tous hommes de bon iugement verroyent que ce seroit vn subterfuge. Toutefois il y auroit vn petit plus de couleur, ou d'vmbrage. Mais puis que tant souvent cela est reiteré, qu'il est de la semence d'Abraham: quelle cauillation reste il plus, pour nier qu'il soit vray homme? Et de faict, quand Esaie promet, qu'il viendra, il ne dit pas seulement qu'il sera enfanté d'une vierge: mais il met premierement qu'il sera conçu. Ceste conception emporte, qu'il deuoit estre formé de sa semence: comme ceux qui congnoissent la signification du mot peuuent bien iuger. Dauantage, saint Paul les presse encore dauantage, quand il dit, qu'il a esté faict de la semence de Dauid selon la chair: & a esté neantmoins declairé filz de [Dieu par sa puissance. Voila Iesus Christ prononcé d'un costé filz de Dieu: puis il est adiousté, que selon sa nature humaine il est de la rasse de Dauid. Ne faut-il pas qu'un homme soit bien enragé, de
clor-

Rom. 1. 9.
2. Tim. 2.
Hebr. 2.

clorre les yeux, & boucher les aureilles à tout cela, pour persister & maintenir au contraire, que Iesus Christ n'a rien de la nature des hommes, quant à la substance de son corps? Semblablement en vn autre lieu, le mesme Apostre, parlant de la dignité & noblesse des Iuifz, dit entre autres choses, qu'ilz sont les successeurs, & la lignée des peres, desquelz est descendu Christ selon la Rom. 9. chair. Je laisse beaucoup d'autres passages: comme quand il dit que D I E U a esté manifesté en chair: item, qu'il a souffert en humilité de la 1. Tim. 3. chair: Semblablement quand sainct Iehan dit, que la parolle a esté faicte chair: & sur tout que Ich. 1. tant souuent luy mesme s'attribue ce tiltre de filz d'homme, & autres semblables: pource qu'ilz feroient superfluz apres ces deux tant notables que i'ay alleguez. Je me contenteray donc d'amener ceux, lesquelz avec ce qu'ilz prouuent mon intention, declairent quant & quant, combien il nous est necessaire de croire, que nostre Seigneur Iesus a vestu & prins vrayement vne nature cōmune avec nous, quand il a esté faict homme. L'Apostre en l'Epistre aux Hebrieux prent vn bel argument pour amplifier l'amour qu'il nous a portée, de ce qu'il n'a pas prins la nature des Anges: mais la nostre. Si nous receuons la Hebr. 2. phantasie de ces malheureux: ceste grace & bonté inestimable du Seigneur Iesus seroit abolie de nostre memoire, que nous ne congnoistrions

Heb. 2.

plus qu'il nous a plus honoré que les Anges. Il dit apres, que par le moyen de la communication qu'il a avec nous en sa chair & son sang, il se nomme nostre frere, & a vraye fraternité avec nous. De là nous auons à conclurre, que le plus grand bien que nous puissions auoir nous seroit osté, si Iesus Christ ne communiquoit avec nous en chair & en sang. Car comment serions nous enfans de Dieu sans estre ses freres? Or l'Apostre dit, que nous obtenons vn tel bien entant qu'il est conioinct avec nous en vne mesme nature, & non autrement. Il adiousté puis apres, qu'il estoit conuenable qu'il fust semblable à ses freres, pour estre fidele intercesseur & pitoyable. Dont il deduit vne singuliere consolation, que nous n'auons point vn Aduocat qui ne puisse supporter noz infirmités, veu que luy mesme en a esté tenté, étant fait semblable à nous, excepté péché. Puis qu'en la similitude qu'il met entre nous & Iesus Christ, il ne fait que ceste seule exception du péché: il sensuit qu'au reste il nous est semblable, attendu mesme que notamment il parle de la nature humaine. En ces passages non seulement nous voyons, comment nostre Seigneur IESVS est vrayement nostre frere en vnion d'vne mesme humanité: mais aussi l'vtilité qui nous en reuiet, de laquelle nous despoil- lent & priuent ceux qui luy attribuent ie ne say quel corps celeste, qui n'ait rien de cōmun avec le nostre.

Sem-

Semblablement toute la dispute que mene
sainct Paul aux Corinthiens, pour fonder nostre
resurrection vniuerselle en celle de c H R I S T ne
consisteroit non plus, si n'auoit vne nature com
mune avec nous. Puis que c H R I S T est ressusci
té, dit-il, nous ressusciterons. Et si n'y auoit
de resurrection pour nous: c H R I S T ne seroit
point ressusité. Il y auroit replique bien
prompte pour contredire à cela: si on pouuoit al
leguer que Iesus c H R I S T eust apporté vn
corps celeste avec soy au ventre de sa mere. Car
ce ne seroit pas de merueille qu'une substance
venue du ciel fust exempte de corruption. Et ne
sensuyuroit pas pourtant, que noz corps qui sont
terrestres, & n'ont en eux que matiere de pourri
ture deussent ressusciter. Pour auoir donc bon
fondement en toute ceste deduction: il est requis,
que nostre Seigneur Iesus participe en vne mes
me nature avec nous. Car voila toute l'esperance
de resurrection que nous pouuons auoir, que ce
ste chair que nous portons maintenant corrupti
ble, est desia ressusitée en Iesus c H R I S T, a pris
possession du ciel, & est là immortelle. Par ce
moyen, dy-ie, nous auons vne bonne arre & feu
re, pour nous certifier. Autrement non. Et en vn
autre passage, le mesme Apostre voulât mōstrer,
comme le Seigneur Iesus est nostre mediateur
notamment dit qu'il est homme. D'autant
qu'il fauoit bien, que iamais nous ne pourrions

1. Cor. 15.

1. Tim. 2.

estre induitz à nous retirer vers luy, si nous n'auions premierement ceste persuation qu'il fust prochain de nous, & qu'il nous attouchast. Voila dōc ou gist & se repose nostre confiance, pour nous faire tenir à Iesus Christ, & le chercher pour mediateur: assauoir entant qu'il nous est conioinct, & participe en vne mesme nature avec nous. Et c'est ce qu'entend le Prophete Esaie, en disant qu'il a esté fait Immanuel: c'est à dire Dieu avec nous. Car cela ne peut estre sans vraye similitude & vnion de nature.

Esa. 7.
Matt. 1.

Il y a encore d'autres raisons peremptoires à ce propos: lesquelles combien qu'elles ne soyent exprimées en l'escriture: toutesfoys elles ne laissent pas d'estre certaines, d'autant qu'elles sont fondées en icelle. Car qu'il fust necessaire, que celuy qui deuoit estre nostre mediateur, fust vray Dieu & vray homme, il appert par l'office du mediateur, qui est de reconcilier les hommes avec Dieu, & abolir l'inimitie mortelle, qui y estoit au parauant. Or il n'y auoit nulle esperance que cela se fist, sinon que la maiesté de Dieu descendit iusques à nous, se conioingnant avec l'infirmité de nostre nature. Pareillement l'office du mediateur estoit, de nous faire enfans de Dieu, & heritiers de son Royaume, au lieu que nous estions heritiers de mort & damnation. Voila donc l'arre pour confermer nostre fiance, que nous sommes enfans de Dieu: d'autant que le
filz

filz naturel de Dieu a prins corps de nostre corps & chair de nostre chair, pour estre fait vn avec nous. Dauantage c'estoit vn point nécessaire à nostre redemption: que la desobeissance qui auoit esté commise en nostre nature fust aussi réparée en icelle. Parquoy nostre Seigneur Iesus est venu vray homme, se presentant comme en la personne d'Adam, duquel aussi il a prins le nom: à fin de payer la peine du peché en la chair en laquelle il auoit esté commis. Ceux donc qui despouillent Iesus CHRIST de sa nature humaine obscurcissent bien sa bonté: mais ilz nous font aussi vn grand tort en destruisant le vray obiet que nous auons, pour auoir droite & pleine fiance en luy.

Mais à fin qu'il ne semble aduis que ie diffi-
mule rien de ce qui leur pourroit seruir: ie pro-
duiray tout ce qu'ilz pourroyent amener pour
donner couleur à leur phantasie. Sainct Paul dit
quelque part, que Iesus Christ sest aneanty soy-
mesme, prenant forme de serf, estant fait sem-
blable aux hommes & en apparence se montrant Philip. 2.
homme. De là Marcion a conclud, que son corps
estoit vn phantome. Les Anabaptistes sen ay-
dent auioirdhuy, pour monstrier, qu'il n'estoit
pas tel que le nostre. La responce est bien facile.
Car sainct Paul ne traicte pas là de la substance
du corps de IESVS CHRIST. Mais seulement re-
monstre, que comme ainsi soit qu'il se peut mon-

strer en sa maiesté glorieuse comme Dieu: qu'il
sest porté comme simple homme en toute peti-
tesse. Il exhorte là les Philippiens à humilité.
Pour ce faire il leur amene Christ pour exem-
ple disant qu'il estoit en la forme, c'est à dire en
la gloire de Dieu: & toutesfoys qu'il sest anean-
ty. Il adioute puis apres comment c'est qu'il sest
môstré en forme d'hôme & qu'il sest porté côme
hôme. Que signifient ces mortz autre chose, sinô
que soubz le voile de sa chair en laquelle il appa-
roissoit petit & cōtemptible, il a caché la gloire
de sa diuinité: en sorte qu'ô ne cōgnoissoit en luy
que la cōdition fragile, qu'il môstroit par dehors.
Ainsy quant à la solutiō de ce passage, il n'y a nul
le difficulté. Mais il y en avn autre lequel semble
auoir vn peu plus d'apparence. C'est au 15. chap.
de la premiere aux Corinthiens: ou S. Paul dit,
que le premier Adam a esté terrestre, faict de
terre: le second est celeste, estant venu du ciel.
De là les Anabaptistes à l'exemple des Manichi-
ens leurs predecesseurs, concluent, que Iesus
CHRIST donc a eü vn corps celeste, & non
pas formé ny crée de semence humaine: c'est à
dire de la substance de la vierge sa mere. La so-
lution de cest argument gist à regarder le pro-
pos que demene là saint Paul, & continuer vne
sentence avec l'autre: non pas de couper & re-
trancher vn mot, pour deprauer le sens. Saint
Paul donc ayant à monstrier dont vient la mort,
&

& dont vient la resurrection. Assauoir la premiere d'Adam, la seconde de Iesus CHRIST, entre autres choses dit, que Adam a esté fait en ame viuante: IESVS CHRIST en esprit viuifiant. Or par cela, il n'entend pas de nier que Iesus CHRIST n'ait eu vne Ame semblable à la nostre: mais il signifie qu'il auoit dauantage: assauoir son esprit qui non seulement est viuant: mais a en soy la vertu de viuifier. Puis apres il adioust, que le premier Adam a esté terrestre, en tant qu'il estoit de terre: que Iesus Christ est celeste, estant venu du ciel. Il n'y a doubte que ce passage ne se doye prendre comme l'autre: de la qualité de Iesus Christ, & non pas de la substance. I'entens de ceste vertu supernaturelle & diuine, qu'il a du ciel comme filz de Dieu, & non pas de la terre comme homme mortel. Et de fait, comme nous auons dict, le fondement que prent là saint Paul, pour nous confermer en l'esperance de la resurrection, seroit nul: si IESVS CHRIST auoit vne autre substance de corps que nous. Ilz alleguent puis apres qu'il a esté conceu du saint Esprit. Mais ceste vertu du saint Esprit n'est pas pour exclure la substance de la mere. Il est vray qu'il n'y a pas eu conionction d'homme & de femme pour l'engendrer selon l'ordre naturel des autres. Mais cela n'empesche pas, que par l'operation miraculeuse du saint Esprit il n'ait esté formé de la substāce de sa mere.

re

Rom.8.

re, pour estre vrayement semence d'Abraham & fruct du ventre de Dauid: comme le mesme esprit l'auoit nommé, long temps au parauant. Je say bien leur replique, qu'il y auroit inconuenient en cela, d'autant que toute la semence humaine est maudicte & corrompue, & ainsi que le Seigneur Iesus seroit descendu de corruption. Mais ie respons que ceste conception miraculeuse oste ceste difficulté. Car ce que le saint Esprit est interuenue a esté pour le sanctifier des le commencement, & en le sanctifiant le preseruer, à ce qu'il ne fust entaché d'aucune pollution du genre humain. Pour ceste cause saint Paul dit qu'il a prins similitude de chair de peché, pour en icelle condamner le peché. Car en prenant nostre chair il n'a pas prins le peché, d'autant que la vertu du saint Esprit l'a separé de la condition des autres.

Ilz ont aussi vne folle consideration & phâtaistique, qu'il leur semble que ce seroit faire deshonneur à Iesus CHRIST, de l'abaisser iusque là, de le faire d'une semblable nature à la nostre. Parquoy ilz imaginent que cela conuient mieux à sa dignité, de luy attribuer vn corps celeste. Je respons que c'est vne grand'folle d'estimer que la gloire de Iesus Christ soit en rien amoindrie, ou que cela derogue à sa dignité en sorte que ce soit, de dire qu'il s'est humilié, voire bien aneanty, pour nostre redemption & salut.

Il est bien dict plus de luy au Pseaume vingt deuxiesme, qu'il est vn vers & non plus homme, l'opprobre du peuple & la reiection du commun populaire. Pareillement ce que dit Iesaie est bien plus, qu'il a esté mesprisé comme de nulle valeur, estimé commé ladre, tenu du nombre des malfaiçeurs. Mais sauroit on plus dire, qu'en a dict saint Paul: assauoir qu'il a esté maudit & faict execration pour nous? Si cela diminueoit son honneur, il nous faudroit auoir honte de confesser, qu'il a esté crucifié pour nous. Car le crucifiment emporte vne mort plus ignominieuse, que ne seroit aujourd'hui le gibet. Pourtāt ne nous amusons point à ces folles imaginations, de vouloir honorer Iesus Christ à nostre poste, ou de craindre à luy faire deshonneur, en reconnoissant comme il a esté abaissé pour nous quant à sa nature humaine. Comme de toute eternité il auoit esté Dieu d'une mesme gloire avec son Pere: aussi est il tousiours demeuré tel, sans aucune diminution. Ce qu'il a vestu nostre chair, & en icelle a esté humilié, c'est vn tesmoignage memorable de sa bonté infinie, & de l'amour incomprehensible qu'il nous a porté. Ainsi tant sen faut que cela derogue rien à sa hauteſſe, que c'est la principale matiere que nous ayōs de le magnifier & louer. Somme: si nous voulons vrayement reconnoistre le Seigneur Iesus pour nostre Sauueur, confessons suyuant l'exhortation de saint

Iehan, qu'il est venu en chair, pour nous vnir à Dieu son Pere, par le moyen de l'obeissance que il luy a rendue en nostre humanité comme en noz personnes. Celuy qui ne fait telle confession est Antechrist: & nous doit estre en execration,

Il est temps de venir au second article: duquel i'ay promis de traicter. C'est que les Anabaptistes tiennent tous communement, que les ames, estans departies du corps, ne viuent point, iusques au iour de la resurrection. Combien encore qu'ilz different aucunement entre eux. Car les vns ne pensent pas, que l'ame soit vne substance, ou vne creature ayant essence: mais seulement la vertu qu'a l'homme de respirer, se mouuoir, & faire les autres actions de vie, pendant qu'il est viuant. Les autres confessans que l'ame est vne creature essentielle, imaginent toutesfoys que les ames des trespassez dorment sans aucun sentiment, ny intelligence, iusques au iour du iugement. Pourtant si nous voulons bien refuter les Anabaptistes du tout, il nous conuient demonstrier premierement, que les ames ont vne essence propre. Sencondement, qu'apres la mort elles sentent & congnoissent leur condition & estat. Mais deuant qu'entrer plus auant en propos: notons que ce mot d'ame, se prent en l'escriture en diuerses significations. Premierement, pour la vie, comme quand il est dict

dict en Iob: Je porte mon ame entre mes mains. *Iob. 32.*
 Item en sainct Matthieu: L'ame n'est elle pas plus
 que la viande: Et en d'autres passages infiniz. Au *Matt. 6.*
 cuneffoys il se prent pour la volonté, ou le desir
 comme quand il est dict en Samuel, que l'ame *1. Sam. 18.*
 de Ionathan a esté liée, avec l'ame de Daud. Et
 quand il est dict aux Actes, qu'il y auoit vn cueur *Act. 4.*
 & vne ame en la multitude des croyans. Quel-
 quesfoys il se prent pour l'homme entier. Com- *Gen. 46.*
 me quand il est descendu septante cinq ames
 avec Iacob en Egypte. Item, quand le Prophete
 denonce, que l'ame qui aura peché, mourra. Item *Ezech. 15.*
 pour respiration, ou souffle, comme quand Saul *2. Sam. 1.*
 dit, en Samuel. Je suis surprins d'angoisse, com-
 bien que toute mon ame soit encore en moy.
 Item quand Elisée disoit, que l'ame de l'enfant *2. Roy. 4.*
 retourne en ses entrailles. Finalement, quand il
 se conioinct avec le mot d'esprit, il signifie l'af-
 fection, comme quand Esaie dit: Mon ame t'a de *Esa. 26.*
 siré de nuict, & ie veille à toy en mon esprit.
 Item quand sainct Paul prie Dieu qu'il garde les
 Thessaloniens impolluz en corps, & en esprit, & *2. Thess. 5.*
 en ame. Pareillement le vocable d'esprit, se
 prend en diuerfes sortes, desquelles il n'est ia me
 stier d'en tenir plus long propos. Seulement que
 nous sachions, qu'il se prend souuenteffoys pour
 l'ame, comme on le verra par les passages, qui se-
 ront cy apres alleguez.

Cela noté, voyons si l'ame humaine n'a pas

vne essence propre, qui luy soit donnée de Dieu. Et commâçons par la creation de l'homme, laquelle nous pourra beaucoup seruir à cela.

Gen. i.

Quand il est question des bestes, & autres animaux, Dieu commande simplement qu'elles soyent faictes. Quand ce vient à créer l'homme, il entre en consultation, disant: Faisons l'homme à nostre image & semblance. Or ou sera-ce, que nous trouuerons ceste image de Dieu, sinon qu'il y ait vne essence spirituelle en l'homme, en laquelle elle soit imprimée? Car quant au corps de l'homme, ce n'est point là où l'image de Dieu reside. Il est vray, que consequemment Moyse adiouste, que l'homme a esté faict en ame viuante, ce qu'il dit aussi bien des bestes. Mais pour denoter vne excellence speciale, il dit que Dieu a inspiré vertu de vie au corps qu'il auoit formé de terre. Ainsi combien que l'ame humaine ait quelques qualitez communes avec celles des bestes: toutesfoys entant qu'elle porte l'image & semblance de Dieu, elle est bien d'une condition diuerse. Entant aussi qu'elle a son origine à part, elle est d'une autre préeminence, & c'est ce qu'entend Salomon, quand il dit, qu'à la mort, le corps retourne en la terre, dont il est prins, & l'ame retourne à Dieu, qui l'a donnée: Pour ceste cause il est dict au liure de Sapience, que l'homme est immortel, entant qu'il est créé à l'image de Dieu. Ce n'est pas vn liure authentique de la

Ecd. ii.

Sap. i.

la saincte escripture, mais il n'y a point d'inconuenient de nous ayder de son tesmoignage, comme d'un Docteur ancien, combien que ceste seule raison, nous doit suffire, que l'image de Dieu, telle qu'elle a esté mise en l'homme, ne peut estre qu'en vn esprit immortel, si nous entendons ce qu'elle contient, selon que saint Paul l'expose. C'est assauoir que nous ressemblions à Dieu en iustice & vraye sainteté. Voila quant à la creation.

Or maintenant il y a beaucoup de passages en l'escripture, qui sont trop plus euidens: comme quand saint Pierre dit, que le loyer de nostre ^{1. Pier. 1.} foy est le salut de noz ames. Item quand il dit, que les fideles ont purifié leurs ames. Item, que les desirs de la chair combattent contre l'ame. Item, quand il appelle ^{1. Pier. 2.} I E S V S C H R I S T Euef que des ames. Car ces sentences ne pourroyent consister, sinon qu'il y eust des ames qui fussent fauüees, & lesquelles fussent assaillies par mauuaises concupiscences, & lesquelles fussent purifiées de leurs macules, & gouvernées par Iesus Christ leur Euesque. Suyuant cela il est dict en l'histoire de Iob, que les hommes habitent en maisons ^{Iob 4.} de terre, de laquelle forme de parler saint Pierre vse aussi bien, quand il dit, qu'il veut aduiser les fideles, pendant qu'il habite en son tabernacle terrestre. N'estoit que la principale partie de ^{1. Pier. 1.} l'homme habitast au cops, comme en vn taberna

Hebr. 12.

Rom. 3.

cle, cela, seroit dict sans raison. L'Apôstre aussi en l'Epistre aux Hebreux monstre autant ou plus expressement cela mesme, quand il dit, que les Peres qui nous ont engendrez en ce monde, sont les Peres de nostre chair: mais que Dieu seul est Pere de noz espritz. Je vous prie, si l'ame n'estoit quelque essence, comment pourroit on prendre ces parolles? Tantost apres, parlant des citoyens de paradis, il dit, que ce sont les Anges & les espritz des iustes. Voudroit on rien de plus clair que cela? Je ne vois point aussi comment on puisse exposer l'exhortation que nous fait saint Paul, de nous purger de toute pollution de chair & d'esprit, sinon que l'on prenne ce mot d'esprit, pour vne ame essentielle. Car comme le corps est vn subiect, qui receoit pollution, aussi faut-il que l'ame de son costé, soit vne creature, qui se puisse polluer, & sanctifier. Il y a vne semblable raison: en ce qu'il dit en vn autre lieu, que l'Esprit de Dieu rend tesmoignage à noz espritz, que nous sommes enfans de Dieu. Combien que si nous teniôs le principe, qui doit estre resolu entre tous Chrestiens, il ne seroit iamestier d'entrer en dispute, d'entrer en ceste matiere: assauoir si l'ame est vne essence, ou non: veu que ce a esté l'erreur des Saduciens, qui est a present reprobé en l'escriture. Car il est dict au vingt & troisieme des Actes, que saint Paul, se voulant excuser, protesta qu'il estoit persecuté,
d'au-

d'autant qu'il ne adheroit point à la secte des Saduciens. Et saint Luc voulant signifier en quoy c'estoit, dit que les Saduciens ne croient point la Resurrectiō, ne qu'il y ait des Anges, ny des espritz, ou ames. Que voulons nous plus que cela? Saint Paul confesse, qu'il est Pharisien en ses articles. Or est-il ainsi que les Pharisiens confessoient, comme dit saint Luc, que les ames sont vrayes creatures essentielles. Pourtant que les Anabaptistes prennent la querelle des Saduciens leurs predecesseurs, pour la maintenir contre saint Paul. Et quand ilz auront gaigné leur cause contre luy, lors nous verrons que nous aurons à leur dire. Cependant nous tiendrons, fuyuant toute la doctrine de Dieu, que l'homme est composé, & consiste de deux parties: assauoir du corps & de l'ame.

Il est temps de venir au second point, assauoir quel est l'estat des ames apres la separation du corps. Les Anabaptistes pensent qu'elles soyent endormies comme mortes. Nous disons qu'elles ont vie & sentiment: qu'ainsi soit, nous en auons le tesmoignage de Iesus Christ, quand il exhorte ses disciples de ne point craindre ceux qui tuent les corps, & ne peuvent tuer les ames: mais de craindre celuy, qui apres auoir tué le corps, peut ietter l'ame en la gehenne du feu. Si l'ame n'estoit rien, ou qu'elle fust comme occie, quand elle est separée du corps, cela ne se-

roit point vray, que les tyrans & persecuteurs ne ont nulle puissance sur icelle. Ainsi Dieu nous a fait vne belle grace, de n'assubietir point noz ames à ses bourreaux, lesquelz veulent pis faire, & plus cruellement que tous les persecuteurs du monde: c'est de meurtrir les ames quant & quant les corps. Mais oyons leur belle cauillation. Il est bien vray, disent ilz, que l'ame meurt pour l'heure, mais elle ne perist pas du tout, veu qu'elle doit ressuscciter. Ie leur demande: Et le corps quoy? Car si l'ame ne meurt point seulement à cause de l'Esperance qu'elle a de la resurreccion, il y a vne mesme raison pour le corps, qu'il ne periroid non plus. Or nostre Seigneur Iesus discerne notamment entre l'un & l'autre, disant, que le corps est tué, non pas l'ame. Et en ceste facon parloit Iesus Christ, disant aux Iuifz: Destruisez ce temple, & ie le réedifieray dedans trois iours. Sainct Iehan adiouste qu'il parloit du temple de son corps: ainsi il reseruoit l'ame à part, denotant qu'elle ne pouuoit pas estre destruite: & de fait, en mourant, il l'a recommandée à Dieu son Pere. Et saint Estienne, à son exemple: Seigneur Iesus, dit il, receois mon esprit. Voila donc qu'il nous faut sentir. C'est, que Dieu est le protecteur de noz ames, pour les preseruer de la tyrannie des hommes: à fin que quand se viendra à mourir, chacun de nous luy recomande son ame.

I ch. 2.

Luc 23.
Act. 7.

Sem-

Semblablement, quand saint Pierre dit, que nostre Seigneur I E S V S est venu en son Esprit, aux espritz qui estoient en prison: il testifie bien par ses parolles, que les ames sentent & congnouissent apres la mort. Car autrement elles ne eussent point esté capables de la predication de C H R I S T, laquelle il dit qu'il leur a faicte. Je confesse que ce passage a esté tenu pour obscur, & qu'on l'a diuersement exposé: mais ie n'allegueray rien à mon propos qui ne soit certain, L'Apostre donc ayant parlé comment Christ a esté humilié, ayant aussi remonstré, qu'il faut que tous fideles soyent faictz conformes à luy. Il adiouste pour consolation, que Iesus Christ n'a pas esté vaincu par la mort: mais qu'il en a esté supérieur. Consequemment, à fin de nous certifier que ceste vertu de sa resurrection nous appartient, il dit, que non seulement les viuantz l'ont sentie, mais aussi les mortz: & non seulement les fideles, mais aussi les incredules & rebelles. Il est vray, que quand ce vient à distinguer, il ne parle que de la seconde espece: mais cela n'empesche point, qu'il ne parle premierement de tous en general. Touchant de ce qu'il met les ames, tant des bons que des mauuais, en prison, c'est pour signifier le desir vehemēt qu'auoyent les fideles de la venue de Iesus Christ, lequel les tenoit comme en angoisse. Le sens donc est tel, que la vertu de la redemption faicte par Christ,

est apparue aux ames des mortz, tant des fideles comme des incredules. Mais quand ce vient à parler en special, il laisse les premiers. Toutefois, à fin que nous ne soyons point en dispute touchant du sens, comme il n'en est point de mestier quant à la matiere presente, seulement ie demande à mes gentz, assauoir si les espritz dont parle l'Apostre, ne sont pas ames viuantés? D'auantage il adiousté vne autre sentence, qui est en core plus claire. Assauoir, que l'Euangile a esté presché aux mortz, à fin qu'ilz soyent condamnés en la chair, quant aux hommes, mais qu'ilz uiuent à Dieu selon l'esprit. Nous voyons comment il n'assubiectit à la mort, que le corps, reseruant l'ame en vie.

Le semblable auoit esté demonstré au paruant par Salomon, quand en decourant la mort de l'homme: il separe l'ame du corps de bien loing: Iusques à tant, dit il, que la terre sen retourne en sa terre, dont elle est prinse, & que l'esprit sen aille à Dieu, qui l'a donné. Si on glose que le mot d'esprit, ne signifie que vie, il n'y a si petit enfant qui ne voye que c'est corrompre le texte. Il est vray, que quand il n'y auroit tesmoignage que ceste sentence de Moyse, ou il dit, que Dieu est le Dieu d'Abraham, Isaac & Iacob, trois cens ans ou enuiron apres leur mort, il suffiroit bien pour ceux qui ne voudroyent point estre contentieux. Mais encore, quelque opiniastrété qu'il y ait

Ecccl. 12.

Exod. 3.
Mat. 22.

y ait aux contredifans, si est ce que l'exposition que nostre Seigneur Iesus donne de ces motz, en oste toute doute. C'est qu'il remonstre que son Pere n'est point le Dieu des mortz, mais des viuantz. Je say bien qu'ilz repliquent que les mortz sont appelez viuantz à cause de l'esperance de la resurreccion. Mais cela n'est rien. Car puis qu'ainsi est, que les Patriarches estoient mortz pour le temps que Moysse parloit, il sensuit qu'ilz viuoient en vne meilleure vie. Et pourtant, saint Luc adiousté que tous vivent à Dieu, denotant que nostre Seigneur maintient les siens en vie par sa grace & vertu. A quoy est correspondant ce que dit l'Apostre: Soit que nous viuons, que nous viuions au Seigneur: soit que nous mourons, que nous mourions au Seigneur. Soit que nous viuons, soit que nous mourions, que nous sommes au Seigneur: & que Iesus Christ est mort & resuscité, à fin de dominer sur les viuantz & sur les mortz. Car il est certain que Iesus Christ ne peut dominer sur nous, que nous ne soyons: pourtât si son Empire s'estend iusques sur les mortz, il sensuit que les fideles apres la mort subsistent en quelque essence.

Et de fait, autrement ne pourroit consister la vision que recite saint Iehan en l'Apocalypse. C'est qu'il vit les ames des Martyrs soubz l'autel celeste, crians à haute voix: Seigneur, iusques à quand diffères tu de venger nostre sang?

Et que Dieu leur fit dōner des robes blanches, & leur commanda d'auoir patience pour quelque peu de temps, iusques à ce que le nombre de leurs compagnons fust accomply. Il n'y a doubte que ces robes blanches ne signifient cōmancement de gloire, que Dieu donne aux Martyrs en attendant le iour du Iugement. Car cela n'est point nouueau en l'Eſcriture, comme quād Daniel dit, qu'il a veu le Seigneur veſtu d'vne robe blanche. Et Ieſus Chriſt eſtoit tel en ſa tranſfiguration, en la mōtaine de Tabor. L'Ange auſſi qui apparut aux femmes pres du ſepulchre, eſtoit accouſtré d'vne robe blanche. Item, les Anges qui apparurent aux diſciples apres l'aſcenſion de noſtre Seigneur Ieſus. Autant en eſt il diſt de l'Ange qui apparut au Centenier Corneille. Finalement, en la parabole de l'enfant prodigue. Il eſt diſt, que quand il fut retourné, le pere commanda qu'on luy apportast ſa premiere robe, en ſigne de ioye & de feſtin. Nous voyons donc combien cela repugne à l'erreur des Anabaptiſtes, qui au lieu de robes blanches, donnent des couſſins aux ames pour les faire dormir. Dauantage, en ce qu'il eſt diſt, que les ames crient, en demandant vengeance à Dieu, il eſt demonſtré qu'elles ne dorment point. Car ce cry ne ſe peut expoſer comme le cry du ſang d'Abel, d'autant que le deſir qu'ont les ſainctes ames eſt là exprimé. Cela nous eſt ſuffiſamment confir

m e

Dan. 7.

Mat. 17.
Ieh. 20.

Act. 1.

Act. 10.

Luc 15.

mé par l'histoire du Lazare, ou il est dict que son Luc 16.
ame fut portée par les Anges de Dieu au Sein de
Abraham Et l'ame du Riche sen alla en enfer. Il
leur semble aduis qu'ilz ont vne belle solution
& bien colorée, quand ilz respondent que c'est
vne parabole, c'est à dire vn exemple, & non pas
vne histoire. Mais ie leur demande ou c'est que
ilz ont veu en l'Escripture, qu'en vne parabole ou
similitude simple, le nom propre d'un homme
fust exprimé, comme il est icy. Et ainsi l'ont en-
rendu tous les Docteurs de l'Eglise, comme la
raison le veut. Mais encore que ie leur accorde
que ce soit parabole, si faut il qu'elle soit prinse
de la verité. Nostre Seigneur dit que l'ame du
Lazare a esté portée par les Anges au Sein d'A-
braham, & que là elle receoit ioye & consolati-
on. Il dit d'autre costé, que l'ame du Riche infide-
le, souffre merueilleux tormens en enfer. Il dit
qu'il y a grande distance entre l'un & l'autre. Si
les ames n'ont nul sentiment apres la mort, ny
de bien ny de mal, que seroit-ce de ceste narrati-
on de nostre Seigneur, sinon vne fable & com-
me vn compte du liure de Mellusine? Pourtant
ceste tergiuersation des Anabaptistes est vn blas-
pheme, qui deshonnore nostre Seigneur Iesus,
comme sil nous auoit raconté des fictions friuo-
les & sans propos. Dauantage, c'est vne sottise res-
uerie repugnante au sens humain, comme les pe-
titz enfans mesmes le peuuent apperceuoir.

Luc 23.

Jonas 3.

Matt. 17.

Et c'est la promesse qui fut faicte au pource brigand, quand il demanda mercy en la croix. Car nostre Seigneur Iesus luy respondit : Tu seras auiourd'hui avec moy en Paradis. Par ce mot de Paradis, nous n'auons que faire d'imaginer qu'il ait voulu specifier vn certain lieu: mais seulement la ioye & felicité, qu'ont ceux qui viuent avec luy. Tant y a que IESVS CHRIST ne renuoye point ce pource pecheur au iour de la resurrection, mais luy assigne ce iour là mesme, pour viure eternellement en sa compagnie. Les Anabaptistes, pour cailler ce passage, alleguent ce qui est dict autre part, que mille ans sont vn iour deuant le Seigneur. Ce que nous leur conce-dons bien: mais il est à noter, que Dieu, quand il parle aux hommes, saccommode à leur sens. Tellement qu'on ne trouuera point en l'Escripture, que Dieu ait jamais dict: Je feray auiourd'hui cela, entendant qu'il le fera d'icy à mille ans. En telle maniere quand Jonas denonceoit aux Ninuites, qu'au bout de quarante iours leur ville periroit, ce eust esté grande folie à eux de concevoir quarante mille ans. Pareillement, quand nostre Seigneur Iesus promettoit qu'il ressusciteroit au troisieme iour, nous sauons qu'il parloit à la fa-
 ceon commune des hommes. Mais ie me deportte de ce propos, d'autant que chacun voit combien les Anabaptistes ont esté trompez, d'vser de tel subterfuge. Ilz ont encore vne autre cauilla-
 tion:

tion: Auiourdhuy signifie le temp du nouueau Testament. Et pour prouuer cela ilz abusent de ceste sentence, qui est en l'Epistre aux Hebreux, Hebr. 13. que Iesus Christ, qui estoit hier, est auiourdhuy, & sera eternellement. Mais ilz ne voyent point, que si on exposoit ainsi le mot d'auiourdhuy, le mot d'hier signifieroit le temps de l'ancien Testament, & par ce moyen il sensuyuroit que nostre Seigneur Iesus auroit commenc   d'estre, qui feroit vne grande absurdit  , d'autant que nous sa uons qu'il est nostre Dieu eternal, & mesme selon son humanit  , il est nomm   l'Agneau sacrific   des le commencement du monde. Dauantage, en core selon leur dire, nous pourrions conclurre, auquel Iesus Christ a pardonn   ses fautes doit entrer en Paradis deuant la resurrection. Car l'Apostre nomme trois temps, desquelz l'un, comme ie pense, signifie le iour de l'ancien Testament, & l'autre signifie le temps qui sera depuis le renouvellement du monde. Il reste donc, que le mot d'auiourdhuy signifie le temps ou nous sommes, qui est entre la mort de Iesus Christ & son aduenem  t dernier. Et    fin qu'ilz puissent encore mieux congnoistre leur bestise, si Iesus Christ eust promis Paradis au brigand pour le iour du Iugement, il conuenoit qu'il eust dict au siecle    venir, & non pas auiourdhuy. Car c'est la coustume de parler de l'Escripture. Qui est-ce qui ne les estimeroit vaincuz de si claire raison? Toutef-

foys leur impudence est telle, qu'encore ilz amei-
nent vne autre repliche, c'est que Paradis a esté
promis au brigand, côme Dieu denonce la mort
d'Adam & Heue, au iour qu'ilz gousteroyent du
fruct, qui leur estoit defendu. Or il est certain
qu'ilz ne moururent point ce iour là, mais long
temps apres. Le respons, qu'à l'instant mesme que
Adam transgressa la defence de Dieu, il mourut
quant à l'ame. D'autant qu'il fut aliené de Dieu,
qui estoit sa vraye vie, & fut assubietty à la mort
corporelle. Et ainsi quand nous receurons leur
glose, encore, en despit d'eux, aurons nous ce
point gagné, qu'en ce iour là le brigand fut deli-
uré de la misere, en laquelle Adam estoit trebus-
ché par sa faute. En somme nous conclurons, que
tout ainsi que la mort auoit commacé de regner
en Adam, depuis le iour de sa transgression: ainsi
le brigand, au iour que la promesse luy est faicte,
commance d'estre restitué en la beatitude de Pa-
radis.

Philip. 1.

Nous voyons comme saint Paul a vescu
en ceste esperance, quand il dit, qu'il desire d'es-
tre deslié, pour viure avec Christ. Premiere-
ment il vse d'une belle propriété, en disant, que
l'homme fidele par la mort est deliuré des liens de
son corps, comme il l'exprime plus clairement
en vn autre passage. Puis il adioust, que son at-
tente est d'estre avec nostre Seigneur I E S V S,
quand son ame sera separée du corps. Et de faict,
fil

fil n'estoit ainsi, ce qu'il dit en vn autre passage ne conuiendroït point, qu'il n'y a ne vie ne mort qui nous separe de la dilection que Dieu nous porte. Car si en la mort nous perissons, ou que nostre ame perde sa vie, comment pourra consister l'amour de Dieu enuers nous? Mais cela est beaucoup plus apertement deduit en vn autre passage, quand il dit: Nous sauons que si nostre domicile terrestre, du tabernacle de nostre corps, est destruit, que nous auons vn edifice au ciel de par Dieu, qui n'est point fait de mains. Parquoy estans en ce tabernacle, nous gemissons comme estans greuez, non pas que nous desirions d'estre despouillez: mais reuestuz, à fin que nostre mortalité soit engloutie par la vie. Toutefois nous auons tousiours bon courage, sachant que quand nous sommes en nostre corps, nous sommes comme elongnez de DIEU. D'autant que nous cheminons par Foy, & non point par regard. Mais nous auons ceste confiance & ce desir d'estre separez du corps, & iouyr de la présence de Dieu. Pource qu'il est là fait mention du iour du Iugement, les Anabaptistes s'efforcent de tout enuelopper, à fin d'attirer à ce iour là toutes les parolles de l'Apostre. Mais ilz ne peuuent tant faire que la verité ne soit plus forte, pour se maintenir contre leurs calomnies. Car l'Apostre dit expressement que l'homme fidele departant du corps va avec Dieu, duquel il auoit esté absent

en ce monde. Puis apres il adioust, que tant en absence qu'en presence, nous mettons peine de plaire à Dieu, en attendant qu'il nous faille trouver deuant son siege iudicial. Il faut qu'un homme soit bien obstiné, & plus qu'endurcy contre toute raison, qu'ad il ne voudra acquiescer à ces parolles. Or est il ainsi que les Anabaptistes, au lieu que saint Paul dit, que par la mort nous approchons de Dieu. font à croire que nous en recullons, & en sommes plus eslongnez qu'en la vie presente.

Ieh. 5.

Qu'ainsi soit, il est escrit que celuy qui croit au Filz de Dieu, n'entrera point en condamnation: mais est desia passé de mort à vie. Si la vie eternelle est desia commencée en nous, quelle absurdité est-ce, de dire qu'en la mort il y eust interruption? Si nous sommes desia entrez au Royaume de Dieu, quel propos y a il de nous en faire sortir à la mort, ou, pour le moins, nous faire aller en reculons, comme les escreuices? Le Royaume de Dieu est en vous, dit nostre Seigneur Iesus: qu'emporte cela, sinon que nous auons desia la racine de vie, qui ne peut nullement estre esteinte? Et c'est ce qu'il dit en un autre passage: Ceste est la volonté de mon Pere, que quiconque croit au Filz ne perisse point: mais ait la vie eternelle, & ie le ressuscciteray au dernier iour. Item, quiconque mange ma chair & boit mon sang a la vie eternelle, & ie le ressuscciteray au der-

Ieh. 6.

dernier iour. Notons qu'il nous promet deux choses, la vie eternelle & la resurrection. Les Anabaptistes prennent l'un de ces deux membres, & laissent l'autre, comme si on les pouuoit diuiser. Il parle encore plus clairement ailleurs, en disant: Je suis la resurrection & la vie, qui croit en Ieh. 11. moy, encore qu'il fust mort, il viura: & quiconque vit & croit en moy, il ne mourra iamais. Item, quiconque garde ma parolle, il ne verra ia Ieh. 8. mais la mort. Je vous prie, sauroit on dire chose plus claire que cela? Et vn Chrestien doit il desirer plus ferme tesmoignage pour appuyer seurement sa conscience? Quelcun possible me obiectera, que cela n'est que des fideles. Je le confesse, & aussi quant à moy il me suffist d'instruire les enfans de Dieu, quelle sera leur condition apres la mort. Combien que des reprouuez il en sera parlé cy apres. Mais pour le present nous voyons que nous promet Iesus Christ, si nous sommes siens. C'est, qu'au milieu de la mort nostre vie spirituelle ne sera point interrompue. Mais, qui plus est, saint Paul monstre que c'est lors qu'elle commence d'estre en sa plus grande vigueur. Comme nostre homme exterieur, dit il, est corrompu, aussi l'interieur se renouuelle de iour en 1. Cor. 4. iour. Par ces motz il monstre que d'autant que la vie presente decline & deuient caduque, la vie de l'ame croit & se fortifie de plus en plus. C'est bien donc au rebours de ceste sentence, d'esti-

mer que l'ame soit esteincte, quand la vie corporelle prend fin.

Psal. 88.
Rom. 8.

2. Co. 5.

Je deduiray encore cest argument plus au long. Nous deuons croistre & profiter iournellement en nostre Seigneur. Nous auanceant pour approcher tousiours de luy, comme si nous marchions auiourdhuy vn pas, & demain l'autre. Ou comme si nous montions par degrez. Or il est dict pour le temps present, que nous cheminons en la clairté de son visage. Item, que son Esprit nous rend tesmoignage que nous sommes ses enfans. Si ainsi est, qu'en la mort nous perdions ceste clairté & fiance que nous donne le saint Esprit, c'est bien loing de nous auancer. Semblablement saint Paul dit, que combien que nous conuersions en ce monde, touteffoys nostre habitation est au ciel. Regardons si la mort nous doit chasser hors du Royaume de Dieu, au lieu que parauant nous y auions nostre demeure par esperance. Il est certain, que ce corps mortel nous est comme vne prison, pour abaisser nostre ame si bas, comme captiue aux choses terrienes. Il est donc conuenable, que quand elle est sortie d'une telle seruitude en liberté, qu'elle soit plus disposée de contempler Dieu plus priuement. Et quand elle est soulagée d'un tel fardeau, qu'elle soit plus allaigre, pour s'esleuer à Dieu. C'est donc vne trop grande bestise, de les coucher mollement, comme font les Anabaptistes, pour
les

les faire dormir iusques au iour de la resurrection. Combien que leur erreur est encore mieux conuaincu par ce que l'Escripture enseigne de nostre regeneration. Car quand il plaist à Dieu de nous appeller en la participation de sa grace, il est dict qu'il nous fait nouuelles creatures. Comment cela? D'autant que par la vertu de sa parole & de son Esprit, il mortifie la corruption de nostre nature, nous faisant renaistre pour viure en son Royaume. Oyons maintenant quelle est l'operation de l'un & de l'autre en nous. Sainct Paul en nous voulant cōsoler dit, que cōbien que Rom. 8.
le corps soit mort à cause du peché, touteſſoys l'Esprit du Seigneur Iesus habitant en nous, est vie, à cause de la iustice. Je say que ceste vie n'est iamais parfaicte, pendant que nous sommes en ce monde: mais puis que l'Esprit de Dieu est vne estincelle de vie, laquelle nous est donnée, pour nous viuifier de plus en plus, iusques à ce que nous venions à la perfection: il sensuit que nostre vie ne peut iamais estre esteincte. Quant est de la parole, sainct Pierre en parle encore plus clairement, disant, que c'est vne semence d'im-^{1. Pier. 2.}
mortalité, voire vne semence incorruptible, que Dieu a mise en nous, à fin de nous exempter de la condition ou nous sommes naturellement, qui est, comme dit Esaie, que toute chair est foin, & Es. 40.
que la gloire de l'homme est comme la fleur de l'herbe, d'autant que quand l'Esprit de Dieu souf

fle sur l'homme, il est incontinent fletty, & des-
 feiché, & dechet du tout. Or apres que le Prophe
 te a ainsi parlé de nous, il adioust quât & quant
 au contraire, que la parolle de Dieu demeure e-
 ternellement. Sainct Pierre allegue ce passage, &
 expose que ceste eternité de la parolle de Dieu
 se demonstre en nous, d'autant que par icelle
 nous renaissions l'ayant en noz ames pour semen-
 ce incorruptible, laquelle ne pourrist & ne des-
 feiche iamais. Qu'est-ce qu'on peut expliquer là
 dessus, que ce ne soit chose patente & toute reso-
 lue, qu'estans regenerez par la grace de Dieu,
 nous sommes introduictz en son Royaume, pour
 viure en adherant à luy sans fin?

Mais il n'y a rien plus propre, ne plus cer-
 tain, pour nous bien resouldre de cecy, que de
 considerer quelle conionction & vnité nous a-
 uons avec nostre Seigneur Iesus. Premièrement
 nous sauons qu'au Baptisme nous sommes entez
 en son corps, pour estre vrayemēt ses membres,
 & sentir en nous tel effect de sa vertu, que les
 branches d'un arbre font de la racine. Car nous
 sommes vniz avec luy, iusques à estre faictz vne
 mesme substance. Et ne faut point alleguer autre
 raison, que ce qu'il en a prononcé de sa bouche.
 D'autant que ie vis, dit il, vous viurez. Or nous
 sauons que la vie de IESVS CHRIST n'est
 point temporelle, ne par interualle. Si donc nous
 viuons d'autant qu'il vit, il sensuit que c'est sans
 fin.

fin. Car il faudroit qu'il mourust avec nous. Et c'est ce qu'il auoit dict au parauant: Qui mange ma chair & boit mon sang, il demeure en moy, & moy en luy. Si I E S V S C H R I S T demeure en nous, il sensuit que la vie quant & quant y reside: suyuant ce qu'il auoit dict au parauant: Comme le Pere a la vie en soy mesme, aussi il a donné cela au Filz d'auoir cela en soy mesme. Il est bien aisé de voir, que iamais les Anabaptistes n'ont gousté cōme nous sommes conioinctz avec nostre Seigneur Iesus. Car ce seul principe est suffisant pour renuerfer leur faulse opinion & pernicieuse, touchant ceste dormition phantastique, qu'ilz attribuent aux ames. Car nous voyons au contraire la deduction qu'en fait saint Paul, quand il dit, que desia nous sommes bourgeois du ciel, estans assiz es lieux celestes avec nostre Seigneur Iesus. Tenons nous donc à ce que dit saint Paul, que nous sommes mortz quant au monde, & que nostre vie est cachée avec C H R I S T en Dieu. Or par cela il signifie ce qu'il dit ailleurs: Je ne vis plus, mais C H R I S T vit en moy. Tenons, dy-ie, ceste resolution, que ayant vne conionction inseparable avec nostre Seigneur Iesus, nous sommes participantz de la vie qui est permanente en luy. Et qu'il nous souuienne que luy estant resuscité, ne meurt plus, & que la mort ne dominera point sur luy, non seulement quant à sa personne, mais aussi quant à

Ieh. 6.

Eph. 2.

Coloss. 3.

Gal. 2.

ses membres. Il est vray qu'il y a ceste difference, qu'en luy elle est pleinement vaincue & du tout, en nous seulement en partie. Tant y a neant moins que mesme en nous elle est tellement vaincue, que iamais elle n'y pourra exercer son regne. Et ainsi en attendant l'accomplissement de nostre redemption, ne doubtons que le commencement qui en est en noz ames n'y demeure tousiours.

Iusques icy nous auons prouué par suffisans tesmoignages, comme les ames estans separées des corps viuent neantmoins en Dieu. Et auons reprouué l'erreur des Anabaptistes, qui font à croire qu'elles dorment, estans comme mortes sans sentiment aucun. Maintenant pour satisfaire au desir de tous, entant qu'en nous est, il reste de exposer en brief, ce que nous deuons tenir touchant de l'estat & condition ou elles sont. Or pour le premier, ie proteste, que i'en parleray plus sobrement que beaucoup ne voudroyent. Car ie say quelle curiosité il y a en plusieurs, qui voudroyent qu'on leur deschiffraist par le menu, iusques aux chambres & cabinetz ou sont les ames, en attendant le iour du Iugement. Ceux qui voudront qu'on les païsse de telles fables, se abuseroyent de les chercher vers moy. Car i'ayme mieux me tenir à la simplicité de l'Escripture, pour enseigner ce qui est expedient de sauoir, que d'extrauguer en l'air, pour estre veu subtil.

Or

Or nostre Seigneur preuoyant qu'il ne nous estoit point mestier d'auoir plus ample intelligence de ceste matiere, s'est contenté de nous enseigner simplement, que quand noz ames sont departies des corps, elles vivent neantmoins en luy, attendant l'accomplissement de leur beatitude & gloire, au iour du Iugement, comme il sera dit puis apres. Arrestons nous donc à cela, & quelque declaration que nous en faisons, ne passons point cesté mesure. quant à la sentence.

Mais pour y proceder plus clairement commençons par la distinction, qui est entre les ames des fideles, & entre les ames des reprouuez.

Quand l'Apostre dit en l'epistre aux Hebreux, qu'à ceux qui auront reiecté Iesus CHRIST, & se feront destournez de luy à leur escient, apres auoir congneu sa verité, il ne reste qu'une attente terrible de iugement. Il est certain, qu'il ne parle pas seulement pour la vie presente, mais beaucoup plus regarde au temps à venir. Car les meschans ne conceoyuent point tousiours en ce monde le iugement de Dieu, pour sen estonner & en auoir horreur: mais quand ce vient à la mort, ilz ne peuuent fuyr: qu'ilz ne soyent tenuz enfermez en ce destroit de frayeur & estonnement, congnoissant la vengeance qui leur est appareillée: & cela nous est dauantage testifié par saint Pierre & saint Iude, quand ilz disent, que Dieu n'a point espargné ses propres Anges.

Heb. 10.

1. Pier. 2.
Iude.

qui ont decliné de leur origine: mais les a mis en prisons obscures, les enferrant, pour les reseruer au grand Iour. En nous declarant la condition des Diables, ilz nous montrent aussi bien quelle est la condition des meschans. Car c'est vne mesme raison. Ainsi nous voyons que l'ame de vn infidele estant departie du corps, est comme vn malfaiçteur qui a desia receu sentence de con-
damnation, & n'attend plus que l'heure qu'on le meine au gibet pour l'executer. Il est bien vray, que mesme durant la vie presente, que les meschans sont bien tormentez quelquefoys de plusieurs remordz de leur conscience, & que le iugement de Dieu les persecute: mais d'autant que ilz senyurent de vaines cogitations, comme silz pouuoient fuyr & eschapper, ilz ne sont pas encore du tout prisonniers de Dieu: mais sont comme vagabondz, fuyans la presence du iuge. Apres la mort, il n'est pas ainsi. Car Dieu les tient comme en chefnez, en sorte qu'ilz voyent bien quelle punition leur est apprestée, laquelle il n'y a moyen d'euitier. Ilz sont donc en angoisse extreme, attendant l'exécution de leur sentence. De pouuoir determiner le lieu ou ilz sont, ce ne est pas à nous, & ne nous en doit challoir. Et d'autrepart, il ne nous faut pas imaginer, que les ames soyent semblables aux corps, pour tenir certain espace de lieu. Contentós nous de sauoir qu'elles sont en enfer, comme il est dict du mau-
uais

uais riche: c'est à dire en vn torment, & comme en vne gehenne, d'autant qu'elles se sentent reiectées de Dieu, & attendent encore vne plus grande reuelation de son ire.

De là il est facile de conclurre quel est l'estat des ames fideles. Cependant que nous sommes en ce monde, il est vray que noz consciences ont ioye & repos en Dieu: mais d'autant que elles sont agitées continuellement de diuerses tentations, ce repos là est inquieté de beaucoup de sollicitudes. Dauantage, d'autant que nostre salut consiste en esperance, il nous est caché, tellement que nous ne cheminons point en visions, comme dit saint Paul: mais quand ce vient apres la mort, d'autant que toute bataille est cessée, & que noz ennemis ne nous peuuent plus faire d'affaux, nous sommes comme en lieu de plus grande feureté. Dauantage, nous n'espererons plus alors, ainsi que nous faisons maintenant: c'est à dire par dessus & contre esperance: mais nous attendons la felicité, laquelle nous sentôs & voyôs en partie. Selon ceste raison que l'ame de Lazare receoit ioye & cōsolatiō, il est certain, qu'au milieu des miseres de ce mōde il se estoit cōsolé tousiours en Dieu sa vie durant. Mais nostre Seigneur specifie vne ioye qu'a l'ame fidele apres la mort, se voyāt deliurée de toute fragilité, de desfiāce, toutes mauuaises concupiscences, & de tous les dangers des tentatiōs, qui nous aduēcent iournelle

ment. Item, ayant plus claire & certaine con-
gnoissance de sa beatitude & gloire immortel-
le. Ainsi, quand nous voudrons en vn mot ex-
primer la condition des ames fideles apres la
mort: nous pourrons dire qu'elles sont en repos,
non pas qu'elles foyent en parfaicte beatitude,
ou gloire: mais entant qu'elles se contentent de
la ioye & consolation que Dieu leur donne, en
attendant le iour de la redemption derniere.

Si quelcun veut que cela luy soit declairé
par similitude, le temps auquel nous habitons en
ce corps mortel, est comme le temps de guerre,
quand nous sommes despoillez de nostre chair,
la bataille cesse & prend fin, & auons la victoire.
Mais le iour de triomphe quand Iesus Christ ap-
paroitra en sa maiesté, à fin que nous regnons
eternellement avec luy. Mais pource que telles
similitudes sont seulement pour esclaircir, & ne
sont pas authentiques: prenons en de l'escriture,
qui seruira non seulement à enseigner, mais aus-
si à prouuer nostre dire. Nous sauons comme
sainct Paul traite allegoriquement l'yslue du
peuple d'Israel hors d'Egypte, & le passage par
la mer rouge. Suyuant donc cela, entendons que
au Baptesme nostre Pharaaon est plongé en la
mer: c'est à dire que nostre vieil homme est mor-
tifié, & que nous sommes enseuelis avec Christ
& par ce moyen, affranchis de la seruitude de pe-
ché. Mais de là nous entrons seulement au desert,
auquel

1. Cor. 10.

auquel nous conuersons durant ceste vie mortelle. Car nous sommes pources & indigentz, sinon entant que nostre Seigneur nous departist iournellement ses graces, comme il faisoit plouuoir la manne du ciel au peuple d'Israel, quand ce vient à la mort nous entrons en la terre de promesse, ce qui ne se fait point sans grande difficulté. Car c'est adonc que nous auõs à soubstenir les plus grans assaux & les plus perilleux. Or apres que le peuple d'Israel fut entré en la terre de promesse, il se passa encore longue espace de temps deuant que Ierusalem fust bastie, & que le regne de la maison de Dauid fut mis sus. En ceste maniere les ames fideles ont bien incontinent apres la mort quelque iouissance, de l'heritage qui leur est promis: mais d'autant que la gloire de IESVS CHRIST leur Roy, n'est point encore apparue, & que la cité celeste de Dieu n'est pas encore establie en son estat, celles sont attendantes iusques au iour que cela se fera.

Toutes ces choses se cõprendront en l'escriture de ceux qui ne voudront estre rebelles à Dieu, & non seulement ceste doctrine a bonne approbation de l'escriture: mais aussi des anciens docteurs. Entre lesquelz Tertulian dit. Tant le loyer des bons, que la punition des mauuais, sont en suspend iusques à la resurrection. Neantmoins il ne laisse point d'affirmer cà&là, que les ames des fideles vivent cependant en Dieu. Et

pourtant il dit en vn autre lieu. Pourquoy ne prendrons nous le Sein d'Abrahā, pour vn receptacle des ames, à vn temps, lequel nous represente qu'il y a double retribution, l'vne tātost apres la mort, & l'autre au iour du dernier iugement. Et Irenée dit. Puis que le Seigneur Iesus est entré en l'ombre de mort ou estoient les ames des trespassez, apres est resuscité, corporellement. & est monté au ciel. Il est certain que les ames de ses disciples, pour lesquelles il a fait cela, s'en iront apres la mort en vn lieu inuisible, qui leur est desiny de Dieu, & demeureront là attendant en patience, le iour de la resurrection. Adonc elles seront reioinctes à leurs corps, pour venir deuant la face du Seigneur. Car nul disciple n'est par dessus son maistre. Sainct Chrysostome entend quel bien & priuilege ce nous est, qu'Abraham & S. Paul sont assis attendans la perfection de l'Eglise, à fin de receuoir leur loyer. Car le Pere leur a predict, qu'il ne leur donnera point leur salaire, iusques à tant que nous soyons là venuz, comme vn Pere de famille dira quelque foys à ses enfans reuenans du labeur, qu'ilz attendent à mager iusques à tant que leurs autres freres soyent venuz. Tu es fâché que tu ne receoys point desia ton salaire, que fera donc Abel qui a gaigné ce pris si long temps deuant toy, & n'a point encore receu sa couronne? Que fera Noé & les autres Patriarches, car ilz nous ont attenduz

Ieh. 37.

duz iusques icy, & attendront encore les autres qui viendront apres? Ilz nous ont preuenu en la bataille, mais ilz ne nous preuiendront pas en la couronne. Car il y a vn iour determiné, pour couronner tous les enfans de Dieu ensemble. Sainct Augustin escrit que les ames des sainctz sont en des receptacles secretz, iusques à ce qu'elles regoyuēt la courōne de gloire au iour du iugemēt. Au cōtraire les ames des meschās en attendāt leur punition. Et en vne epistre qu'il escrit à S. Hierome. L'Ame, dit-il apres la mort corporelle aura repos, & puis apres reprendra son corps pour auoir gloire. Sainct Bernard : la douceur qu'ont maintenant les ames des sainctz est grande, mais elle n'est pas encore parfaicte: Car elle se parfera quand ilz seront assis, sur les thrones, comme iuges: Quand elles sont despouillées de leur corps, elles sont incontinent introduictes à repos: mais non point à la gloire du Royaume. Et au sermon suyuant il poursuit encore ce propos, disant que il y a troys estatz de l'ame. Le premier au corps, comme en vn tabernacle Le second apres la mort, comme au portail du Temple. Le troisieme au ciel avec son corps glorieux. Qui enuoudra sauoir dauantage, qu'il lise le second & le troisieme sermon du iour de tous les sainctz.

Brief ceste est la doctrine perpetuelle qui a tousiours esté tenue en l'Eglise Chrestienne, sans aucune contradiction, que comme nous viuons

en Dieu par foy, durant ceste vie mortelle : aussi apres la mort nous auons ioye & consolation, en congnoissant plus clairement, & quasi voyant à l'œil la beaitude celeste, qu'il nous a promise: la quelle nous contemplons maintenant, comme en vn miroir, & par ænigme. Iamais ceste resuerie des Anabaptistes, touchant la dormition des ames, n'a esté mise en auant, sinon que par vne secte d'heretiques, qu'on appelle Arabiques, & par Iehan Pape de Rome, qui estoit: il y a plus de cent & trête ans. Mais pource que c'est vne chose si contreuenante tant au sens humain, cōme à la Foy Chrestienne, d'assopir ainsi les ames, du tēps qu'elles sont plus prochaines de Dieu, pour auoir plus parfaict sentiment de sa bonté, toute la Chrestienté a eu en horreur vne telle fantasie. Pourtant, que tous ceux qui se voudront rendre dociles à Dieu, & à sa parolle, demeurent en ce que i'ay desia monstré par l'escriture, & qu'ilz meditent ceste belle promesse, que le iuste florira comme la palme, & fera multiplié comme vn Cedre au liban, que ceux qui sont plantez en la maison du Seigneur floriront & produiront leur fruit: qu'ilz seront gras & robustes en leur vieillesse. Puis que nous voyons que la vieillesse est renouuellée en nous: par la grace de Dieu d'vne force miraculeuse: ne craignons point quand nous voyons toute nature defaillir. Plustost chantons avec Dauid, Mon ame, beneis le Seigneur lequel

Psal. 91.

Psal. 102.

lequel remplit de biens ta bouche, & te reieunift
comme l'Aigle, & defaict nous auons la priere
que nostre Seigneur Iesus a faict à son Pere pour
cela, disant. Pere ie desire que ceux que tu m'as Ieh. 17.
donnez, soyent avec moy pour voir ma clarté.

Or comme nous auõs approuué suffisamment
la vraye doctrine, touchant l'immortalité des
ames : aussi il est besoing d'autre costé, de res-
pondre aux passages, qu'amenent les Anabapti-
stes, pour fonder leur erreur. Premièrement ilz
alleguent que la description que l'escriure met
de l'ame humaine, conuient aussi bien à celle des
bestes comme quand il est dict que Dieu a crée Gen. 7.
les grandes balaines & toute ame viuante. Item,
que les bestes sont entrées par couples en l'arche
toutes seules ou y auoit esprit de vie. Et pour con-
fermer ce propos, ilz saydent de ce que dit saint
Paul. que l'homme est maintenant corruptible &
mortel & animal: mais qu'il ressuscitera incor-
ruptible, immortel, & spirituel, comme il est es- Gen. 2.
1. Cor. 15.
crit: que le premier homme a esté faict en ame
viuante. Je confesse que ce tiltre d'ame viuante
est souuent attribué aux bestes, pource qu'elles vi-
uent aussi en leur espece. Mais il y a grande di-
uersité entre icelles & les hommes. Car l'ame
est appelée viuante en l'homme, par laquelle il
congnoist & iuge & a discretion. L'ame des be-
stes n'a autre faculté sinon de donner mouue-
ment à leur corps. Ce n'est point donc de mer-

Act. 17.

ueilles si l'ame de l'homme qui a raison, entendement & volonte, & les autres vertuz distinctes du corps, subsiste estant separée du corps, au lieu que les ames des bestes perissent, entant qu'elles n'ont que sens corporelz. Pour ceste cause saint Paul allegue le tesmoignage d'Aratus poete Payen, que nous sommes la lignée de Dieu pour monstrier quelle est l'excellence de nostre ame. Quant à ce que saint Paul met difference entre l'ame viuante & l'esprit viuifiant : ce n'est pas pour denoter que l'ame que nous auôs à present perisse. Mais seulement pour monstrier combien il y aura plus grande vertu apres la resurrection. Assauoir que nous serons semblables aux Anges de Dieu viuans sans boire ne sans manger : n'estans plus subiectz à aucune mutation ne fragilité.

Mat. 22.

Ezech. 37.

Ilz alleguent outre plus vne vision d'Ezechiel, ou le Prophete descriuant de la resurrection dit, que Dieu appelle l'esprit des quatre ventz, pour inspirer vie aux oz mortz. Mais la solution est facile : que Ezechiel à la faceon accoustumée des Prophetes, vse d'une figure exterieure, pour signifier l'ame de l'homme, comme en sa premiere vision, en parlant de l'Esprit de Dieu, il l'appelle aussi bien vent. Qui voudroit arguer par cela, que l'Esprit de Dieu n'est pas vne essence, il n'y auroit nul propos. C'est donc grand folie à ces enragez, de ne point obseruer vne faceon de parler, laquelle est en si commun usage en toute l'escriure.

Leur

Leur troisieme argument est, qu'encore que l'ame eust esté crée immortelle: toutesfoys par le peché elle a perdu son immortalité, comme sainct Paul dir, que le loyer de peché, c'est la mort. Mais ie demande premierement, si le Diable n'a point receu ce mesme loyer, & toutesfoys il n'est pas tellement mort, qu'il ne veille tousiours, qu'il ne circuiffe, cherchant à deuorer. Je demande secondement si ceste mort prend fin ou non. Car si elle n'a point de fin, vueillent ilz ou non, il faut qu'ilz me confessent que les ames en la mort, ne laisserôt point de sentir le feu eternal, & lever qui les rongera. Il appert donc, que l'ame ne meurt pas tellement, qu'elle n'ait sentiment de son mal. Quant au corps il est dict, Rom. 6. Gen. 3. qu'il retournera en terre dont il est venu, pour aller en pourriture. Mais la mort de l'ame, c'est de estre alienée de Dieu, & d'estre confuse du sentiment de son ire, comme l'Apostre le demonstre en disant: Leue toy qui dors, leue toy de la mort Ephe. 5. & CHRIST te illuminera. Il est certain, qu'il ne parle point au corps insensible: mais à ceux qui estans enseueliz en peché, portent la mort & l'enfer avec eux. Dauantage il a desia esté môstre que ce que nous auons perdu en Adam, nous est restitué en Iesus Christ. Car ce qui auoit esté predict par les Prophetes, qu'il ruinerait la mort à iamais: Item, qu'il l'engloutiroit: les Apostres denoncent qu'il est accomply. Il a destruit la

2. Tim. 1.
Rom. 5.

Rom. 8.

A. A. 7.
Ich. 11.
1. The. 4.

mort, dit saint Paul, & a illuminé la vie par l'E-
uangile. Item, Si la mort a regné par la faute
d'un, ceux qui ont receu abondance de graces re-
gneront en vie par Iesus Christ. Il ne faut que ce-
ste sentence pour leur fermer la bouche. Car
puis que la mort qui estoit venue par Adam est
abolie par Christ, toute la question gist en la
comparaison que fait là saint Paul. C'est que la
vertu de Iesus Christ est beaucoup plus grande
à restaurer, que n'a esté celle d'Adam à destruire.
Ce qu'il explique là tresbien. Et suyuant ce qu'il
en a dict il adioute puis apres, qu'il n'y a plus de
condamnation, sur ceux qui sont en Iesus Christ,
qui ne cheminent point selon la chair. Et de
faict, si la mort auoit domination sur les ames fi-
deles, la grace de Dieu n'y auroit point son re-
gne, laquelle emporte vie, comme il dit: mais
plustost la Loy de Dieu exerceroit sa puissance
sur icelles, ce qui est contre toute la doctrine
de l'escriure.

Ilz sabusent aussi en ce, que souuenteffoys le
mot de dormir est prins pour mourir, comme
quand il est dict de S. Estienne, qu'il sest endor-
my au Seigneur. Item, Lazare nostre amy dort.
Item, Ne foyez point en soucy des dormans. Et
de faict ceste forme de parler, est plus frequente
aux histoires de la Bible, que nul autre. Je res-
pons que ce dormir n'appartient de rien à l'ame,
mais se doit du tout rapporter au corps. Car il y
a deux

a deux locutions qui se prennent en vn mesme sens, dormir avec ses peres, & estre avec ses peres. Or quand il est dict d'un homme qu'il a esté mis avec ses Peres, il est certain que cela sentend du sepulchre. Je ne veux point qu'on adiousté Foy en cela, sinon que ie prouue mon dire par bon tesmoignage de l'escriture. Quand Iob disoit: Voyez, ie dors en la poudre: il n'entendoit pas que son ame y deust dormir. Aussi quand il dit en autre passage, que tous hommes dormiront en la poudre ensemble, & que les vers les couvriront: cela ne se peut prendre que des corps. Il y a vne mesme raison en ce que dit David, disant qu'il est semblable aux mortz dormans en leurs sepulchres. Et Esaie parlant à Nabuchodonosor, dit: Tous les autres Roys ont dormy en leur gloire, & ont esté mis en leur lieu: mais toy tu as esté iecté hors de ton sepulchre. Nous voyôs donc en somme, que ce mot de dormir, est appliqué par similitude aux corps, qui sont sans mouuement, quand l'ame en est separée. Et c'est vne faceon de parler qu'ont eu tousiours les Payens en vusage. Et de là vient aussi le mot de Cymitiere, dont nous vsons, qui signifie dormitoire, non pas que les anciens ayent entendu que les ames fussent là couchées: mais d'autant que les corps sont là estenduz, pour reposer en leurs sepulchres, cōme en des lietz. Autant en faut il dire d'un passage de Iob, dont ilz sarment fort, quand il dit que

Iob. 7.

Iob. 21.

Psal. 87.

Esa. 87.

Esa. 14.

Iob. 14.

l'homme est vne foys endormy, qu'il ne seſueille point de ſon ſomme, & ne ſe leue point, iuſques à tant que le ciel ſoit changé.

Eccle. 3.

Ilz ſont ſemblablement vn bouclier d'une ſentence de Salomon, qui leur eſt autant contraire que nulle autre qui ſoit en l'eſcriture. Et de faiſt ie n'euffe pas attendu iuſques icy de la produire pour moy, n'euffe eſté qu'ilz ſen ſeruent impudemment, comme ſi elle faiſoit pour eux. Les parolles ſont telles: J'ay dict en mon cueur des filz des hommes, que Dieu les a voulu monſtrer ſemblables aux beſtes. Pourtant la mort de l'homme eſt telle, que d'une beſte, & leur condition eſt pareille. Les vns & les autres reſpirent, & meurent d'une meſme faceon, & l'homme n'a rien plus que les beſtes. L'un & l'autre ſont ſubieſtz à vanité, & ſen retournent en vn lieu. Ilz ſont venuz de terre, & y retournent. Qui eſt-ce qui ſait ſi l'eſprit des hommes monte en haut, & que l'eſprit des beſtes deſcende en bas? Je reſpons, comme j'ay deſia dict, que Salomon ne fauroit parler plus expreſſement pour nous. Car en voulant redarguer la vanité du ſens humain il dit, que l'homme ne peut comprendre par ſa raiſon naturelle, & par ce qu'il voit, en quoy il differe des beſtes. Et principalement quelle excellence il a ſur icelles, apres la mort. Car de l'immortalité des ames, c'eſt vne choſe qui ſurmonte ſa capacité. Ainſi puis que l'homme eſt conuaincu de vanité,

nité, en ce qu'il ne congnoist point, que son esprit
 monte en haut: c'est à dire, demeure immortel,
 au lieu que celles des bestes vont en corruption
 & perissent. Il nous faut conclurre que la vraye
 sagesse est de comprendre l'immortalité des a-
 mes. C'est vn semblable passage à celuy qu'il ad-
 iouste apres, que l'homme n'entend point qui est
 aymé, ou hay de Dieu: mais que cela est caché & *Eccle. 9.*
 en suspend, pource que toutes choses aduien-
 nent indifferemment aux bons & aux mauuais.
 Je demande maintenant, puis que toutes choses
 sont incertaines, si l'homme fidele doit estimer,
 quand il est en aduersité & tribulatiō, que Dieu le
 haïsse: Il est certain que non. Car la promesse luy
 est donnée, que c'est pour son salut, à fin qu'il se
 console, & se resiouysse, estant asseuré, que la tri-
 bulation est plustost vn signe de l'amour pater-
 nel de Dieu, que de haine. Mais Salomon par-
 le de l'opinion, que lon peut auoir selon le sens
 humain. Or tout homme est vanité. Il faut
 donc recourir à Dieu, & à sa parole. Car il ad-
 iouste puis apres, que c'est qu'il aduient à ceux
 qui demeurent en ceste phantasie, c'est que leur
 cuer est remply d'impieté & contemnement
 de Dieu: d'autant qu'ilz ont ce proverbe, qu'un
 chien viuant vaut mieux qu'un lyon mort. Or
 luy mesme mōstre en la fin du liure ce qu'il nous
 faut sentir touchant ce poinct. C'est que le corps
 sen retourne en terre, qui est son origine: & l'es- *Eccle. 12.*

prit sen va à Dieu qui l'a donné.

1. Cor. 5.

Principalement ilz se fondent sur ce que l'escriture dit que nous receurons au dernier iour chacun selon ses œuvres. Car ilz arguent ainsi. Puis que Dieu nous renuoye au dernier iour, quand il est question de nostre beatitude & de la vie eternelle, & au contraire quand il menace les meschans il leur denonce sa vengeance en ce iour là. Il faut dire que iusques alors, les bons ne receoyuent point leur salaire, & les meschans ne seront point puniz. Autrement il seroit dict sans propos, que en ce iour là sera sauué le peuple, qui se trouuera escrit au liure. Et qu'il sera dict aux eleuz de Dieu. Venez posseder le Royaume. Ilz concluent donc puis que nous ne entrons point en possession de nostre salut, iusques au iour de la resurrection derniere : que ce pendant noz ames dorment, & qu'elles n'ont aucune iouissance de leur beatitude. Je respond que ce n'est pas vne bonne consequence. Car encore que les ames ne foyent point en gloire : il ne sensuit point qu'elles ne vivent en Dieu, en attendant la reuelation d'icelle. Et pour plus ample solution de ce passage, qu'il souuienne aux lecteurs de ce que i'ay confessé cy dessus. Ce est que nostre beatitude est tousiours en chemin, iusques à ce iour là. Il n'y a nul qui n'accorde que la perfection de nostre beatitude est, que nous soyôs parfaictement conioinctz avec Dieu.

Et

Matt. 25.

Et c'est le but ou nous renuoyent toutes les promesses de Dieu. Car ce qui a esté dict autrefois à Abraham, s'adresse aussi bien à nous. C'est que Dieu est nostre loyer trefample. Voyla Gen. 15.
 donc la fin de nostre beatitude, de nostre gloire & salut, d'estre pleinement tous à Dieu, pour le posseder. Et qu'il soit du tout en nous. Or est il ainsi que cela ne fera point accomply deuant le iour de la resurreccion. Ce n'est pas donc sans cause qu'il est nommé le iour de salut. Il est donc dict que nous possederons alors le regne de Dieu, non pas que nous ne le possedions en partie au parauant, comme ia des à present nous le possedons, par esperance, mais pource qu'alors nous en aurons la plenitude ou parfaicte reuelation. Mais à fin d'abbreuier, ce que nous en auons dict cy dessus, peut suffire pour solution de leur argument. C'est que nous sommes tousiours en attente & desir iusques à tant que I E S V S C H R I S T apparoisce en nostre pleine redemption, pour nous receuoir en l'immortalité & gloire de son Royaume. Toutefois cependant, nous ne laissons point d'auoir nostre vie cachée en luy de- Colo. 3.
 uant Dieu comme dit saint Paul.

Il sembleroit bien aduis, que nous leur eussions respondu suffisamment, quant au iour de la resurreccion: n'estoit qu'ilz poursuyuent encore 1. Cor. 15.
 outre, produisans la sentence de saint Paul, ou il dit que nous sommes plus malheureux, que tous

les hommes du monde, si nous ne ressuscitons point, Ilz disent que cela, ne conuiendrait nullement, si nous estions bien-heureux deuant la resurrection. Je respons que saint Paul a regardé au but de l'esperance des fideles: c'est qu'au iour de la resurrection ilz obtiendront, ce que Dieu leur a promis: ainsi le cas posé qu'il n'y eust point de resurrection ilz seroyent frustrez de toute leur attente. Nous disons bien, que les ames fideles, sont bien-heureuses en attendant ce iour là: mais c'est à cause de leur attente, laquelle estant frustratoire & vaine, il sensuyuroit qu'elles seroyent malheureuses. Puis que toute la beatitu de des enfans de Dieu, procede & despend de là, qu'au iour de la resurrection ilz seront semblables à Dieu, & iouyront de leur heritage: Ce ne est point de merueille, si saint Paul dit, qu'ilz seroyent plus malheureux que le reste du monde, si il n'y auoit point de resurrection. Et de fait en vn mesme sens, il met ces deux choses: qu'il n'y ait point de resurrection, & que nostre esperance soit seulement en ce monde. Je ne doubte que chacun ne voye à l'œil, que ceste sentence de saint Paul ne nous est en rien contraire. Car il dit que si nous sommes abusez en l'esperance, que nous auons de la resurrection: que nous sommes malheureux. Et nous disons que les ames fideles, sont bien heureuses: à cause de ceste mesme esperance, sans laquelle nous confessons, qu'il n'y

n'y peut auoir aucune ioye ny beatitude. En cela il n'y a nulle contradiction.

Ilz nous obiectent dauantage ce qui est escrit en l'Epistre aux Hebreux des anciens peres, qu'ilz sont decedez en Foy, n'ayans point receu les promesses, mais les saluant de loing, & se confessans estre estrangiers sur la terre. Or en disant cela, ilz signifient qu'ilz cherchent leur heritage & pays naturel, que filz se souuenoyent de celuy dont ilz sont sortiz, ilz auroyent puissance d'y retourner: mais ilz en appetét vn meilleur, c'est à dire du ciel. Ce passage est meschamment depraué par eux, par faulses gloses: d'autant qu'ilz referent cela au temps present: ou l'Apostre parle du temps que les Patriarches conuerfoient en ce monde. Combien que quand au propos ou nous sommes, ie suis trescontent d'accepter leur glose. Ilz arguent ainsi, que si Abraham & les autres peres appetent l'heritage celeste, ilz ne l'ont pas encore. Je replique au contraire, que filz ont quelque desir, ilz viuent donc & ont sentiment du bien & du mal. Que deuendra la dormition? Ainsi on voit qu'ilz se contredisent comme petitiz enfans. Au reste, ie confesse bien que l'Apostre puis apres dit, que tous les peres anciens n'ont point encore iouyssance de ce qu'ilz ont attendu en ce monde: d'autant que Dieu a ordonné qu'ilz ne vinsent point à leur perfection deuant nous. Et c'est ce que nous di-

sons, que toute la consolation qu'ont les ames fideles, se reduit à ceste immortalité glorieuse, en laquelle nous serons recueilliz tous ensemble, quand IESVS CHRIST apparoitra en Iugement.

Act. 9.

Les passages que ie reciteray d'oresnauant monstrent comme ces phantastiques ramassent toutes les cauillations qu'ilz peuuent, voire impudemment, pour auoir quelque apparence à colorer leur erreur. Si les ames, disent ilz, estans separées des corps, viuent avec Dieu, saint Pierre faisoit vne grand iniure à Thabira en la ressuscitant, veu que c'estoit la retirer de la compagnie de Dieu, & de la vie bienheureuse, pour la ramener en ceste mer de misere. Ie respons que cest argument fait autant contre eux, que contre nous. Car si elle dormoit sans sentir aucun mal, on pourroit dire, que ce n'estoit pas son profit de sortir d'un tel repos, pour rentrer aux combatz de la vie presente. Ie leur pourrois dire, que ilz me respondissent les premiers, pour me soulde cest argument. Mais ie say qu'il ne faut point attendre aucune bonne solution d'eux. Quant à nous la responce est facile. Ce que dit saint Paul de soy est commun à tous fideles. Assauoir, qu'il nous est profitable de mourir, & que c'est nostre meilleur d'estre avec Christ. Et toutesfoys il dit, que Dieu en guerissant Hepaphrodite de sa maladie, & le retirant de la mort auoit eu pitié d'iceluy,

celuy, combien qu'il fust du nombre des fideles. Les Anabaptistes arguent, que cela est vne cruauté, si les ames viuent apres la mort. Nous disons, que c'est vne misericorde, quand il plaist à Dieu de se magnifier en nous en ceste vie corporelle, nous faisant instrumens de sa gloire. Dauantage, il n'est pas dict que Thabira ait esté resuscitée pour sa commodité propre, mais à la requeste des pources, qui plouroient pour la perte qu'ilz auoyent faicte en sa mort. Tenons donc cela, que nostre Seigneur nous fait tousiours vne grace singuliere, en faisant que nous viuions & mourions à luy.

Venons aux tesmoignages qu'ilz alleguent de Dauid, combien que ie suis honteux de les reciter, d'autât qu'ilz en abusent tant puerilement. Mais si les faut il reciter, d'autant qu'ilz en font leurs choux gras enuers les simples gentz. Ilz alleguent ceste sentence: I'ay dict, vous estes dieux & filz du Treshaut: toutesfoys vous mourrez cō-^{l'fal. 32.} me hommes. Ilz exposent, que les fideles sont là nommez dieux: mais qu'ilz meurent comme les reprouuez, & que leur condicion est semblable, iusques au iour du Iugement. Mais nous auons l'exposition de Iesus Christ, que là il est parlé des Princes & gentz de iustice, qui ont le tiltre de Dieux: d'autant qu'ilz sont comme ses lieutenans en leur estat. Et quand nostre Seigneur Iesus n'en auroit sonné mot, l'vsage de l'Escripture

le nous monstre : Et le texte mesme est si clair, qu'il emporte sa glose quant & quant . Car là sont repris ceux qui exercent tyrannie & iniquité, & leur est dict, qu'il faudra mourir, & quitter la dignité, laquelle ilz ont, pour rendre compte à Dieu, comme les plus petitiz.

Ilz ameinent aussi ce passage : Ne mettez point vostre fiance aux homes, l'esprit de l'homme sen va, & sen retourne en sa terre, & en ce iour là perissent toutes leurs cogitations . Ilz prennent le mot d'esprit pour vent, comme si n'y auoit point d'autre ame en l'homme. Puis ilz arguent, que si les cogitations perissent, il sensuit que l'ame dort, ou qu'elle n'est rien . Je respons, que l'esprit de l'homme signifie autre chose que souffle, comme ie l'ay tresbien prouué. Mais encore que ce mot fust icy prins en telle signification, comme il se prend en quelques passages, ce n'est pas à dire que l'homme n'ait pourtant rien que souffle. Touchant de ce qui est dict, que les cogitations perissent : cela n'emporte autre chose, sinon que les entreprinſes des hommes sont dissipées à la mort, & sen vont en fumée, comme il est dict ailleurs, que le desir des pecheurs perira, pour denoter qu'il ne viendra point en son effect . Dauid donc ne dit pas que les hommes ne penseront rien apres leur mort : mais il entend que toutes leurs deliberations viendront à neant. Ilz ameinent vn autre passage quasi semblable :

ble: Il s'est souuenu qu'ilz sont chair, esprit qui va *Psal. 103.*
& ne retourne point. Or ie confesse, qu'icy le
nom d'esprit signifie vent, ou souffle. Mais ie nie,
que cela leur serue de rien pour confirmation
de leur erreur. Car par ceste faceon de parler, le
Prophete a voulu exprimer la fragilité de no-
stre condition, & la briueuté de la vie humaine.
Il est dict en l'histoire de Iob, que l'homme est *Iob 13.*
comme vne fleur, sortant de terre, qui fletrist in-
continent, & comme l'ombre qui seuanouyt. E-
saie cōmande à tous Prescheurs, de crier que tou-
te chair n'est que foin. Si les Anabaptistes con-
cluent de cela, que l'ame se fletrist: ilz verront *Psal. 40.*
plus clair que saint Pierre, qui prouue que les a-
mes des fideles sont immortelles: d'autant que le
Prophete adioust consequemment, que la pa-
rolle de Dieu demeure à iamais. Il y a vne sem-
blable raison en ce qui est dict en vn autre Pse-
aume: Comme vn pere a pitié de ses enfans, aussi *Psal. 102.*
le Seigneur a eu pitié de ses seruiteurs. Car il con-
gnoist de quoy nous sommes faictz. Il s'est sou-
uenu que nous sommes pouldre, que noz iours
sont comme herbe, dont la fleur desseiche incon-
tinent, que l'esprit passe en nous & n'y arreste
point, & ne congnoist plus son lieu. En toutes
ces sentences, notons que l'homme est admone-
sté de sa fragilité, principalement quand Dieu re-
tire sa main & sa vertu de luy: à fin qu'il cōgnois-
se qu'il n'est rien, & moins que rien: sinon entant

1. Tim. 6.

que Dieu le soustient & le conferue par sa grace. Et de fait, quand nous disons que les ames sont immortelles, nous ne pretendons point par cela de rien deroguer au tiltre de Dieu, lequel sainct Paul dit estre seul immortel. Plustost nous estimons, que c'est vn blaspheme, que d'attribuer immortalité à l'ame, comme si elle subsistoit de sa propre vertu. Mais cependant il nous conuient de cōsiderer, quelle proprieté & nature Dieu a donnée aux ames: c'est de subsister par sa main, pour estre en beatitude immortelle, ou en malediction.

Psal. 87.

Psal. 115.

Psal. 113.

Psal. 29.

Esa. 38.

Mais ilz pensent auoir vn bien fort baston en ce qui est dict en vn autre Pseaume: Feras-tu miracle, pour faire ressuscciter les mortz, à fin que ilz te louent? Quelcun racontera il ta misericorde au sepulchre, ou ta iustice en la terre d'oubliance? Item, Les mortz ne te loueront point, Seigneur, ny tous ceux qui descendent au sepulchre. Mais nous qui viuons benirons Dieu. Item, Quel profit y aura il en mon sang, quand ie seray descendu en pourriture? la pouldre te louera elle, ou si elle annoncera ta verité? Item ce que dit Ezechias en son Cantique: Le sepulchre ne te louera point, & la mort ne te donnera point gloire. Ceux qui descendent en bas n'attendront point ta verité. Le viuant, le viuant sera celuy qui te confessera. Le pere racontera au filz ta verité. Pour solution il y a deux choses à noter, l'vne est

est que par la mort il ne faut point entendre simplement la mort commune, par laquelle il nous faut tous passer: mais vne mort qui soit punition expresse, & signe de l'ire de Dieu, & qui emporte vne reiection des hommes, pour les perdre du tout. La seconde, quand il est dict, Les mortz ne te loueront point: il est parlé de la louange de Dieu, qui se raconte entre les hommes, qui ont senty sa grace. Quant au premier, il est vray que le mot d'enfer signifie souuent sepulchre, comme aussi nous l'auons translaté. Mais ceux qui sont exercez en l'Escripture, ne sont pas ignorantz que par les vocables de mort & de sepulchre, ce que i'ay dict est signifié. Et principalement aux Pseaumes. Ceux donc que Dieu a reiettez & qu'il poursuit en son ire, non seulement quant au corps, mais plustost quant à l'ame, sont appelez mortz, & la destresse qu'ilz sentent est appelée sepulchre: comme quand il est dict que la mort vienne sur eux, & qu'ilz descendent tous vifz au sepulchre. Item, Seigneur Dieu, si tu cesses de me secourir, ie seray semblable à ceux qu'on deualle au tombeau. Item, Seigneur tu as retiré mon ame du sepulchre, & m'as deliuré de ceux qu'on deualle au tombeau. Item, Que les pecheurs soyent iectez au sepulchre, tous peuples qui oublient Dieu. Item, Si Dieu ne m'eust aidé, mon ame eust habité au sepulchre. Item, Noz os ont esté dissipez pres du sepulchre. Item, Il m'a

Psal. 54.
Psal. 27.
Psal. 29.
Psal. 9.
Psal. 140.
Psal. 142.

Psal. 132.

Psal. 32.

Psal. 61.

Psal. 114.

Psal. 49.

colloqué en lieu obscur, comme les mortz. Comme au contraire il est dict, que ceux que Dieu traicte en sa mercy, viuent. Le Seigneur, dit Dauid en vn autre lieu, a ordonné en son peuple benediction & vie eternellement. Item, deliurant leurs ames de mort, & les nourrissant en famine. Item, Dieu l'arrachera de ton tabernacle, & ta racine de la terre des viuantz. Item, Je plairay au Seigneur en la terre des viuantz. Mais il y a vn passage entre les autres, qui exprime si bien tous les deux, qu'il nous suffira pour tous. L'homme payera il la rançon de son ame, pour viure sans fin? Ne verra il point la mort: veu que les sages meurent? Fols & sages, dy-ie, meurent ensemble: on les arrange au sepulchre, cōme moutons, & la mort les deuore. Mais les iustes domineront sur eux au matin: leur force perira au sepulchre, & leur gloire faudra, & le Seigneur retirera mon ame de la puissance du sepulchre. La somme de ce Pseaume est, que ceux qui se confient en leurs richesses ou vertu, mourront tous, tant le poure, que le riche, tant le fol que le sage: mais celui qui espere en Dieu sera deliuré du sepulchre. Ces choses obseruées, nous auons vne solution à tous les passages qu'alleguent les Anabaptistes. Il est là monstre, que les Sainctz estans estonnez de l'apprehension de la mort, prient à Dieu qu'il les en retire. Pourquoi est-ce qu'ilz ont vne telle horreur? Regardons tous les exemples

ples des fideles, nous ne lisons point qu'ilz ayent fait de grandes complaints ne lamentations, quand est venu à mourir: mais se sont soumis à la bonne volonté de Dieu en patience, ie dy mesme Dauid & Ezechias. Pourquoy est-ce donc qu'ilz ont vsé de telles querimonies en ces passages prealleguez, sinon qu'en la mort ilz ont conceu l'ire & la feuerité de Dieu, laquelle les a estonnez, & non sans cause. Or il n'y a nulle difficulté, que l'homme qui sent la rigueur de Dieu, & est persecuté de sa vengeance, ne le peut pas louer, d'autant que nous ne luy pouuons point rendre action de graces, sinon en sentant sa bonté. Secondement, quand il est dict en ces passages, que les mortz ne loueront point Dieu, ce n'est pas à dire qu'ilz ne le loueront point en leur cueur: mais qu'ilz ne raconteront point aux autres ses louanges. Ce qu'emportét aussi les motz qui sont là mis. Car narrer, & annoncer, & raconter à ses enfans, signifie de celebrer de bouche les benefices de Dieu, à fin que le monde les entende.

Ilz produisent encore deux autres versetz des Pseumes, l'un est: Je loueray le Seigneur en ma vie. Je chanteray à mon Dieu, pendant que ie suis. Item, Retire toy de moy, que ie reprenne courage, iusques à tant que ie m'en aille, & que ie ne soye plus. Au lieu du premier passage, ie leur en rendray cinq, pour leur prouuer le con;

Psal. 103.

Psal. 144.

Psal. 60.

Iob 10.

traire de ce qu'ilz pretendent: Seigneur Dieu ie te confesseray eternellement. Item, Ie beniray le Seigneur en tout temps. Sa louange fera toujours en ma bouche. Item, Derechef ie te loueray eternellement, de ce que tu as fait. Item, Ie loueray ton Nom à iamais, & au siecle des siecles. Item, Ie chanteray Pseaumes à ton Nom eternellement, & au siecle des siecles. Daudid ne dit pas qu'il louera le Seigneur seulement durant la vie presente: mais il promet de faire cela sans fin. Que veut il donc dire en l'autre passage: Rепliquera quelcun, promettant louer le Seigneur pendant qu'il viura. Ie respons que cela n'exclud point les louanges que rendent les Saintz apres leur mort, d'autant que la facon qu'ilz ont de louer Dieu, est diuerse de la nostre. Quant au second passage, ce sont les parolles d'un homme pressé d'angoisse de conscience, lequel demande à Dieu, que fil a merité d'estre abyfme, qu'il le soit pour vne foys, comme nous auons un semblable exemple en Iob, quand il dit à Dieu: Laisse moy, que ie pleure un petit ma douleur, & puis que ie m'en aille en la region de tenebres, ou il n'y a que confusion & horreur eternal. Cela ne fait rien à propos, pour dire que les ames prennent fin.

Il y a encore quelques autres passages en l'histoire de Iob, qu'ilz destournent à leurs propos, lesquelz ie toucheray en brief, selon qu'ilz me

me viendrôt en memoire : le premier est : Pourquoy ne suis-je mort en la matrice, ou pourquoy ne suis-je pery, en sortant du ventre de ma mere. Car maintenant ie dormirois en silence, & reposerois en mon sommeil, ou ie serois comme vn enfant auorté, & comme ceux qui estans cõceuz ne sont point venüz à perfection de vie. Ie serois au lieu ou les grans & petitz se reposent. Mais si ie leur ameine aucontraire le quatorzieme chapitre d'Esäie, ou il descrit les mortz venans au deuant du Roy de Babylone, pour se moquer de luy, qu'est-ce qu'ilz me respõdront? Mais ie laisse cela, me contentant de la simple exposition de la sentence de Iob, qui est telle. C'est que luy estant pressé iusques au bout, & quasi defaillant dessoubz le faix : ne regarde que sa misere presente. Pour ceste cause il la fait plus grande que toutes les autres, mais quasi seule : il n'a donc point en horreur la mort, mais plustost l'appete, comme si elle estoit fin de tout malheur, ne regardant point ce qui sensuyura apres. C'est la faceon de ceux qui sont preoccupez de grande angoise ou douleur. Car si aux grandes chaleurs d'esté nous desirons vne bonne gelée, & derechef en hyuer, ayant oublié combien la chaleur est facheuse, desirons qu'il face chaut : ce n'est point merueille si vne passion vehemente nous poulse à vn tel desir. Regardons maintenant que peut faire l'homme qui est persecuté de

la main de Dieu, assauoir sil ne doit point estre bien transporté, en sorte qu'il oublie tout le reste, à cause de sa douleur. Il y a vne mesme raison en plusieurs autres sentences qu'il dit apres, comme sont celles qui sensuyuent: Qu'il te souuienne, Seigneur, que ma vie n'est que vent, & que mon œil ne retournera point pour voir son bien. Item, Il ne me reste plus que le sepulchre. Item, Tout ce qui m'appartient descendra au profond de la fosse, & d'autres semblables. Car nous voyons là, que Iob estant preoccupé de la destresse qu'il sent de ce que Dieu le poursuit en son ire, n'a deuant les yeux que confusion, & ne prend la mort que comme vn abolissement de toute sa vie, ne regardant point à ce qui sensuit apres, comme dict a esté. De vouloir par cela conclurre, que l'ame de l'homme perit avec le corps, non seulement c'est vne bestise trop lourde, mais aussi vne impudence. Pourtant en cecy, & en tout le reste, ie pense auoir si euidentement reprouué tout ce que les Anabaptistes pretend, pour donner couleur à leur meschante opinion, que ie puis bien mettre fin à ce propos.

I'ay protesté du commencement, & non sans cause, que mon intention n'estoit pas de deduire de poinct en poinct toutes les opinions que tiennent les Anabaptistes. Car ce seroit entrer en vne forest, laquelle n'auroit nulle issue. Et aussi il n'est ia besoing, & mesme ce seroit vne en-

entreprinse plus curieuse qu'vtile: de ramasser toutes les phantasies absurdes, que chacune folle teste d'entre eux a imaginé. Il m'a donc suffy de traicter en brief le plus fidelement que i'ay peu, les articles que tiennent communement ceux qui sont de'sens le plus rassis, ou bien moins eceruelez en toute la secte. Car touchant de ceux qui se nomment Libertins, lesquelz sont du tout forcenez & hors du sens, ie les reserve à vn autre traicté. Maintenant, pour conclusion, ie prie tous lecteurs Chrestiens, d'examiner le tout à l'Escripture, comme c'est la vraye touche pour esprouver toute doctrine. Je ne doubte pas, que quicôque se laissera mener par la verité de Dieu, & se voudra submettre à raison, ne trouue ample ment de quoy se contenter quant aux articles que i'ay icy deduiet. Davantage, ie me suis efforcé le plus que i'ay peu de m'accommoder à la rudesse des petitz, pour lesquelz principalement ie travailloye. Ainsi les Anabaptistes ne pourront pas caillier, comme ilz ont de coustume, que ie les ayé voulu gagner par subtilité, ou les opprimer par artifice d'eloquence humaine: veu que i'ay tenu vne faceon autant populaire & simple, qu'on la sauroit souhaiter. Mais il est bon que i'aduertisse tous bons fideles de leur malice. Pource qu'ilz ne peuuent faire trouver leur cause bonne, sinon en tout brouillant: tellement que toute leur doctrine soit vn meslinge confus, com

me vn corps ou il n'y auroit ne teste ne bras ne piedz : ilz vsent souuent de manieres de parler lourdes & sauuages, & de propos deliberé, sautnant à chacune foys du coq à l'asne, entrelaceant diuers propoz : amenant passages de l'Escripture coupez ou rompuz : & se plaisent en cela, se faisant à croire qu'il y a beaucoup plus de maiesté à parler ainsi brutiement, que de bien digerer son cas par ordre. Or pour les rendre bien confuz, il n'y a meilleur moyen, que d'exposer & de diuïser les matieres distinctement, & par certain ordre demener vn poinct apres l'autre, bien poiser & regarder de pres les sentences de l'Escripture, pour en tirer le vray sens & naturel, vsfer d'une simplicité & rondeur de parolle, qui ne soit point eslongnée du langage commun. Quand on fait cela, ilz crient qu'on les veut deceuoir & circonuenir par astuce humaine, & par sophistrie. Comme si c'estoit la coustume ou intention des Sophistes, que d'esclaircir les choses enue-loppées. Quant à moy, ie confesse, qu'entant que en moy est, ie m'estudie à disposer par ordre ce que ie dy, à fin d'en donner plus claire & facile intelligence. Si les Anabaptistes ne peuuent porter cela, ie ne saurois que dire, sinon que celuy qui fait mal hayt la clarté.

Or pour donner quelque couleur dauantage à leur doctrine, ilz ont fait imprimer avec leur resolution l'histoire de la mort de ie ne say quel

quel Michel, leur complice, & adherant à leur secte : & de fait ilz ont accoustumé de faire vn grand bouclier , de ce que plusieurs sont mortz pour auoir maintenu leurs opinions, sans s'en vouloir retracter: encore que par ce moyen ilz peussent eschapper la mort, & racheter leur vie. Et de fait, c'est vn tesmoignage de belle apparence, pour authoriser vne doctrine, quand vn homme constamment & sans aucune difficulté abandonne sa vie pour la confirmation d'icelle. Comme quand on nous propose ce qu'ont enduré les Prophetes, & Apostres, & autres Martyrs, pour maintenir la verité de Dieu: nous sommes d'autant plus fortifiez, pour adherer à la Foy que nous tenõs, laquelle ilz ont scellée par leur sang. Je confesse donc, que nous ne deuons pas villipèder la mort des seruiteurs de Dieu, veu qu'elle est precieuse deuât sa face: & que leur cõstance & fermeté n'est pas vne petite aide, pour subuenir à nostre infirmité. Mais pource que nous pourrions estre tous les coupz deceuz en cela, si nous ne passions outre: il est question de reuenir au fondement, sans lequel nous ne saurions assoir iugement seur, ny certain en cest endroit. Il est certain, que la mort d'vn homme, quel qu'il soit, n'est iamais si precieuse, qu'elle puisse ne doyue en rien preiudicier à la verité de Dieu, ou qu'elle soit vallable pour approuuer doctrine erronée & peruerse. Tenons nous donc à ce-

la, que comme vne bonne doctrine & saine, estant fondée en raison, prend sa confirmation puis apres de la mort de ses tesmoins & confesseurs, par laquelle elle est maintenue : ainsi tous les hommes de la terre en mourant ne pourront pas approuuer le mensonge. Et mesme c'est ce que discerne les Martyrs de Dieu de ceux du Diable, que de mourir pour iuste cause. Pourtant tout ainsi que c'est vne cōstance louable, que de souffrir la mort, si mestier est, pour le tesmoignage de la verité : aussi c'est obstination enragée, que de souffrir pour mauuaise querelle. Tellement que celuy qui en souffre le plus, est d'autant plus à vituperer. Tant sen faut que soubz ombre de cela nous deuions nous laisser transporter, nous priuant de tout iugement & consideration. S'il est question d'auoir certitude de la verité de Dieu, que nous preschons, nous l'auons plus que suffisante en la mort de nostre Seigneur I E S V S, de tous les Prophetes, Apostres, & Martyrs, tant de l'Eglise primitiue que du temps present. Touchant de ce qui est repugnant à icelle: il a beau estre scellé de sang ou de cire : Iamais ne laissera d'estre mensonge.

F I N.

